

Pou Namona

LUKA

Ererena Hauna

Puka Aona Irerena 'Abina

Pou namona neiana Luka ererena aonai ebaihanaka Iesu hanona hau weiana aba e'abi'uai aina kemai Isaraela haukia mai hanopaka maearimakia ikoikiai kebamaurinakia hauna. Luka hanona Iesu ena aka kea'i ramana raninai, Auba Robe ia ebonu, weiana ia keao uraru haukia herekiai Pou Namona kehinana (4.18), haeamona maearima mai ekia puma aea ebarai aihonakia hauna robana eahu haraina. Taba weiakia Iesu ebabainakia hanona maearima neiakia ebaonamo ki'a bahanakia ba ia teonamoai ki'a bahana. Maria ia ebaramana raninai maearima teonamo (1.42-48; 2.10), haeamona puka a'enai Iesu auhao aokiai ekara'au raninai ekia aonamo eapa'ua ki'a baha (24.52).

Puka neiana iro'ana rua aokiai (1-2 mai 9-19) taba baika hanona Luka mo ikupaiana ehina, matoha Aneru mai mamoe iha'ini haukia orina, Iesu miori papanai marea robe aonai, 'abi ibabataikia weiakia Samaria hauna namona mai Miori ha hamana ehabona hauna. Taba baika hanona Luka ehina taburanakia, rani ikoinai kahabahuba'ari tabura taearana, Auba Robe ena aka, mai Tirama ena namoai maearima ikoikiai ekia ki'a ehina hao. Luka ehore babi'e tebabainakia tabakia bo'okia ehinanakia.

Luka ena irere hanona neiamo a'i epua, ia ehore puka weiana 'Iuhubeau haukia ekia aka' abomo ererena weiana hanona Iesu ekara'au kupa eao murinai taba tebabai haukia robakia eahunakia.

Puka Paipana Apa'uakia

- a. Roba ahu. (1.1-4)
- b. Ioane mai Iesu ohi ekia rama mai miorikiai aonai. (1.5-2.52)
- c. Ioane ba'uere robe hauna ena aka. (3.1-20)
- d. Iesu ena 'uere robe mai baihobo. (3.21-4.13)
- e. Iesu ena aka maearima herekiai Galilea aonai. (4.14-9.50)
- f. Galileai eaomo Ierusalem. (9.51-19.27)
- g. Hui orena Ierusalem aonai mai herenai. (19.28-23.56)
- h. Obiapaka ena mikiri mue, ena wairatina, mai ena kara'au kupa. (24.1-53)

Luka Marere Ererena Eao Teofilo herenai.

1 ¹Obia haumu Teofilo e. Maearima bo'ona baiatamai ai taba tohakia terama haukia aba tererenakia, ²bahabanai mahakiai aka neiana teihana mai teiroro aina haukia tehina benamai ihobona. ³Au abo'umo popouna 'akinai ea'i ramana 'abikia ikoinai atabu harainakia. Ba naraonana enamo buonai au marere ha karerena oi 'eumu. ⁴Weiana ko'ioibi haraina taba teba'tiobini'o 'abikia hanona tohakia.

Aneru Sakaria Ehinabena Nahuna Ioane Kerama.

⁵Heroda Iuda eobia aina raninai robe hauna ha weia atana Sakaria, Abia ena itubu hauna, atawana Elisabeta hanona Arona ena rama babi'ena. ⁶Terarua hanona aka bero maearimakia Tirama wairanai, Obiapaka ena rauhuhu mai bairobe te'ima harainakia, ki'a ha a'i tebabaina. ⁷Iamo terarua hanona nahukia aha'i pokina Elisabeta hanona 'one'one haeamona terarua aba teanepaka.

⁸Sakaria ena itubu haukia ekia aka raninai, ia ehore robe akakia ebabai Tirama wairanai. ⁹Robe haukia ekia hoahoa tainai, pu'iai ia tea'i taeana 'eka robena ketoto muramura timina 'orimona kekinena. ¹⁰Ikinena ranina etaina, bahuba'ari haukia ikoikiai atapakai teto'una tibahuba'ari. ¹¹Obiapaka ena aneru ha herenai ewaira tina muramura timina 'orimona ikinena itarana abihanai itipana tainai ekoroti. ¹²Sakaria aneru eihana raninai nuana etae abomo eta'u ki'a baha. ¹³Iamo aneru ia ehina bena etibaha, “Sakaria e, a'i kota'u. Emu bahuba'ari 'uruna Tirama aba eona, oi atawamu Elisabeta hanona nahumu hau ha kebaramana, atana koaparina Ioane. ¹⁴Aomu hanona kenamo, mai koaonamo ki'a baha, mako abomo ena ramai kateonamo. ¹⁵Pokina Obiapaka wairanai ia hanona keapa'ua, bine 'ao muramura kirokia a'i keinu, abomo hinana nuanai a'i kerama baha aonai Auba Robeai kebonu. ¹⁶Ia kehore Isaraela maearimakia bo'ona 'akina kebaraona kabenakia Obiapaka ekia Tirama herena kateao. ¹⁷Ke'uai Obiapaka wairanai Elia ena aka mai ena hiabu ihobona, hama mai nahu aokia keba hamomonakia, mai aia o'o aha'i haukia bero haukia ekia aotipa taearanai kebaka'anakia, maearima keba'orunakia Obiapaka 'euna.”

¹⁸Sakaria aneru ebakaina etibaha, “Neiana hanona aea ka'ioibi harai aihona? Au hanona aba anepaka mai atawa'u abomo eanepaka.”

¹⁹Aneru ena 'abi ebamuena etibaha, “Au hanona Gabriel, Tirama wairanai nakoroti, euhuna'u pou namona neiana amaiaina heremu kaba'ioibini'o. ²⁰Bariu oi hanona maeamu keki'a a'i ko'abi'abi keaomo

taba neiakia ekia rama ranina ketaina. Pokina e'u 'abi rani weianai ketohana hauna a'i obotohana paunai.”

²¹Maearima hanona Sakaria te'ima 'arina abonamo aokia earo'ari pokina marea robe aonai rani homa'ana emiaho. ²²Ia ekarahi raninai 'abi kehinana hanona a'i etaina. Weiana te'lobina ia hanona marea robe aonai taba ha eihana. Hoahoa mo ebagai maearima eki'a a'i e'abi'abi. ²³Ena aka beraurana ebaorena hanona emue ena itu eao. ²⁴Murinai ia atawana Elisabeta epuma, nawa ima itu aonai mo emiaho. ²⁵E'abi etibaha, “Neiana hanona Obiapaka ena nuatae hoana here'uai, maearima baiatakiai e'u haumaea kea'i parena.”

Aneru Maria Ehinabena Iesu Kebaramana.

²⁶Elisabeta nawana 'abaihau aonai Tirama ehore aneru ha atana Gabriel euhuna Galilea aonai aiara ha atana Nasareta eao. ²⁷Uaho rari ha weia te'abi aina hau ha atana Iosepa keatawana Davida ena rama hauna, uaho weiana atana hanona Maria. ²⁸Aneru eao herena ehina bena etibaha, “Moanonamo. Oi hanona enuataeai apa'uani'o. Obiapaka hanona oi heremuai.” ²⁹'Abi weiana Maria aona ebaro'arina, mai eraonaraona banamo weiana anina hanona taba. ³⁰Ia aneru e'abi etibaha, “Maria e, a'i mota'u, Tirama ena nuatae aba oa'ina. ³¹Oi hanona kopuma, miori ha kobaramana, atana koaparina Iesu. ³²Ia hanona ketarahi mai kateaparina 'Ubi toha tohana Hauna Nahuna, Tirama Obiapaka kehore 'aba'abana Davida ena obia kebena. ³³Mai Iakobo ena itubu keobia aina keaomo banai banai, ena obia hanona a'i kepua.”

³⁴Maria aneru ebakaina etibaha, “Au hau ha a'i a'lobina. Neiana hanona aea kerama aiho?”

³⁵Aneru ehina bena etibaha, “Auba Robe keriri oi ahamuai, 'Ubi toha tohana Hauna ena hiabuai kebahu abuni'o, Robe Hauna kerama atana kateaparina Tirama Nahuna.

³⁶Oi hatia'amu Elisabeta te'abi ia hanona 'one'one, ia ena anepakai miori ha ea'ina, bariu nawana aba 'abaihau. ³⁷Tirama herenai hanona taba ha a'i epahihi.”

³⁸Maria e'abi etibaha, “Au hanona Obiapaka ena ta'ara'i babi'e'u. Emu 'abi ihobona here'uai merama.” Ba aneru Maria ehabona.

Maria Eao Elisabeta Herena.

³⁹Rani weianai Maria ea'i a'i harai mai enoanoa eao oeo aiarana ha Iudea puro'onai. ⁴⁰Sakaria ena ituai etoto Elisabeta ebanamona. ⁴¹Elisabeta Maria ena banamo 'uruna eona raninai nuana aonai miori eibiuibiu mai Auba Robe Elisabeta aona ebaonuna. ⁴²Weiana e'abi aota, “Babi'e ikoikiai baiatakiai oi hanona onamo ki'a baha, miori kobaramana hauna abomo enamo.

43 E'u namo hanona taba e'u Obiapaka hinana here'u emai!
 44 Berona 'akinai emu banamo 'uruna aona raninai miori nua'u
 aonai mai aonamona eibiu ibiu. 45 A'ikakauma babi'emu e, aba
 onamo pokina Obiapaka ena 'abi ehina heremuai haukia katemai
 katetoha.”

Maria Ena Aonamo Huina.

46 Maria e'abi etibaha,
 “Au ao'u Obiapaka nibanamona.
 47 Mai auba'u abomo e'u bamauri
 Tiramana niaonamo aina,
 48 pokina ena uraru mai ta'ara'i
 babi'e'u eraona tinana'u paunai.
 Bariu rani neianai keao
 uru ikoikiai namo'u katehinana,
 49 pokina hiabu Tiramana
 taba rarikia 'eu'uai ebabainakia.
 Ia atana hanona erobe,
 50 uru ha keao uru ha
 ena aoko'o hanona
 nibawaira tinana weiakia
 timariki aina haukia herekia.
 51 Ia imanai ena tabura ebakarahina,
 apa haukia ekia raona
 ekipu otarainakia.
 52 Ia ehore obia haukia taburakia
 ekia obia 'ekakiai ebaririnakia,
 mai uraru haukia ebakara'aunakia.
 53 Mare'a ti'ari haukia
 taba namokiai ebonu 'aunakia,
 ia kepu haukia euhunakia
 imakia 'abaeakia temue.
 54 Ena 'abi'uai eraona tinana
 ena ta'ara'i itubuna
 Isaraela haukia ebarainakia.
 55 'Aba'abaka herekiai
 ehinana hauna ena aoko'o
 ebawaira tinana Aberahamo
 mai kupuna 'aba'abana herekiai
 keaomo banai banai.”

56 Maria Elisabeta ohi temiaho nawa aihau 'abana ba emue eao ena
 aiara.

Elisabeta Nahuna Ioane Ebaramana.

⁵⁷Elisabeta ena mauri ranina etaina hanona nahuna hau ebaramana.
⁵⁸Herenai temiaho haukia mai hatia'ana pou teona, Obiapaka ena aoko'orarina 'akina herenai ebawaira tinana hanona kipokia teonamo haeamo.
⁵⁹Wapu iba'ababanina emai hanona ikoikiai temai miori itarena to'una, haeamona hamana Sakaria atana kateaparina. ⁶⁰Ia hinana etae etibaha, "Aha'i, ia atana kahaparina Ioane." ⁶¹Ikoikiai tehina bena tetibaha, "Hatia'amu ha atana uahomana aha'i." ⁶²Weiana mahakia tebairu hamana herenai miori ata tabana keaparina. ⁶³Weiana ia rererere piharana ebakai bakai aina, weia ahanai na erere aihona, "Atana hanona Ioane," raninai ikoikiai teta'uta'u huri. ⁶⁴Mawa'ei pinana ekaikauna, maeana ebero e'abi'abi mue, Tirama ebanamona. ⁶⁵Herekiai temiaho haukia ikoikiai teta'u ki'a, mai Iudea oeo aiarakia maikoinai pou neiana tehina otaraina. ⁶⁶Pou teona haukia aokiai teraona 'ini'inina tetibaha, "Miori neiana aea homanai keao." pokina Tirama imana hanona ia ahanai.

Sakaria Ena Mahabanai 'Abina.

⁶⁷Miori hamana Sakaria aona Auba Robe ebabonuna, ba Tirama ena 'abi ehinana etibaha,
⁶⁸"Obiapaka Isaraela ekia Tirama kahabanamona,
 pokina emai ena maearima
 aba ekawa muenaka.
⁶⁹Bamauri Pokina^a ebamikirina
 aika 'euka ena ta'ara'i hauna
 Davida ena itubuai.
⁷⁰Aba wa'i baha raninai
 ena 'abi mahabanai robekia
 pinakiai tehinana 'abana.
⁷¹Eka 'ou haukia mai
 'arika a'i ti'ari haukia ikoikiai
 imakiai kebamaurinaka.
⁷²Kupuka eaoko'o ainakia
 mai ena 'abi'uai robena
 eraona 'inina.
⁷³Kupuka Aberahamo herenai
 ena 'abi'uai ehinana:
⁷⁴Eka 'ou haukia imakiai

^a 1.69 'ao Bamauri Pihina.

kebamaurinaka,
a'i kahata'u ena aka kahababaina

75 robeai mai beroai ia wairanai
eka miaho ranikia ikoikiai.

76 “Haeamona naha'u e,
oi hanona kateaparini'o
'ubi toha tohanai hauna
ena mahabanai haumu.

Pokina oi ko'uai
Obiapaka wairanai ena taeara
koa'ia'i haraina,

77 ena maearima bamauri aoberona
koba'ioibinakia
ekia ki'a ihina haonai keao.

78 Aika eka Tirama ena aoko'o paunai.
Beraura nitae eana kupai
keriri kemai hereka,

79 'ari aiaianai mai wapurai temiaho
haukia ahakiai kerara, weiana
aeka kebaka'anakia baibua
taearanai kebaka totonakia.”

80 Miori hauaniai eapa'ua mai aubai etabura. Ia hano'akunai emiaho
eaomo ekarahi Isaraela mako herekiai.

Iesu Erama.
(Mt 1.18-25)

2 ¹Rani weiana aonai Augusto obia 'arana rauhuhu 'abina ha euhuna
eao Roma ena iha'ini hanopakana maikoinai ata katerere. ²Neiana
hanona ata rere kori'uaina Kurene Suria hanopakana eiha 'inina raninai.
³Weiana maearima ikoikiai atakia katebaibeni paunai temue ikau ena
aiara teao. ⁴Iosepa abomo Nasareta Galilea hanonai emikiri eao Davida
ena Aiara Betelehema Iudea ai, pokina ia hanona Davida ena itubu mai
ena rama hauna. ⁵Atakia katebaibeni paunai ia te'abi aina babi'ena
Maria ohi teao, Maria hanona mai nuana. ⁶Terarua weia temiaho
aonai kemaui ranina etaina. ⁷Weiana emauri nuahobo miorina hau
ebaramana, habunia tebaro'a abuna poromakau ekia aniani ahiahinai
tebaeno utana, pokina 'ima'ima itunai 'eka aha'i.

Aneru Mamoe 'Ima Haukia Tehina benakia.

⁸Hano weiana hamona aonai mamoe 'ima haukia baika tubuai rabi
aonai ekia mamoe te'imanakia. ⁹Obiapaka ena aneru ha herekiai ewaira
tina, Obiapaka nuabinai ebaea obonakia raninai teta'u wairai. ¹⁰Aneru ia

ehina benakia etibaha, “A’i tomota’u. Au pou namona amaiaina weiana maearima ikoikiai aokia kebaonamonakia. ¹¹ Bariu rani neianai Davida ena aiarai emi Bamauri hauna ha erama, ia hanona Keriso^b Obiapaka. ¹² Hoana hanona nahomana, miori 'oru'oruna ha katotabu ahina, habuniai tero'a abuna poromakau ekia aniani ahiahinai tebaeno utana.”

¹³ Mawa'eai kupai aneru to'una tewaira tina aneru weiana herenai, Tirama tebanamona tetibaha,

¹⁴ “Kupa 'ubi toha tohanai
nuabi hanona Tirama 'euna,
hanopakai ena baibua hanona
niaonamo ainakia haukia herekiai.”

Mamoe 'Ima Haukia Teao Miori Kateihana.

¹⁵ Aneru to'una ia herekiai tekaobo temue kupa raninai mamoe 'ima haukia kipokia te'abi'abi tetibaha, “Aika hamaeao Betelehema, Obiapaka eba'jobinaka taba weiana erama hauna kahaihana.” ¹⁶ Tenoanoa teao Maria Iosepa mai miori 'oru'oruna poromakau ekia aniani ahiahinai enouta tetabu ahinakia. ¹⁷ Weiana teihana raninai aneru miori robana eahuna 'abina maearima teba 'jobinakia, ¹⁸ mamoe 'ima haukia pou weiana tehinana raninai aia teona haukia ikoikia teta'u ta'u huri. ¹⁹ Maria hanona 'abi weiakia ikoikiai aonai eraona 'ininakia mai eraona raona ainakia. ²⁰ Mamoe 'ima haukia temue Tirama tekuti aina mai teapaina pokina taba weiakia 'urukia teo'o mai teiha haukia ikoikiai ia ehina benakia ihobona tohanai terama.

Miori Atana Iesu Teaparina.

²¹ Wapu iba'ababaninai ena itare ranina etaina hanona atana teaparina Iesu, aneru ata ebena hinana nuanai a'i erama baha aonai.

Simeona Mai Ana Marea Robe Aonai Iesu Tera'una.

²² Mose ena rauhuhu ihobona ena kopa kopa ahu ranina eore murinai miori teaoaina Ierusalem Obiapaka wairanai katebawaira tinana. ²³ Obiapaka ena rauhuhuai tererena ihobona, “Hobohobo miorikia hau ikoikiai hanona katebaibeni Obiapaka 'euna.” ²⁴ Obiapaka ena rauhuhu e'abi ihobona barobe tabakia katebaibeni mumu rua 'ao rauria nahu rua.

²⁵ Weia Ierusalem mai hau ha atana Simeona ia hanona bero hauna haeamona Tirama nimariki aina. Isaraela ena bamauri hauna ne'imana, aona Auba Robe ebonu. ²⁶ Auba Robe ia ehina bena ia a'i ke'ari keaomo Obiapaka ena Keriso keiha 'uaina. ²⁷ Auba Robe ia ebakatotona Marea Robe aonai. Maria Iosepa ohi Iesu teaoaina Marea rauhuhu ena hoahoa

^b 2.11 'ao *Mesia*.

katebabaina paunai. ²⁸Simeona imanai miori era'una Tirama ebanamona etibaha,

²⁹“Obiapaka e, emu 'abi'uai ihobona
emu ta'ara'i hauna bariu
mai baibuana aba nuhabona.

³⁰Pokina maha'u ai
emu Bamauri Pokina aba aihana,

³¹weiana oi aba oba'oruna
maearima ikoikiai wairakiai.

³²Eana neiana hanona
rama haeai haukia ibaeakia
abomo oi emu maearima
Isaraela ibanuabikia.”

³³Miori hamana hinana 'abi weiakia teo'o hanona tetu'u ta'u huri.

³⁴Simeona ehore terarua eba namonakia haemona hinana Maria ehina bena etibaha, “Miori neiana hanona e'oru Isaraela haukia bo'ona iba'ehokiai mai ibamikirikiai keao, abomo ena hoahoai kate'oatana, ³⁵maearima bo'ona ekia raona bunikia kabakarahinakia. Mai kareba itatona 'abana kehore oi aomu abomo kebakaiarana.”

³⁶Weia hanona mahabanai babi'ena ha atana Ana, Panuela nahuna ena itubu hanona Asere, aba eanepaka, ena hawainibe ihauna 'abaihau hamomo atawana ohi temiaho, ³⁷ba ewapu emiaho bariu ihauna imabui harau aihau bani (84). Ia marea robe a'i ehabo 'apuana Tirama ekuti aina rabi mai mararani eanrobe mai ebahuba'ari. ³⁸Rani weiana hamona aonai Ana emai marea aonai Tirama ebanamona ba maearima ikoikiai Ierusalem kebamaurina hauna te'imana haukia herekiai miori pouna ehinana.

Iesu Nasaretai Eapa'ua.

³⁹Iosepa mai Maria ohi Obiapaka ena rauhuhu e'abi ihobonai aka ikoikiai tebaorenakia raninai temue Galilea ekia aiara tohana Nasareta teao. ⁴⁰Miori eapa'ua mai etabura; aoberoai ebonu, Tirama ena baraibarai ia ahanai emiaho.

Miori Iesu Marea Robe Aonai.

⁴¹Ihau ikoinai hamana mai hinana Ierusalem teao kabanai tatuna paunai. ⁴²Iesu ihauna harau haea rua raninai, teaihau teao Ierusalem ekia tatu hoahoana taina. ⁴³Tatu eore murinai hamana mai hinana temue 'a miori Iesu hanona Ierusalem emiaho, hamana mai hinana a'i te'iohina. ⁴⁴Teraonana ia hanona baiatakiai, wapu hamona teka'aina murinai tetabu ramana 'abana mai hatia'a herekiai. ⁴⁵A'i tetabu ahina paunai temue teao Ierusalem weia katetabuna. ⁴⁶Wapu aihau teao

murinai marea robe aonai tetabu ahina bamarere haukia baiatakiai emiati aia ebahuai mai ebakainakia. ⁴⁷Ena 'iobi mai 'abi bamueai aiana teona haukia ikoikiai teta'u ta'u huri. ⁴⁸Hamana mai hinana teihana raninai teta'u ta'u huri. Weiana hinana ia ehina bena etibaha, “Naha'u e, taba buonai nahomana heremaiai obabaina? Au hamamu ohi aomai maihaina tatabu 'arini'o.” ⁴⁹Iesu ehina benakia etibaha, “Taba buonai wai au tutabuna'u? A'i to'lobina au hanona hama'u ena itu aonai namiaho, u?” ⁵⁰A ia ena 'abi ehinana hauna obona a'i teobo.

⁵¹Eriki kipokia teao Nasareta, weia aiakia eka'ai haraina, 'a hinana hanona taba weiakia terama ikoikiai aonai eraona 'ininakia. ⁵²Iesu eapa'ua hauaniai mai aoberoi, abomo Tirama mai maearima ia tenuatae aina.

Ioane Ba'uere Robe Hauna Eiroro.

(Mt 3.1-12; Mk 1.1-8; Io 1.19-28)

3 ¹Tiberio obia 'arana Roma hanopakana eobia aina ihauna harauhaea ima aonai Pontio Pilato hanona Iudea ekia Kabana. Heroda hanona Galilea eobia aina, abomo hatina Pilipo hanona Iturea mai Trakonito eobia ainakia, Lusania hanona Abilene aiarakia eobia ainakia. ²Robe haukia arakiai haukia Ana mai Kaiafa ekia raniai, Tirama ena 'abi emai Sakaria nahuna Ioane herena hano'akunai. ³Ioane eao Ioridana ate haiana hanokia ikoikiai aokiai raona kabe 'uere robena eiroro aina ekia ki'a ihina hao paunai. ⁴Isaia mahabanai hauna ena pukai ererena 'abana:

“Aia ha hano'akunai neio netibaha,
‘Obiapaka ena taeara
tomoa'i a'i haraina,
ena ka'a 'ekana tomobaberona.

⁵Tataira ikoikiai
katepupu abunakia,
kobio mai oeo ikoikiai
katebaririnakia.
Taeara tebeho haukia katebero,
mai tehiroa hiroa haukia
kateta'eta'e.

⁶Weiana maearima ikoikiai
Tirama ena bamauri kateihana.’ ”

Isa 40.3-5

⁷Mako tekarahi temai Ioane herena keba'uere robenakia, eiroro benakia etibaha, “Erau nahukia e, tai ehina benimi opuere nimai hauna herenai katobea pare? ⁸Raona kabe aonai katomiaho buabuami katerama, ia a'i kato'abi 'Aberahamo hanona aika 'aba'abaka.' A'i katoraanana aba katonamo. Pokina au wai nahina benimi, Tirama mai

ena hiabu pihara neiakiai Aberahamo nahuna kebaramanakia. ⁹Wapira hanona aba e'oru matiu pokinai, matiu ikoikiai buabuakia namokia a'i tibaramanakia haukia hanona kate'uinakia, irubai katekapo 'aunakia.”

¹⁰Ba to'u haukia ia tebakaina tetibaha, “Ba ai taba katababaina?”

¹¹Ioane e'abi etibaha, “Mai ena ibatoto rua hauna 'abana weiana herena aha'i hauna ha kebena, mai ena aniani hauna abomo ua kebabai aiho.”

¹²Moni bararo haukia abomo temai keba'uere robenakia tebakai bakai tetibaha, “Ba'ioibi haumu e, ai taba katababaina?” ¹³Ioane ehina benakia etibaha, “Moni koa'ina raninai ihobonai mo koa'ina, a'i koa'i banaina.”

¹⁴Huari haukia baika abomo tebakai bakai tetibaha, “Ai hanona taba katababaina?” Ioane ehina benakia etibaha, “Aiahuai 'ao 'abi bai'oikiai maearima a'i kato'oinakia ekia moni a'i katoa'i. Aomi namonai arami tohana mo katoa'ina.”

¹⁵Maearima hanona tebai'ima paunai aokia teraona raona Ioane hanona pa'e Keriso. ¹⁶Ioane ikoikiai ehina benakia etibaha, “Au hanona beiai wai naba'uere robenimi, 'a muri'uai nimai hauna ena hiabu au eu'u etara haona, ena tamaka warokia karubunakia abomo here'uai a'i etaina. Ia hanona Auba Robe mai iruba ai keba'uere robenimi. ¹⁷Ena ikomo matiuna hanona imanai, witi ahu 'iti'iti 'ekana kea'ia'i haraina, weiana witi uhokia kebararonakia paraboai kero'anakia, 'a hamarakia hanona a'i ni'ao 'apua irubana'i kehuhunakia.”

¹⁸Ioane bairobe 'abikiai bo'okiai maearima ehina benakia mai pou namona eiroro aina herekiai.

Heroda Ioane Wapura Itunai Ekaiabuna.

¹⁹Ioane ehore Heroda obia apa'uana erikena, pokina ia hatina atawana Herodia eatawana mai aka ki'a obokia bo'okia eabai paunai. ²⁰Heroda ena ki'a weiakia ikoikiai ahakiai ki'a mo ha eabai muena, Ioane wapura 'ekana'i ekaiabuna.

Ioane Iesu Eba'uere Robena.

(Mt 3.13-17; Mk 1.9-11)

²¹Maearima ikoikiai eba'uere robenakia raninai, Iesu abomo eba'uere robeni. Iesu ena bahuba'ari aonai kupa ekaikau. ²²Weiana Auba Robe rauria hauanina ihobonai eriri ia ahanai. Aia ha kupai emai e'abi etibaha, “Oi hanona Au Naha'u. E'u Raona'au, naonamo aini'o.”

Iesu Ena Rama Kuputorina.

(Mt 1.1-17)

²³Iesu ihauna harau aihau hanona ena aka ea'i ramana. Maearima teraonana ia hanona Iosepa nahuna.

Iosepa hamana hanona Heli,

- 24 hamana Matata, hamana Lebi,
hamana Meleki, hamana Ianai,
hamana Iosepa,
- 25 hamana Matatia, hamana Amosa,
hamana Nauma, hamana Eseli,
hamana Nagai,
- 26 hamana Mata, hamana Matatia,
hamana Semeina, hamana Ioseka,
hamana Ioda,
- 27 hamana Ioanana, hamana Resa,
hamana Sorobabela, hamana
Salatiele, hamana Neri,
- 28 hamana Meleki, hamana Adi,
hamana Kosama, hamana
Elamadama, hamana Ere,
- 29 hamana Iosua, hamana Eliesere,
hamana Iorima, hamana Matata,
hamana Lebi,
- 30 hamana Simeona, hamana Iuda,
hamana Iosepa, hamana Ionama,
hamana Eliakima,
- 31 hamana Melea, hamana Mena,
hamana Matata, hamana Natana,
hamana Davida,
- 32 hamana Iese, hamana Obeda,
hamana Boa, hamana Salamone,
hamana Nasona,
- 33 hamana Aminadab, hamana Admina,
hamana Areni, hamana Hesarona,
hamana Pare, hamana Iuda,
- 34 hamana Iakobo, hamana Isako,
hamana Aberahamo, hamana Tera,
hamana Nahoro,
- 35 hamana Seruka, hamana Reu,
hamana Peleka, hamana Ebere,
hamana Sala,
- 36 hamana Kainana, hamana Apasada,
hamana Sema, hamana Noa,
hamana Lameka,
- 37 hamana Metusala, hamana Enoka,
hamana Iareta, hamana Mahalale,
hamana Kainana,

³⁸ hamana Eno, hamana Seta,
hamana Adamu,
hamana Tirama.

Satani Iesu Ehobona.

(Mt 4.1-11; Mk 1.12, 13)

4 ¹Iesu Ioridana atenai emue emai aona Auba Robe ai ebonu weiana Auba ehore ebaka'ana hano'akuna eaoaina, ²wapu bariabui weia tiaporo ehore ehobona.

Rani weiakiai aniani ha a'i eani 'apuana, puanai ia mare'a e'ari. ³Tiaporo ehore ia ehina bena etibaha, "Peoi Tirama Nahuna raninai pihara neiakia pohina benakia pohamai pateao." ⁴Iesu ia ehina bena etibaha, "Aba tererena, 'maearima hanona pohamai mo a'i kemaui.' "

⁵Tiaporo ehore Iesu ebakara'auna eao hano oeonai rani papana hanopaka aiarakia ikoikiai ebaihana. ⁶Tiaporo ia ehina bena etibaha, "Au kahore hiabu mai nuabi neiakia maikoinai kabeni'o, pokina ikoikiai au ima'u ai eutana, haeamona tai nanuatae aina hauna kabena. ⁷Weiana oi au kokuti aina'u hanona ikoinai 'eumu." ⁸Iesu ena 'abi ebamuena etibaha, "Aba tererena, 'Obiapaka oi emu Tirama kokuti aina, iamo kipona ta'arana koa'i.' "

⁹Haeamona ebaka'ana eaoaina Ierusalem marea robe kaipanai ebakori 'auna, ehina bena etibaha, "Peoi Tirama Nahuna hanona neia kipomu morobo ahi. ¹⁰Pokina aba tererena, 'ia ena aneru kehina benakia kate'imani'o.

¹¹ Abomo ia imakiai katea'i taeani'o, aemu piharai a'i mokaina ta'una.' "

Sal 91.11, 12

¹²Iesu ia ehina bena etibaha, "Aba tererena, 'Obiapaka emu Tirama baihobo 'ekanai a'i kohorotina.' "

¹³Tiaporo ena baihobo ikoinai ebaorenakia hanona ia herenai ekapare keaomo rani namona ha kemai.

Iesu Ena Aka Ea'iramana Galileai.

(Mt 4.12-17; Mk 1.14, 15)

¹⁴Iesu Auba Robe ena hiabuai emue eao Galilea weia pouna tehina otaraina hano weiana aiarakia ikoikiai aokiai. ¹⁵Iuda haukia ekia marea aokiai eba'io binakia, ikoikiai tebanamona.

Nasareta Haukia Iesu Tebaki'ana.

(Mt 13.53-58; Mk 6.1-6)

¹⁶Iesu ena apa'ua aiarana Nasareta eao, ena hoa hoa taina Beraura Robenai Iuda haukia ekia marea aonai etoto, ekoroti Puka ketuabina.

17Isaia Mahabanai hauna ena puka tebena, weiana puka ekaikauna, na terere aihona 'ekana etabu ahina etuabina etibaha,

18 “Obiapaka Aubana
hanona au aha'uai,
pokina ebatohana'u
pou namona kairoro aina
uraru haukia herekiai.
Euhuna'u kairoro
tebirinakia haukia irubukia
mai maha ki'a haukia kateiha mue,
atetua aonai temiaho haukia
kabakarahinakia,

19 Obiapaka ena maearima
kebamaurinakia
ihauna aba etaina pouna
kairoro aina.”

Isa 61.1, 2

20 Iesu puka ekaiabuna i'imana hauna ebena ba emiati, marea aonai haukia ikoikiai mahakia ia teiha 'ini'inina.

21 Weiana ia ehinabe ramanakia etibaha, “'Abi tona Puka Robenai hauna bariu rani neianai aba etohana.” 22 'Abi namokia pinanai ehinanakia paunai ikoikiai ia tebanamona haeamona teta'u ta'u huri tebakai bakai tetibaha, “Neiana hanona Iosepa nahuna, u?”

23 Iesu ia ehina benakia etibaha, “'Abi tohana wai 'abi ibabatai ha katohinana here'u ai, 'Toketa haumu e, kipomu mobamaurini'o.' abomo katohina bena'u katotibaha, 'Taba taba weia Kaperanauma ai obabai urukia tao'o haukia, neia emu aiara tohanai abomo kobabainakia.’” 24 Ia etibaha, “'Abi tohana au wai nahina benimi, mahabanai hauna ena aiara tohanai hanona a'i katea'i taeana. 25 'Abi tohana au wai nahina benimi, Elia ena raniai wapu babi'ekia bo'okia Isaraelai temiaho, kupa ekaiabuna abara a'i etibo ihau aihau mai nawa 'abaihau arobo rarina 'akina erama hano maikoina. 26 Ba Elia a'i euhuna weiakia ha herena a'i eao, 'a eao Sarepata aiarana Sidono hanonai wapu babi'ena ha herena. 27 Abomo mahabanai hauna Elisa ia ena raniai Isaraela aonai weia hanona morumoru haukia bo'okia, ha aha'i enamo, 'a Suria hauna Namana ikupaiana mo enamo.”

28 Marea aonai maearima ikoikiai 'abi weiakia teo'o raninai teopuere wairai. 29 Temikiri aiarai tetori ahina tebaka'ana teaoaina teaiara oeona ahanai papa'ai katekapo ahina. 30 Ia hanona to'u baiatakia tohanai ekaobo.

Iesu Hau Ha Aonai Auba Ki'a Obona Eu'u Ahina.

(Mk 1.21-28)

31 Eriro eao Galilea aiarana ha Kaperanauma Beraura Robeai maearima eba'iobi ramanakia. 32 Ena ba'iobi 'abikiai teta'u ta'u huri pokina ena 'abi hanona mai hiabuna.

³³Hau ha aonai auba ki'a obona etoto hauna weia marea aonai eio aota ki'a, ³⁴etibaha, "Ai, Iesu Nasareta hauna e, taba heremaiai kobabaina? Omai hanona ai koahu 'arinamai? Au a'jobina oi hanona Tirama ena Robe hauna."

³⁵Iesu ia ebatana etibaha, "Uri'urimu. Ia aonai mokarahi." Ikoikiai wairakiai auba ki'a obona hau weiana eba'eho ki'ana ba ekarahi, a'i ebamani'ana. ³⁶Maearima ikoinai teta'u ta'u huri, tebaihinabe aina tetibaha, "Neiana hanona ba'ioi tabana? Mai hiabuna haemona mai taburana auba ki'a obokia nehina benakia hanona tikarahi." ³⁷Hano weiana maikoinai Iesu pouna tehina otaraina.

Iesu Simona Rawana Babi'ena Ena Inawa Ebanamona.

(Mt 8.14-17; Mk 1.29-34)

³⁸Iesu marea ehabona eao Simona ena itu. Simona rawana babi'ena hau hiabu inawana ea'ina, Iesu tenoina kebaraina. ³⁹Weiana ia babi'e herenai ekoroti hau hiabu inawana erikena, ba inawa epua, beronai babi'e emikiri ta'araka ea'i.

Iesu Inawa Haeai Haeai Ebanamonakia.

⁴⁰Beraura kaihu niaoina aonai maearima ikoikiai herekiai inawa haeai haeai haukia temai ainakia Iesu herena, imana ha ha ahakiai ehao'au ebamaurinakia. ⁴¹Auba ki'a obokia maearima bo'okia abomo aokiai tekarahi teio tetibaha, "Oi hanona Keriso Tirama Nahuna." Iesu erikenakia eharabunakia a'i kate'abi pokina te'jobina ia hanona Keriso.

Iesu Iudea Mareakia Aokiai Eiroro.

(Mk 1.35-39)

⁴²Rani nirerena aonai Iesu ekarahi 'eka 'okona ha eao. Mako ia itabuna teao, tetabu ahina raninai tehina bena herekiai a'i pekaobo. ⁴³A Iesu ehina benakia etibaha, "Au hanona Tirama ena obia aiarana pouna kairoro aina aiara haeai haeai herekiai pokina weiana paunai euhuna'u." ⁴⁴Ba Iudea mareakia aokiai eiroro.

Iesu I'abana Haukia Bani Eeparinakia.

(Mt 4.18-22; Mk 1.16-20)

5 ¹Rani ha Iesu Genesareta obu haianai ekoroti hanona mako tekori kakaiarona Tirama ena 'abi aiana kateona. ²Ia ahi rua obu haianai tetai'au eihanakia, ba'eha haukia tehabonakia poeai ekia re'e teutunakia. ³Iesu Simona ena ahiai ehe'au, ehina bena papana kekai ahi 'apuana, ia ahi ai emiati ba mako eba'ioinakia.

⁴Iesu ena 'abi eore murinai ia Simona ehina bena, "Oura hamaeao, re'e kohorenakia maia kobarewa." ⁵Simona ena 'abi ebamuena etibaha,

“Poki haumu e, ai rabi maikoina taro 'ari rani taba ha a'i ta'ina, 'a emu 'abi paunai re'e kabaririnakia.” ⁶Weiana tebabaina hanona maia bo'ona 'akina tebarewanakia, ekia re'e herekai mo patetapa. ⁷'Abakia baika ahi ha ai haukia tebakonakia katemai katebarainakia, ba temai ahikia rua tebabonunakia herekai mo pateuhu. ⁸Simona Petero hoa weiana eihana raninai Iesu aena pokinai ekai pehu e'abi etibaha, “Obiapaka e, au hanona ki'a hau'u, here'u ai a'i komiaho.” ⁹Ia mai 'abana kipokia teta'u ta'u huri pokina maia uahomana bo'ona 'akina tebarewanakia buonai, ¹⁰Simona kipokia teba'eha oi oi haukia Sebedeo nahuna Iakobo mai Ioane abokiamo teta'u ta'u huri. 'A Iesu Simona ehina bena etibaha, “A'i kota'u. Bariu keaomo waira ranikiai oi hanona maearima koba'eha benakia.” ¹¹Ekia ahi teberi 'aunakia poeai, taba ikoinai tehabonakia Iesu murinai teka'a.

Iesu Morumoru Hauna Ebanamona.

(Mt 8.1-4; Mk 1.40-45)

¹²Iesu emiaho aiara ha aonai hau ha hauna maikoinai emorumoru, ba Iesu eihana raninai e'eho aena pokinai e'umuti enoina e'abi etibaha, “Obiapaka e, ponuatae raninai pobanamona'u.” ¹³Iesu imana etiu ahina ea'i 'apuana, ehina bena etibaha, “Nanuatae, monamo.” Beronai morumoru hau weiana ehabona. ¹⁴Ia eharabuna etibaha, “Hau ha haianai a'i ko'abi, ia koao robe hauna herenai keihani'o, mai banamo baibenina Mose e'abi ihobona tabana kobaibeni, ba maearima katebatohana oi aba onamo.” ¹⁵Ia pouna tehina otaraina mai to'u rarikia temai tebararona aiana kateona ekia inawa kebanamonakia. ¹⁶'A Iesu ekaobo hano 'abaeana ha eao ebahuba'ari.

Iesu Mero Hauna Ebanamona.

(Mt 9.1-8; Mk 2.1-12)

¹⁷Rani ha Iesu eba'iohi aonai Parisea haukia mai rauhuhu poki haukia baika weia temiati, ia hanona Galilea aiara ikoikiai, Iudea mai Ieruselema aokiai temai. Obiapaka hiabuna hanona Iesu ahanai inawa haukia ebanamonakia. ¹⁸Maearima baika mero hauna ha toto'eai tebuana teaoaina taearana tetabu katetoto aina Iesu wairanai katehorotina. ¹⁹Katetoto aina aonai taeara ha a'i tetabu ahina pokina to'u rarina buonai, ba tekara'au aina teao itu kapenai, kapehene teu kauna mai toto'ena tebaririna Iesu wairanai mako baiatakiai. ²⁰Iesu ekia a'ikakauma eihana raninai e'abi etibaha, “E'u hau e, emu ki'a aba ihina hao.” ²¹Rauhuhu poki haukia mai Parisea haukia aokiai teraonaraona tetibaha, “Neiana hanona hau tabana Tirama nia'i ki'ana? Tai ki'a kehina hao, Tirama mo kipona.” ²²'A Iesu ekia raona e'iohina paunai ehina benakia etibaha, “Taba buonai raona nahomakia aomia turaonanakia? ²³Aeana hauna e'ama'ama kahaihana, emu ki'a aba ihina hao 'ao momikiri moka'a. ²⁴Ia wai

kato'iohiba Maearima Nahuna hanopakai mai hiabuna ki'a kehina hao." Ia mero hauna ehina bena etibaha, "Au oi nahina beni'o, momikiri emu toto'e moal'ina moao emu itu." ²⁵Beronai mo wairakiai emikiri ena toto'e ea'i taeana eao ena itu Tirama ebanamona. ²⁶Ikoikiai tetu'u ta'u huri mai Tirama tebanamona, mai ta'ukia te'abi tetibaha, "Bariu taba neiana haeai tohana haihana."

Iesu Lebi Ena Aka 'Ekanai Eaparina.

(Mt 9.9-13; Mk 2.13-17)

²⁷Weiana murinai Iesu ekarahi eao moni bararo hauna ha atana Lebi moni a'i 'ekanai emiati eihana, eaparina etibaha, "Muri'uai omai." ²⁸Lebi emikiri taba ikoikiai ehabonakia Iesu murinai eka'a.

²⁹Lebi ena ituai Iesu kero'ona anianina ha ebabaina, weia moni a'i haukia bo'okia mai maearima haeai baika kipokia temiati teaniani haeamo. ³⁰Parisea haukia mai rauhuhu poki haukia tehore i'abana haukia herekiai te'abi hara tae tetibaha, "Taba buonai moni a'i haukia mai ki'a haukia kipokia tuaniani mai toinu inu haeamo?" ³¹Iesu ekia 'abi ebamuena etibaha, "A'i teinawa haukia hanona toketa hauna a'i titabuna, ia inawa haukia mo toketa hauna titabuna. ³²Au amai hanona bero haukia a'i kaparinakia, ia ki'a haukia kateraona kabe paunai amai."

Ani Robe Bakai bakaina.

(Mt 9.14-17; Mk 2.18-22)

³³Ia Iesu tehina bena tetibaha, "Ioane i'abana haukia rani bo'okia tiani robe mai tibahuba'ari, Parisea i'abakia haukia abomo ihobona tibabaina, ia oi i'abamu haukia tianiani mai teinuinu." ³⁴Iesu ehina benakia etibaha, "Wai turaonana hawainibe mahamaha hauna ena baki haukia kipokia temiaho oioi aonai kateani robe hanona ketaina, u?" ³⁵A rani kemai aonai hawainibe mahamaha hauna herekiai kate'i parena, rani weiakiai ia hanona kateani robe."

³⁶Ia 'abi ibabataiai ehina benakia, "Hau ha habuni maha mahana puana a'i ketapa obona habuni 'ai'aina maranai a'i kehuri abuna pokina habuni mahamahana ketapa obona raninai habuni 'ai'aina mai habuni mahamahana ohi hanona ihakia a'i kateihobo. ³⁷Hau ha bine beina mahamahana aparau 'ai'ainai a'i kebaharuna, weiana kebabaina raninai bine beina mahamahana kekupu aparau 'ai'aina kebua pa'ana haeamona kekiki oioi mai 'aparau keki'a. ³⁸A bine beina mahamahana hanona aparau mahamahana kebaharuna, ba terarua katenamo. ³⁹Hau ha bine beina 'ai'aina keinu murinai bine beina mahamahana a'i kenuatae aina pokina ke'abi bine 'ai'aina hanona enamo."

Beraura Robe Obiana.

(Mt 12.1-8; Mk 2.23-28)

6 ¹Beraura robenai Iesu mai i'abana haukia kipokia witi umana ha aonai tekabanai, i'abana haukia witi buakia te'ini hurinakia imakia

aokiai temutunakia teani. ²Parisea haukia baika te'abi tetibaha, “Wai taba buonai Beraura Robenai a'i katobabaina akana tubabaina?” ³Iesu ekia 'abi ebamuena etibaha, “Wai pa'e Davida orina a'i totuabi 'apuana. Ia mai 'abana kipokia mare'a te'ari raninai taba eabaina?” ⁴Ia Tirama ena ituai etoto tebarobena parawakia robe haukia ikupaikia mo kateani haukia ea'inakia eani mai i'abana haukia ebenakia.” ⁵Haeamona ehina benakia etibaha, “Maearima Nahuna hanona Beraura Robe obiana.”

Iesu Hau Ha Imana Kobekobena Ebanamona.

(Mt 12.9-14; Mk 3.1-6)

⁶Beraura robe haeai ha ai Iesu Iuda haukia ekia mareai etoto eba'iohi. Hau ha weia imana itipana hanona ekobe kobe. ⁷Rauhuhu poki haukia mai Parisea haukia ia te'itimana Beraura Robeai kebamauri 'ao, Iesu beho 'ekanai katehorotina taearana tetabu. ⁸'A Iesu ekia raona e'iohina, weiana ima kobe kobe hauna ehina bena etibaha, “Momikiri baiatakiai mokoroti.” Ba emikiri ekoroti. ⁹Iesu ehina benakia etibaha, “Au wai nabakainimi, aeana hauna ebero Beraura Robeai kahabanamo 'ao kahabaki'a, kahabamauri 'ao kahaba'ari?” ¹⁰Iesu ikoikiai eiha kakaiaronakia murinai ima kobe hauna ehina bena etibaha, “Imamu motiu berona.” Ia eabaina hanona imana ebero mue. ¹¹'A ia hanona aokia teopuere ki'a, kipokia teroba ahu Iesu herenai taba katebabaina.

Iesu Iuhubeau Haukia Harauhaea Rua Etina'anakia.

(Mt 10.1-4; Mk 3.13-19)

¹²Rani weianai Iesu oeoai ekara'au kehabuha'ari, rabi maikoina ehabuha'ari Tirama herenai. ¹³Aba rani nimaiaina aonai ia i'abana haukia eaparinakia temai, baiatakiai harau haea rua ea'i taeanakia ata ebenakia iuhubeau haukia. ¹⁴Ia hanona Simona atana eaparina Petero mai hatina Anderea ohi, Iakobo mai Ioane ohi, Pilipo mai Batolomeo ohi, ¹⁵Mataio, Toma, Alepeo nahuna Iakobo, mai Simona teaparina Selote hauna ohi, ¹⁶Iakobo nahuna Iuda mai Isakariote hauna Iuda ia hinahinana kehina hauna.

Iesu Mako Eiroro aina Mai Inawa Haukia Ebanamonakia.

(Mt 4.23-25)

¹⁷Iesu i'abana haukia kipokia oeoai teriri hano beronai tekoroti. I'abana haukia to'una rarina weia mai maearima bo'ona 'akina Iudea hanona 'ekakia ikoikiai Ierusalema ai Turo mai Sidono poe hanokia ikoikiai temai, ¹⁸aiana kateona mai ekia inawa katenamo. Auba ki'a obokia tebaro 'arinakia haukia abomo temai ebanamonakia. ¹⁹To'u maikoina tebahobona kate'a i'apuana pokina hiabu ia aonai ekarahi ikoikiai ebamaurinakia.

Maearima Tabakia Haukia Tenamo.

(Mt 5.1-12)

20 Iesu i'abana haukia eihanakia ena 'abi ea'i ramana etibaha,

“Wai touraru haumi tonamo,
pokina Tirama ena obia aiarana
hanona wai 'eumi.

21 Wai bariu tumare'a haumi tonamo,

pokina wai hanona
nuami katebonu.
Wai bariu tuhai haumi tonamo,
pokina wai katoiriri.

22 Maearima Nahuna paunai

maearima ti'oatanimi,
hoami tihorena,
ti'abi ki'a heremiai,
atami tia'i ki'anakia raninai
wai hanona tonamo.

23 Rani weianai aomi katenamo katorobo katoaonamo wairai, pokina
kupati arami rarina 'akina. Weiana ihobona tohanai 'aba'abakia ua
tebabai aiho mahabanai haukia herekiai.

24 “A bariu tuobia haumi heremiai

hanona keki'a ki'a baha,
pokina emi namo maikoinai aba toa'ina.

25 Bariu tuani 'ari haumi heremiai

hanona keki'a ki'a baha,
pokina wai katomare'a.
Bariu toiriri haumi heremiai
hanona keki'a ki'a baha,
pokina aomi katehaiara
mai katohai.

26 Maearima ikoikiai atami

tibanamona raninai heremiai
hanona keki'a ki'a baha,
pokina 'aba'abakia babai ihobona
tohana tebabaina mahabanai
bai'oi haukia herekiai.

Emi 'Ou Haukia Katoraona'au Ainakia.

(Mt 5.38-48; 7.12a)

27 “Iamo aia'u tuona haumi nahina benimi. Emi 'ou haukia
katoraona'au ainakia, weiakia 'arimi a'i ti'ari haukia herekiai katobabai

harai. ²⁸Weiakia teururu heremiai haukia katoba namonakia, tibabai ki'a heremiai haukia ahakiai katobahuba'ari. ²⁹Hau ha mekemu kebo'ana raninai, koke'e banai abirana abomo kobena. Mai hau ha emu kota kea'i parena raninai, emu habuni ibatoto a'i koubo aina. ³⁰Maearima heremuai taba tinoiai haukia kobenakia, mai hau ha emu taba ha ea'ina rea imue aina robana a'i koahuna. ³¹Wai emi nuatae maearima ua patebabai aihō heremiai, wai abomo ua katobabai aihō maearima herekiai.

³²“Weiakia tiraona'au ainimi haukia mo katoraona'au ainakia hanona ena namo taba wai heremiai? Aka ki'a haukia abomo tiraona'au ainakia haukia ua tiraona'auai aihonakia. ³³Weiakia heremiai tibabai harai haukia herekiai mo tubabai harai hanona ena namo taba? Aka ki'a haukia abomo ua tibabai aihō. ³⁴Weiakia taba katebamue haukia mo tubenakia hanona ena namo taba wai heremiai? Aka ki'a haukia abomo aka ki'a haukia tibenakia weiana 'arabia katebamue. ³⁵'A emi 'ou haukia katoraona'au ainakia, mai katobabai harai herekiai, mai katobaibeni tabakia 'arabia ibamuekia a'i katoraonanakia. Weiana 'arami apa'uana katoa'ina, mai wai hanona 'ubi toha tohana Tirama nahunai katoao, pokina Ia hanona a'i tibanamona haukia mai ki'a haukia abokiamo eaoko'o ainakia. ³⁶Aoko'o akakia katobabai Hamami 'abana, Ia hanona mai ena aoko'o.

Oi Hau Ha Ena Ki'a Robana A'i Koahuna.

(Mt 7.1-5)

³⁷“Abami a'i katoba bakainakia ba Tirama abomo wai a'i mebakainimi, 'abami a'i katobaki'anakia ba Tirama abomo wai a'i mebaki'animi, 'abami ekia ki'a katohina hao ba Tirama abomo wai emi ki'a kehina hao. ³⁸Katobaibeni 'abami herekiai ba Tirama abomo kebenimi, ihobona taba ha kebonu 'auna 'abana kehao 'inina keahu 'inina kekiki oiōi, ua kebeni aihonimi. Pokina tobaibeni ihobonai Tirama abomo wai kebeni muenimi.”

³⁹Iesu 'abi ibabatai neiana ehina benakia etibaha, “Maha 'iau hauna ha kehore maha 'iau hauna ha a'i kebaka'ana, weiana kebabaina raninai terarua 'uri aonai katetoa. ⁴⁰Marere miorina ha ena ba'iohi hauna a'i ketara haona, 'a marere miorikia ekia marere katebaore haraina hanona ba'iohi hauna kipokia kateihobo.

⁴¹“Taba buonai matiu nabunabuna weiana 'abamu mahana aonai noihana, 'a arako'o rarina oi mahamu aonai hauna a'i nuraonana. ⁴²Oi kipomu mahamu aonai arako'o rarina weiana a'i noihana raninai, aea homanai uaho'abamu kohina bona, 'Uaho'aba'u e, mahamu aonai matiu nabunabuna ma'i ahina.' Bahaorea haumu e, mahamu aonai arako'o rarina moa'i ahi 'uaina, murinai uaho'abamu mahana aonai matiu nabunabuna koiha haraina koa'i ahina.”

Matiu Ha Ha Buabuakiai Kaha'ioibina.

(Mt 7.16-20; 12.33-35)

⁴³“Weiana matiu namona buabua ki'a obona a'i kebaramana, abomo matiu ki'a obona buabua namona a'i kebaramana. ⁴⁴Pokina matiu haha buabuakiai 'iobi nirama, weiana maearima 'ini boaboai ororo a'i tebubu obona, haeamona awa 'ini'ini'ai 'aruhi a'i tia'ina. ⁴⁵Hau namona ehore aonai taba namokia ebararo 'ekana'i taba namokia nitara'au, hau ki'a obona ehore aonai ki'a tabakia ebararo 'ekana'i ki'a tabakia nitara'au. Pokina aonai taba ebonu hauna pinanai nehinana.

Itu Bakori Haukia Rua.

(Mt 7.24-27)

⁴⁶“Wai taba buonai tuaparina'u, ‘Obiapaka e, Obiapaka e,’ ia e'u 'abi a'i tua'i taeana. ⁴⁷Maearima here'u timai mai e'u 'abi aiana tiona mai akana tibabaina haukia kabaihanimi ia hanona aea homakia. ⁴⁸Ia hanona matoha hau ha itu ebabaina, 'uri ehabi 'ourana pihara ahanai hoboro ebakorinakia, tou ekarahi raninai itu etorina 'a itu a'i ebaibiuna, pokina itu hanona ebakori harai ki'a bahana. ⁴⁹Iamo aia eona akana a'i ebabaina hauna ihobona matoha hau ha itu 'ano ahanai ebakorina hoborona aha'i, tou ekarahi itu etouna, beronai mo itu epobu, itu epobu hanona earu otaraina.”

Iesu Roma Huari Poki Hauna Ena Aka Hauna Ena Inawa Ebanamona.

(Mt 8.5-13)

7 ¹Iesu ena 'abi ikoinai ehina orenakia maearima herekiai murinai ekatoto Kaperanauma. ²Roma huari poki hauna ha weia ena ta'ara'i hauna 'arina e'ari ki'a baha hauna hanona einawa ki'a aba ke'ari. ³Ia Iesu pouna eona raninai Iuda haukia apa'uakia baika euhunakia katenoina kemai ena ta'ara'i hauna kebamaurina. ⁴Temai Iesu herena raninai tenoi hao noi haona tetibaha, “Hau neiana pobaraina hanona penamo. ⁵Pokina ia eka itubu niraona'au aina, ia ehore marea ebakorina 'eumai.” ⁶Weiana Iesu kipokia teao, bariu Iesu itu ebarina aonai huari poki hauna ena hau euhunakia Iesu tehina bena tetibaha, “Obiapaka e, a'i koaro'ari, pokina au a'i anamo komai e'u ituai kototo. ⁷Ua buonai kawahi heremu abomo a'i etaina. ⁸Weiana au hanona hau ha ena hiabu ba'anai, mai huari haukia abomo au ba'a'uai. Au hau neiana ha nahina bena moao hanona ia niao, 'abana nahina bena omai hanona ia nimai. E'u ta'ara'i hauna nahina bena neiana mobabaina hanona ia nibabaina.”

⁹Iesu aia weiana eona raninai eta'u ta'u huri, ekabe to'u murinai haukia ehina benakia, “Au wai nahina benimi, Isaraela aonai a'ikakauma nahomana ha a'i atabu ahina.” ¹⁰Weiakia euhunakia haukia temue teao itu raninai, ta'ara'i hauna aba enamo tetabu ahina.

Iesu Wapu Nahuna 'Ariai Ebamikirina.

¹¹Rani papana eao murinai Iesu eao aiara ha atana Nain, i'abana haukia mai mako ia kipokia teao. ¹²Aiara pa'abina aba tibarina aonai, 'ari hauna ha tebua ahina weiana hanona wapu ha nahuna hamo hamona, aiara haukia bo'okia wapu te'abana. ¹³Obiapaka wapu eihana raninai eaoko'o aina, weiana ehina bena etibaha, "A'i kohai." ¹⁴Ia eka'a ha ha eao ko'o ea'i 'apuana, ba ko'o tebuana haukia tekoroti. Iesu e'abi etibaha, "Hau aruaruna e, au nahina beni'o, momikiri." ¹⁵E'ari hauna emikiri emiati e'abi'abi, Iesu miori hinana ebeni muena. ¹⁶Ikoikia teta'u wairai, weiana Tirama tebanamona tetibaha, "Mahabanai apa'uana ha baiatakai ewaira tina." Haeamona tetibaha, "Tirama aba emai ena maearima herekia." ¹⁷Iesu pouna neiana Iudea 'eka maikoina mai herena hanokia ikoikia aokiai tehina otaraina.

Ioane I'abana Haukia Rua Euhunakia Iesu Herena Teao.

(Mt 11.2-19)

¹⁸Ioane i'abana haukia 'abi neiakia ikoikia tehinanakia ia herenai. ¹⁹I'abana haukia rua eaparinakia euhunakia Obiapaka katebakaina katetibaha, "Kemai hauna hanona oi, 'ao haeai ha kata'imana?" ²⁰Temai Iesu herena raninai tehina bena tetibaha, "Ba'uere Robe hauna Ioane euhunamai heremu katabakaini'o, 'Kemai hauna hanona oi, 'ao haeai ha kata'ima?" "

²¹Rani weianai Iesu hanona maearima bo'ona 'akina ekia inawa, hau haiara mai auba ki'a obokia aokiai haukia ebanamonakia, abomo maha 'iau haukia bo'ona mahakia ebano'a. ²²Iesu terarua ekia 'abi ebamuena etibaha, "Tomoao, taba toiha mai urukia to'o haukia Ioane katohina bena. Maha 'iau haukia aba teihaiha, 'ome'ome haukia aba tika'a, morumoru haukia aba teta'e ta'e, haia po'o haukia aia aba tiona, 'ari haukia aba temikiri timauri mauri, abomo uraru haukia herekia pou namona nairoro aina." ²³Haeamona e'abi etibaha, "Aona a'i nikai'au kai'au here'uai hauna hanona enamo."

Iesu Ioane Pouna Ehinana.

²⁴Ioane euhunakia haukia temue murinai, Iesu haeamona to'u haukia herekia Ioane pouna ehinana etibaha, "Toao hano 'akunai hanona taba katoihana? Baura kopura eabunakia katoihanakia, u? ²⁵Aha'i raninai taba katoihana buonai toao weia? Hau ha habuni 'arana rarina ebatotona katoihana, u? Weiakia habuni namoabukia tibatotonakia mai ekia obia tabakia tebo'o haukia hanona obia arana hauna ena ituai katotabu ahinakia. ²⁶Taba katoihana buonai toao weia? Mahabanai hauna ha, u? 'E, 'abi tohana, au wai nahina benimi, neiana hauna ehore mahabanai haukia bo'ona etara haonakia. ²⁷Weiana hauna pouna Puka Robenai tererena,

'E'u iuhubeau hauna
kauhuna ke'uai,
emu taeara kea'ia'i
harai 'uaina.'

Mal 3.1

²⁸Au wai nahina benimi. Babi'e nuakiai terama haukia ikoikiai baiatakiai ha Ioane a'i etara haona. Ia Tirama ena obia aiarana aonai eko'i ko'i ki'a baha hauna mo Ioane etara haona."

²⁹Maearima ikoinai abomo moni bararo haukia Iesu ena 'abi 'uruna teona raninai Tirama ena taeara berona tebatohana, pokina ia hanona Ioane eba'uere robenakia. ³⁰'A Parisea haukia mai rauhuhu poki haukia Ioane ena ba'uere robe a'i tenuatae aina buonai Tirama ena nuatae 'eukiai hauna tebaoao aina.

³¹Iesu haeamona e'abi etibaha, "Uru neiana maearimakia hanona tabai kababatainakia? Ia hanona tabai kabaihobonakia? ³²Ia hanona matoha miori papakia aiara ibuanai tēmiati 'abakia tiaparinakia tētibaha, 'Ai pihī t̄aubainakia, ia wai a'i t̄oewa, 'ari huikia t̄a'i, ia wai a'i tuhai.' ³³Pokina ba'uere robe hauna Ioane emai raninai a'i eaniani mai bine beina a'i einu, ba wai to'abi totibaha, 'Ia aonai auba ki'a obona ha nemiaho.'

³⁴Maearima Nahuna emai nianiani mai neinuinu hanona wai tu'abi t̄otibaha, 'Aniani ki'a mai inuinu ki'a hauna abomo moni bararo haukia mai aka ki'a haukia ekia hau.' ³⁵'A Tirama ena aobero hanona katea'i taeara haukia herekiai ena bero kewaira tina."

Babi'e Ha Tehoro Timina 'Orimonai Iesu Eheina.

³⁶Parisea hauna ha Iesu enuatae aina ena ituai kateaniani haemo, ba Iesu eao ituai etoto aniani 'ekana emiati. ³⁷Aiara weiana aonai aka ki'a babi'ena ha, Iesu Parisea hauna ena ituai kateaniani pouna eona raninai, ia pihara kabapuna aonai muramura timina 'orimona hauna emaiaina.

³⁸Eao Iesu murinai aena pokinai ekoroti ehai ba mahana beikiai aena ebabeinakia, buinai eba'ororonakia abomo epaunakia, muramura timina 'orimona eheina ahakiai.

³⁹Parisea hauna weiana Iesu eaparina hauna babi'e ena babai eihana raninai, kipona aonai eraonana etibaha, "Neiana mahabanai hauna tohana raninai, ia aba pe'iohina, babi'e tabana ia nia'i 'apuana, pokina ia hanona ki'a babi'ena."

⁴⁰Iesu ehore ehina bena etibaha, "Simona e, au 'abi ha oi heremu ai, kahinana." Ia etibaha, "Ba'iohi haumu e, mo'abi." ⁴¹Iesu e'abi etibaha, "Hau rua moni baibeni hauna ha herenai moni tea'inakia, hamona hanona kina hinabu ima^c ea'ina, ha hanona kina imabui ea'ina. ⁴²Ara

^c 7.41 Helene moninai Denari hinabu ima. Denari hamona hanona aka hauna wapu hamona 'arana.

katehore a'i etainakia buonai terarua moni katemue ainakia haukia ekakinakia, ba aeana hauna ia 'arina ke'ari ki'a baha?"

⁴³Simona e'abi etibaha, "Naraonana, pa'e weiana ena a'i 'uai apa'uana ekakina hauna." Iesu ia ehina bena etibaha, "Aba o'abi harai."

⁴⁴Iesu ekabe babi'e eihana, ba Simona ehina bena, "Babi'e neiana noi'hana? Au amai emu ituai atoto hanona ae'u beikia a'i obaibeni. 'A ia hanona mahana beikiai ae'u eutunakia abomo buinai eba'ororonakia. ⁴⁵Oi a'i opauna'u, 'a babi'e neiana akatoto ramana raninai ae'u ipaukiai a'i e'oro 'apua. ⁴⁶Oi ara'u tehoroai a'i oheina, 'a ia tehoro timina 'orimonai ae'u eheinakia. ⁴⁷Ua buonai nahina beni'o, ena ki'a bo'ona 'akina haukia aba ihina hao, pokina ena raona'au eapa'ua paunai, ia tai ena raona'au papana hauna hanona ena ki'a papana ihina hao." ⁴⁸Ba Iesu babi'e ehina bena etibaha, "Emu ki'a aba ihina hao." ⁴⁹Aniani 'ekana'i temiati haukia kipokia baiatakiai te'abi'abi tetibaha, "Neiana hanona tai, ba ki'a abomo nehina hao." ⁵⁰Iesu babi'e ehina bena etibaha, "Emu a'ikakauma ehore ebamaurini'o, mai baibuamu moao."

Babi'e Baika Iesu Murinai Tek'a.

8 ¹Neiana murinai rani a'i ehoma'a Iesu eao aiara apa'uakia mai papakia aokiai Tirama ena obia aiarana pouna namona eiroro aina. I'abana haukia harauhaea rua hanona te'abana kipokia teao, ²mai babi'e baika abomo, auba ki'a obokia 'eukiai eu'u ahinakia mai hau haiarai ebanamonakia babi'ekia, ha Maria Magadala babi'ena aonai auba ki'aobokia 'abaihau hamomo eba karahinakia babi'ena, ³ha Ioanna, atawana Kusa hanona Heroda obia arana ena itu kohukia nipoki ainakia hauna, mai Susanna, mai babi'e bo'okia baika. Babi'e neiakia kipokia ekia tabai Iesu mai i'abana haukia tebarainakia.

'Abi Iabataina Biraura Hauna Ena Uho Ebatonakia.

(Mt 13.1-9; Mk 4.1-9)

⁴Maearima bo'ona aiara ha ha ai temai Iesu herenai to'u rarina tebabaina aonai Iesu 'abi ibabatai neiana ehinana etibaha, ⁵"Biraura hauna ha eao ena uho kebatonakia. Ekapo kapo otarainakia aonai baika taearai te'eho, ba maearima ahakia tehe'au haemona ubi roborobokia teani orenakia. ⁶Uho baika bohu ahanai te'eho, te'omu ia tepaea pokina hano a'i emapu mapu. ⁷Uho baika awa 'ini'inikia aokiai te'eho, awa 'ini'inikia kipokia te'omu haeamo ba tetara tara abunakia. ⁸Uho baika hano namonai te'eho, te'omu harai tebu'a' buakia hinabu ha ha 'abana." Iesu ena 'abi puanai e'abi aota etibaha, "Mai haiana hauna hanona ke'jobina."

'Abi Iabatatai Ena Poki.

(Mt 13.10-17; Mk 4.10-12)

⁹I'abana haukia Iesu tebakaina 'abi ibabatai neiana anina taba. ¹⁰Ia e'abi etibaha, "Tirama ena obia aiarana 'iobikia bunikia hanona aba

wai ebenimi, ia baika herekiaia hanona 'abi ibabataiai nahina benakia, weiana,

'kateihana mo ia a'i kateiha
tinana aia kateona ia obona
a'i kateobo.'

Isa 6.9

Iesu 'Abi Iabataina Anina Ehinana.

(Mt 13.18-23; Mk 4.13-20)

¹¹“'Abi ibabatai anina neiana. Uho hanona Tirama ena 'abi. ¹²Uho taearai te'eho haukia hanona weiakia, aia tiona ia tiaporo nimai 'abi aokiai nia'i parena pokina a'i teme a'ikakauma mai a'i tememaui ta'una. ¹³Uho weiakia bohu ahanai te'eho haukia hanona weiakia, aia tiona raninai 'abi tia'ina mai aonamokia, iamo ramukia aha'i rani papana mo tia'ikakauma ba baihobo nimai raninai ti'eho. ¹⁴Uho weiakia awa 'ini'inikia aokiai te'eho haukia hanona weiakia, aia tiona ia mauri neiana ena ao aro'ari ena obia tabakia mai ena aonamo tabakiai aokia nikaiabunakia ba buabuakia tepure. ¹⁵'A uho weiakia hano namonai te'eho haukia hanona weiakia, aokia beronai mai namonai 'abi uruna tiona tia'i 'inina tibakiro niao mo buabuakia tibarama.”

Ramepa 'Ekana Tohanai Kohao'auna.

(Mk 4.21-25)

¹⁶Iesu haeamona ehina benakia etibaha, “Hau ha ramepa niba'arana raninai uro aonai a'i nibahu abuna 'ao parua itarana ba'anai a'i nikai tina 'a ia ramepa ihao'auna 'ekanai nihao 'auna ba weiakia katetoto haukia hanona ea kateihana. ¹⁷Taba ikoinai tehore buni haukia hanona katekarahi mahanai, taba ikoinai tebahu abu haukia hanona eai katebawaira tinanakia.

¹⁸Aia aea nuo aihona hanona ko'ima haraina, pokina mai 'euna hauna hanona ahanai baika Tirama kehore 'auna kebena, ia 'euna aha'i hauna hanona herenai papana nemiaho niraonana 'euna hauna abomo kea'i obona.”

Iesu Hinana Mai Uaho'abana.

(Mt 12.46-50; Mk 3.31-35)

¹⁹Ba Iesu hinana mai hatina temai kateihana iamo a'i etainakia pokina to'u rarina paunai. ²⁰Hau ha Iesu ehina bena etibaha, “Oi hinamu mai hatimu mahanai tekoroiti tenuatae kateihani'o.” ²¹Ba ena 'abi ebamuena etibaha, “Neiakia Tirama ena 'abi aiana tiona mai akana tibabaina haukia hanona au hina'u mai hati'u.”

Iesu Rani Mai Roio Eba'omatanakia.

(Mt 8.23-27; Mk 4.35-41)

²²Rani ha Iesu i'abana haukia kipokia ahi ai tehe'au ba ehina benakia etibaha, “Aika hamaeao obu abirana.” Ba tebeau ahi. ²³Tebeau oho aonai, Iesu hanona enoti eparua 'ari. Ba kou rarina obu aonai eabu 'au, bei ahi aonai teraku uta hereka 'akinai pateuhu. ²⁴I'abana haukia teao Iesu tebaona tetibaha, “Poki haumu e, poki haumu e, aika aba kahatono 'ari.” Ba ia emikiri baura mai roio erikenakia, baura e'oro roio e'omata. ²⁵Ba i'abana haukia ehina benakia etibaha, “Emi a'ikakauma ae'e?” Ia teta'u ta'u huri abomo teta'u ki'a kipokia baiataki ai tebakai bakai tetibaha, “Neiana hanona hau tabana, baura mai roio ehina benakia hanona aiana tika'aina.”

Iesu Hau Ha Aonai Auba Ki'a Obokia Eu'u Ahinakia.

(Mt 8.28-34; Mk 5.1-20)

²⁶Iesu i'abana haukia kipokia ahiai tebeau banai teao Gerasene hanonai weiana hanona Galilea obu abiranai. ²⁷Iesu ekara'au poeai raninai, aiarai hau ha aonai auba ki'a obokia temiaho hauna emai te baitabu ahi. Aba wa'i baha 'akinai habuni ha'i ebatotona haeamona ituai a'i emiaho, ia 'ari ahanai emiaho. ²⁸Ia Iesu eihana raninai eio ki'a haeamona e'eho aena pokinai eio aota ki'a etibaha, “Iesu 'ubi tohanai Tiramana Nahuna e, taba nonuatae aina here'uai kobabaina. Nanoini'o puma a'i kobena'u.” ²⁹Pokina Iesu auba ki'a obokia aba ehina benakia hau weiana aonai katekarahi. Rani bo'okia auba ki'a obokia tehaburi abuna, maearima tehore imana aena tabiriai tebirinakia te'ima haraina iam o tabiri eba mohunakia haeamona auba ki'a obokia tebaubeau totona hano 'akunai.

³⁰Iesu ia ebakaina etibaha, “Atamu tai?” Ia etibaha, “Ata'u hanona Mako.” Pokina auba ki'a obokia bo'ona 'akina aonai temiaho. ³¹Ia auba ki'a obokia Iesu tenoina a'i keuhunakia a'i kateao 'uri 'ourana aena aha'i hauna aonai.

³²Aiporo to'una ha weia teba korinakia oeo mekenai teaniani, ba auba ki'a obokia Iesu tenoina keuhunakia kateao aiporo aokiai katetoto buonai euhunakia teao. ³³Ba auba ki'a obokia hau weiana aonai tekarahi teao aiporo aokiai tetoto, aiporo to'una tebeau riri papa'ai terobo ahi, 'obu aonai tetono 'ari.

³⁴Aiporo bakori haukia taba weiana erama teihana raninai tebeau 'akauma aiarai mai umai pou neiana tehinana. ³⁵Maearima teao taba erama hauna kateihana Iesu herenai tekara'au raninai, hau weiana aonai auba ki'a obokia tekarahi hauna Iesu aena pokinai emiati habuni ebatotona abomo aona aba ebero teihana ba ikoiki ai teta'u ki'a. ³⁶Weiakia teihana haukia maearima

herekiai hau weiana aonai auba ki'a obokia tetoto hauna aea enamo aiho hauna pouna tehinana. ³⁷Gerasene maearimakia ikoikiai Iesu tenoina hano weianai kekapare pokina teta'u ki'a. Weiana ia ahiai ehe'au kemue. ³⁸Hau weiana aonai auba ki'a obokia tekarahi hauna Iesu enoina pe'abana, ia Iesu ehore ebamuena ehina bena etibaha, ³⁹“Komue emu aiara, Tirama taba ebabaina heremuai hauna pouna kohinana.” Ua buonai hau weiana eao aiara maikoinai aokiai Iesu taba ebabaina herenai hauna pouna ehinana.

Iairo Nahuna Mai Babi'e Ha Iesu Ena Habuni Ea'i 'Apuana Hauna.

(Mt 9.18-26; Mk 5.21-43)

⁴⁰Iesu emue raninai, to'u haukia tehore tea'i taana pokina ikoikiai ia te'imana. ⁴¹Weiana hau ha atana Iairo marea poki hauna ha emai Iesu aena pokinai ekuti enoina kateao ena itu. ⁴²Pokina nahuna uahona hamo hamonamo ihauna harauhaea rua hanona aba ke'ari.

Iesu niao oho aonai to'u rarina aonai eka'a. ⁴³Ba babi'e ha weia, ia hanona babi'e ekia inawa ea'ina aba ihau harauhaea rua, muramura haukia herekiai ena kohu ebaorenakia, hau ha ia a'i ebanamona. ⁴⁴Ia Iesu murinai ekataeana eao ena habuni puana ea'i 'apuaana, beronai mo ena inawa e'oro. ⁴⁵Iesu ebakai bakai etibaha, “Tai ea'i 'apuaana'u?” Ikoikiai tebuniai aonai Petero e'abi etibaha, “Poki haumu e, maearima tekori abuni'o abomo tetuanio.” ⁴⁶'A Iesu e'abi etibaha, “Hau ha ea'i 'apuaana'u pokina a'jobina hiabu hau'uai hauna aba ekarahi.” ⁴⁷Weiana babi'e e'jobina kepihi taearana aha'i ba eao mai 'ururu 'ururuna e'eho Iesu aena pokinai, taba buonai ea'i 'apuaana abomo aea enamo aiho pouna maearima ikoikiai wairakiai ehinana. ⁴⁸Ba Iesu babi'e weiana ehina bena etibaha, “Naha'u e, emu a'ikakauma ehore aba ebanamoni'o mai baibuamu moao.”

⁴⁹Iesu ni'abi ohomo aonai hau ha Iairo ena ituai emai Iairo ehina bena etibaha, “Nahumu aba e'ari. Ba'iohi hauna a'i mobaro 'ari 'abaeana.” ⁵⁰Iesu aia weiana eona ba Iairo ehina bena etibaha, “A'i kota'u, koa'ikakaumana'u. Nahumu hanona kenamo.” ⁵¹Iesu Iairo ena ituai ekara'au raninai maearima ikoikiai ebamuenakia, ia Petero, Iakobo, mai Ioane mai uaho hamana hinana mo te'abana tetoto. ⁵²Weia hanona maearima ikoikiai uaho tihai aina mai tiaoko'o aina. Iesu e'abi etibaha, “Hai tomobapuaana, uaho hanona a'i e'ari, ia niparua.” ⁵³Maearima Iesu teiriri aina, te'jobina uaho hanona aba e'ari toha. ⁵⁴Iesu uaho imanai ea'i eaparina etibaha, “Naha'u e, momikiri.” ⁵⁵Uaho aubana emue beronai emikiri, ba Iesu ehina benakia taba ha katebena keana. ⁵⁶Uaho hamana mai hinana teta'u ta'u huri, 'a Iesu ehara abunakia taba erama hauna hanona tai ha haianai a'i kate'abi.

Iesu I'abana Harau Haea Rua Euhunakia Kateiroro.

(Mt 10.5-15; Mk 6.7-13)

9 ¹Iesu ehore i'abana haukia harau haea rua eaparinakia, ebato'unakia, tabura mai hiabu ebenakia paipai ki'a obokia

ikoikiai kateu' u ahinakia mai inawa haeai haeai kateba maurinakia, ²ba euhunakia Tirama ena obia aiarana pouna kateiroro aina abomo inawa haukia kateba namonakia. ³Ehina benakia, etibaha “Emi harima ai taba ha a'i katoa'ina, ikai'ini aha'i, maho aha'i, aniani aha'i, moni aha'i, abomo emi ibatoto ibaruakia a'i katoa'inakia. ⁴Itu tabanai katokara'au raninai weiamo katomiaho keaomo aiara weiana katohabona. ⁵Ba maearima a'i katea'i taeanimi raninai 'apumi apurorokia katoahuahu obo ba ekia aiara katohabona ia irobekia 'abinai keao.” ⁶Ba i'abana haukia temikiri teao aiara haha aokiai pou namona teiroro aina abomo maearima tebamaurinakia.

Heroda Ena Nuatae Ke'iohi Haraina Iesu Hanona Tai.

(Mt 14.1-12; Mk 6.14-29)

⁷Heroda Obia hauna taba ikoinai Iesu ebabai poukia eo'o raninai aona earo'ari, pokina baika tehina bena ba'uere robe hauna Ioane aba 'ari ai emikiri mue. ⁸Baika tetibaha Elia aba ewaira tina, haeamona baika tetibaha mahabanai hauna 'ai'aina ha bariu emikiri mue. ⁹Ia Heroda etibaha, “Ioane 'akona aba akabe hurina, 'a 'uruna naona aka nahomakia nibabai hauna hanona tai?” Ba ena nuatae hanona keihana.

Iesu Taha Ima (5,000) Ebanianinakia.

(Mt 14.13-21; Mk 6.30-44; Io 6.1-14)

¹⁰Iuhubeau haukia temue Iesu herena taba taba tebabai haukia ia wairanai tehinanakia. Weiana ia ehore ebaka'a obonakia ia kipokia teao aiara ha atana Betesaida ai. ¹¹Ia maearima te'iohina Iesu aba weia hanona ikoikiai ia murinai teao. Ea'i taeanakia, Tirama ena obia aiarana 'abina ehinana abomo mauri tenuatae haukia ebamaurinakia. ¹²Beraura aba erabirabi i'abana haukia harau haea rua temai herena tehina bena tetibaha, “Maearima neiakia mouhunakia, temera'a temeao aiara 'ao uma herekai haukia weia katemiaho kipokia ekia aniani katetabu pokina 'eka neiana hanona hano'akuna.” ¹³Iesu ekia 'abi ebamuena etibaha, “Wai taba ha tomobenakia temeani.” Ia tetibaha, “Ai heremaiai temiaho haukia hanona parawa ima maia rua mo, konuatae kataeao aniani katakawanakia maearima neiakia 'eukia, 'u?” ¹⁴Hau 'abaeana hanona ikoinai taha ima (5,000) 'abana.

Iesu i'abana haukia ehina benakia etibaha, “Maearima neiakia haukia imabui imabui katoba miatinakia.” ¹⁵Ehinana hauna ihobonai i'abana haukia tebabaina ba maearima ikoikiai temiati. ¹⁶Iesu ehore parawa ima mai maia rua ea'inakia ea'a taea kupa eihana ebanamona murinai ehobi 'iti'itinakia. Ba i'abana haukia ebenakia katekaitinakia maearima wairakiai. ¹⁷Weiana ikoikiai teaniani eao teani 'ari, i'abana haukia aniani harikia pohea harauhaea rua tebabonunakia.

Petero Iesu Ehina Pouna Ia Hanona Keriso.

(Mt 16.13-19; Mk 8.27-29)

¹⁸Rani ha Iesu kipona ebahuba'ari, i'abana haukia hanona ia herenai temiaho ebakainakia etibaha, “Maearima au aha'u'ai taba na tihoma?”
¹⁹Ia ena 'abi tebamuenta tetibaha, “Baika ti'abi Ioane Ba'uere robe hauna, baika ti'abi Elia, baika ti'abi mahabanai hauna ha aba 'uainai e'ari hauna bariu emauri mue.”
²⁰Ebakainakia, “Ia wai hanona taba na tuhoma? Au hanona tai?” Petero ena 'abi ebamuenta etibaha, “Oi hanona Keriso Tirama euhuni'o haumu.”

Iesu Ena 'Ari Pouna Ehinana.

(Mt 16.20-28; Mk 8.30-9.1)

²¹Ia ehore eharabunakia hau ha a'i katehinabe 'apuana. ²²Haeamona etibaha, “Maearima Nahuna hanona kehaiara ki'a baha, aiara hau apa'uakia, robe haukia apa'uakia mai rauhuhu poki haukia kate'oatana abomo kateahu 'arina, ia wapu ibaihaunai kemikiri mue.”

Iesu Paunai Mauri Kene'ena Hauna Mauri Kea'ina.

²³Ikoikiai ehinabe muenakia etibaha, “Tai ha nenuatae au ke'abana'u raninai, ia kipona ena mauri kehabona ena matiu ibiri ropo kea'i taeana kebuana rani ikoinai au muri'u'ai keka'a. ²⁴Pokina ena mauri kea'i 'inina hauna hanona ena mauri keba'akaumana, 'a au pau'u'ai ena mauri kene'ena hauna hanona mauri kea'ina. ²⁵Hau ha hanopaka tabakia maikoinai pea'ina ena mauri peba 'akaumana 'ao pea'i ki'ana raninai ena namo hanona taba? ²⁶Hau ha au pau'u'ai 'ao e'u 'abi paukiai kehaumaea raninai, Maearima Nahuna abomo ia kehaumaeaina ena nuabiai abomo Hamana ena nuabiai ena aneru robekia kipokia ekia mai raninai. ²⁷'Abi tohana mo au wai nahina benimi, neia tikoroti haukia baika hanona a'i kate'ari keaomo Tirama ena obia aiarana kateihana.”

Iesu Ihana Ebahaeaina.

(Mt 17.1-8; Mk 9.2-8)

²⁸'Abi neiakia ehinanakia wapu 'ababani teore murikia Iesu ehore Petero, Ioane mai Iakobo eba ka'anakia oeoai tekara'au kebahuba'ari paunai. ²⁹Ebahuba'ari aonai ia wairana ehaeai ena habuni epore e'imare 'imare. ³⁰Hau rua ia kipokia te'abi'abi, Mose mai Elia. ³¹Mai nuabikia tewaira tina Iesu kipokia Tirama ena nuatae ihobonai Ierusalemiai ke'ari hauna terobahu aina. ³²Petero 'abana kipokia hanona teparua 'ari ba teno'a, Iesu nuabina mai hau rua herenai tekoroti haukia abomo teihanakia. ³³Hau rua Iesu aba katehabona aonai, Petero ehore Iesu ehina bena etibaha, “Poki haumu e, aika neia nahamiaho hanona enamo

ki'a baha! Ai i'aua aihau katababainakia, ha oi 'eumu, ha Mose 'euna, ha Elia 'euna.” Ia hanona a'i e'jobina paunai e'abi 'abaea.

³⁴Ia ni'abi ohomo aonai 'auhao emai ikoinai ekaiaibunakia, ba ia 'auhao aonai hanona tetu'u ki'a. ³⁵Aia ha 'auhao aonai emai etibaha, “Neiana hanona Au Naha'u, atina'ana hauna, aiana katona.” ³⁶Aia weiana epua murinai Iesu ikupaiana teihana. I'abana haukia 'abi ha a'i tehina 'apua, abomo taba teihanakia haukia rani weianai hanona hau ha a'i tehina bena.

Iesu Miori Aonai Auba Ki'a Obona Eu'u Ahina.

(Mt 17.14-18; Mk 9.14-27)

³⁷Erani ia oeoai teriri Iesu maearima bo'ona kipokia te baitabu ahi. ³⁸Hau ha maearima baiatakiai eio etibaha, “Ba'iohi haumu e, au oi nanoini'o, naha'u neiana moihana, naha'u hamomona mo neiana. ³⁹Rani baik auba ha miori neiana nia'ina, beronai neio, niba'ororo abuna, pinanai 'uto'uto tikarahi, a'i nihabona keaomo hauna nimani'a obo. ⁴⁰Au ti'abani'o haukia anoinakia auba ki'a obona kateu'u ahina, ba ia a'i etainakia.”

⁴¹Iesu ehina benakia etibaha, “A'ikakauma aha'i mai ki'a babai uruna haumi, heremiai kamiaho keaomo aita? Nahumu omaiaina here'u.” ⁴²Miori eka'a haha aonai biriuu ki'a obona ehore miori 'anoai e'atiaina eba'ororo abuna, Iesu ehore auba ki'a obona ebatana ba miori ebamaurina, eaoaina hamana ebena. ⁴³Tirama ena hiabu rarina 'akinai maearima ikoikiai tetu'u ta'u huri. Ia Iesu taba ebabaina hauna tiaonamoai ohona aonai i'abana haukia ehina benakia etibaha,

Iesu Ke'ari 'Abina Ehina Pouna.

(Mt 17.22, 23; Mk 9.30-32)

⁴⁴“Abi tabana heremiai aba kahinana hauna tomobahuai haraina. Maearima Nahuna hanona hinahinana katehina maearima herekiai.” ⁴⁵A ia ena 'abi neiana anina a'i te'jobina. Ia herekiai taba e'uahina hauna ebuni buonai obona a'i teobo, ba katebakaina hanona tetu'u.

Tai Hanona Eapa'ua.

(Mt 18.1-5; Mk 9.33-37)

⁴⁶Rani ha i'abana haukia kipokia mo baiatakiai tebaihara tae tai hanona keapa'ua ki'a baha. ⁴⁷Iesu ekia raona weiana e'jobina buonai miori papana ha emaiaina herenai ebakorotina. ⁴⁸Ba ehina benakia etibaha, “Tai ha au ata'uai miori papana neiana nia'i taeana hauna hanona au nia'i taeana'u, au nia'i taeana'u hauna hanona euhuna'u Tirama abomo nia'i taeana. Wai ikoimiai baiatamiai ha eko'i ko'i ki'a baha hauna ia hanona keapa'ua ki'a baha.”

A'i Ni'oatanimi Hauna Emi Hau.*(Mk 9.38-40)*

⁴⁹Ioane Iesu ehina bena etibaha, “Poki haumu e, ai hau ha taihana oi atamuai auba ki'a obokia eu'u ahinakia. Ba ai tahina bena kebapuaana pokina ia hanona aika 'abaka aha'i.” ⁵⁰Iesu ehina benakia etibaha, “A'i patoba'orona, pokina a'i ni'oatanimi hauna hanona wai 'abami.”

Samaria Haukia Iesu A'i Tenuatae aina.

⁵¹Iesu kemue kupa keao ranina ekaibari aonai ia aona ebataburana emikiri Ierusalem keao. ⁵²Ba iuhubeau haukia euhu 'uainakia teao Samaria aiarana ha aonai taba ikoikiai kateba'orunakia. ⁵³'A maearima weia haukia a'i tea'i taean, pokina ia te'jobina Iesu hanona Ierusalem niao. ⁵⁴I'abana haukia Iakobo mai Ioane babai weiana teihana raninai tebakaina tetibaha, “Obiapaka e, nonuatae iruba kupai kataparina, keriri keba'ara koukounakia, u?” ⁵⁵'A Iesu ekabe terarua erikenakia, ⁵⁶ba ia teao aiara haeha ha.

Iesu I'abana Hoana Aeahomana.*(Mt 8.19-22)*

⁵⁷Ia taearai teka'a aonai hau ha Iesu ehina bena etibaha, “Au oi aeana nuao hanona murimuai ka'au.” ⁵⁸'A Iesu ia ehina bena etibaha, “Waeha 'aki hanona mai ekia 'uri, 'ubi roborobokia abomo mai ekia ni'i, ia Maearima Nahuna kenoti kearai hanona 'ekana aha'i.” ⁵⁹Haeamona Iesu hau ha ehina bena etibaha, “Muri'uai mo'au.” 'A hau weiana e'abi etibaha, “Obiapaka e, maeao hama'u mahore 'uaina.” ⁶⁰Iesu ia ehina bena etibaha, “Ti'ari haukia ekia 'ari temehorena, 'a oi moao Tirama ena obia aiarana pouna koiroro aina.”

⁶¹Haeamona hau mo ha e'abi etibaha, “Obiapaka e, au murimuai ka'au, ia maeao 'uai e'u rama haukia herekiai haparua mahinana.” ⁶²Iesu ena 'abi ebamuena etibaha, “Hau ha 'ani ihuana imanai nia'ina, 'a keiha kabe to'o baihana hauna hanona Tirama ena obia aiarana akana kebabaina hanona a'i ketaina.”

Iesu Maearima Imabui Harau Rua Rua Euhunakia.

10 ¹Neiana murinai Obiapaka ehore haukia imabui haraurua rua etina'anakia, ikoikiai baiatakiai rua rua euhunakia kate'uai kateao ia kipona keao aiarakia mai 'ekakia ikoikiai. ²Ehina benakia etibaha, “Umai aniani aba ebo'o harai ia aka haukia mo a'i ebo'o, ua buonai uma poki hauna katonoina, ia kehore aka haukia keuhunakia ena umai kateaka.

³Tomoao! Au wai nauhu ahinimi ihobona mamoe nahukia 'abakia, waeha 'aki baiatakiai. ⁴Mahoa ihua hiua, pute 'ao tamaka ha a'i

katoa'i. Taearai abomo maearima ha kipokia a'i katokikipa. ⁵Itu tabanai katokara'au, katohina 'uaina 'abina hauna neiana, 'Baibua hanona itu neianai!' ⁶Hau weiana aona kebaibua raninai, wai emi baibua hanona ia ahanai kemiaho. Ia keaha'i raninai emi baibua hanona kemue heremi. ⁷Kipokia itu weianai katomiaho oioi, taba tibaibeni haukia katoani 'ao katoinu, pokina aka hauna mai 'arana hanona enamo. Itu ha ha a'i katoao.

⁸Aiara tabana aonai katokatoto, katea'i taeanimi raninai wairamiai taba tekaitina hauna katoana, ⁹aiara weianai inawa haukia katoba maurinakia, abomo katohina benakia, katotibaha, 'Tirama ena obia aiarana hanona aba nimai heremi.' ¹⁰Ia aiara ha aonai katokatoto, a'i katea'i taeanimi raninai katokarahi taearanai kato'abi katotibaha, ¹¹'Emi aiara apurorona weiana etau to'ona 'apumaiai hauna aba tatabu tabu obona niwahi heremi. Weia kato'jobina Tirama ena obia aiarana aba herekai.' ¹²Au wai nahina benimi, bakai berauranai Sodoma ena haiara ma kenamo 'apua ba aiara weiana ena haiara keapa'ua.

Aiara Haukia A'i Teraona Kabe.

(Mt 11.20-24)

¹³"Korasina e! Heremuai hanona keki'a wairai. Betesaida e! Oi abomo heremuai hanona keki'a wairai. Ba ta'u ta'u huri akakia neiakia heremi ai ababai haukia weia Turo mai Sidono aokiai pababai raninai, aba wa'i baha pateraona kabe, habuni ki'a obokia patebatotonakia rabuai pateata patemiati. ¹⁴Bakai berauranai Turo mai Sidono ekia haiara ma kenamo 'apua ba wai 'eumi keapa'ua. ¹⁵Kaperanauma e! Oi abomu mo. Kipomu pokara'au poao kupa ubinai na nuhoma. Ia aha'i. Oi hanona katetori oboni'o koriri 'ari 'ekana."^d

¹⁶Iesu i'abana haukia ehina benakia etibaha, "Wai aiami niona hauna au aia'u abomo aba niona, wai nibaki'aniami hauna au abomo nibaki'ana'u, ia au nibaki'ana'u hauna euhuna'u hauna abomo nibaki'ana."

Haukia Imabui Haraurua Rua Temue Iesu Herena.

¹⁷Haukia imabui haraurua rua teao haeamona mai aonamokia temue herena te'abi tetibaha, "Obiapaka e, oi atamuai auba ki'a obokia tau'u ahinakia hanona aiamai teona." ¹⁸Iesu ia ehina benakia etibaha, "Au Satani kupai e'eho hanona aihana matoha 'imare 'abana. ¹⁹Au hiabu wai aba abenimi, 'erau 'ao hara katoehe 'ininakia abomo 'ou hauna ena hiabu ikoinai katotara haona, taba ha a'i kebamani'aniami. ²⁰Auba ki'a obokia aiami teona paunai a'i katoaonamo, 'a atami kupai aba terere hauna katoaonamo aina."

^d 10.15 'ao Hades.

Iesu Eaonamo.

(Mt 11.25-27; 13.16, 17)

²¹Rani weianai Iesu Auba Robe paunai aona enamo ki'a e'abi etibaha, "Hama'u e, kupa mai hanopaka Obiana nabanamoni'o, pokina taba neiakia aotipa mai aobero haukia herekiai obuninakia haukia miori papakia herekiai obawaira tinana. 'E, hama'u, pokina neiana hanona oi emu raona namona. ²²Taba ikoinai hanona Hama'u aba ebaibeni here'uai, Nahuna hauna tai ha a'i e'jobina ia Hamana ikupaianamo, Hamana hauna tai ha a'i e'jobina Nahuna mai nahuna nenuatae ainakia herekiai kebawaira tinana haukia ikupaiakia mo."

²³Weiana Iesu eiha kabe i'abana haukia ehinabe buninakia etibaha, "Taba neiakia toihanakia haumi hanona tutai harai toiha tinanakia. ²⁴Pokina au wai nahina benimi, mahabanai haukia mai aiara obiakia bo'okia tenuatae wai toiha haukia pateiha ia a'i teiha, tuo'o haukia pateo'o ia a'i teo'o."

Ori Ibabataina Samaria Hauna Namona.

²⁵Weia rauhuhu poki hauna ha emikiri Iesu ehobona etibaha, "Ba'iobi haumu e, taba kababaina hanona mauri banaibanai ka'ina?" ²⁶Iesu ia ena 'abi ebamuena etibaha, "Rauhuhu pukana aonai aea terere aihona? Aea o'iobi aihona?" ²⁷Ia ena 'abi ebamuena etibaha, "Obiapaka emu Tirama koraona'au aina mai aomu ikoinai, mai aubamu ikoinai, mai taburamu ikoinai, mai emu raona ikoinai, abomo heremu hauna koraona'au aina oi kipomu nuraona'au aini'o 'abana." ²⁸Iesu ia ena 'abi ebamuena etibaha, "Emu 'abi hanona ebero, na kobabai aiho hanona komauri."

²⁹Rauhuhu poki hauna kipona eapaina ebakai bakai etibaha, "Ba here'u hauna hanona tai?" ³⁰Iesu ia ena 'abi ebamuena etibaha, "Hau ha Ieruselema ai eriri Ieriko eao aonai kakikaki haukia tehe abuna, ena habuni tebakurinakia teahu ki'ana herekai mo pe'ari ba tehabona. ³¹Rani weianai Robe hauna ha taeara weianai eka'a eao, eihana raninai taeara haia haianai ekabanai. ³²Ihobonaimo Lebi itubuna hauna ha taeara weianai eao, eihana raninai taeara haia haianai ekabanai.

³³'A Samaria hauna ha ena kaoao ai hau weiana herenai ekara'au, eihana raninai eaoko'o aina. ³⁴Eao herena hauna mani'akia tehoru mai bine beinai etaronakia e'apanakia. Ba ena doniki ahanai ebamia'auna, eaoaina iha'ini itunai ua'a e'imana. ³⁵Erani hau weiana ehore moni rua etara 'aunakia itu iha'inina hauna ebena ehina bena etibaha, 'Ko'ima haraina, herenai bita kone'e hanona e'u mueai 'arafia kabeni'o.' "

³⁶Iesu ia ebakaina etibaha, "Oi taba na nuhoma? Hau weiakia teihau aonai aeana hauna kakikaki haukia imakiai enouta hauna herena haunai ebaona?" ³⁷Ia etibaha, "Weiana eaoko'o aina hauna." Iesu ia ehina bena etibaha, "Moao ebabaina ihobona mo kobabaina."

Iesu Eao Mareta Mai Maria Herekia.

³⁸Iesu i'abana haukia kipokia taearai teao aiara haesai tekara'au, weia babi'e ha atana Mareta ehore ea'i taeana ena ituai. ³⁹Ia hatina atana Maria hanona eao Obiapaka aena pokinai emiati ena ba'iohi 'abikia aiakia nio'o. ⁴⁰'A Mareta baki ia'i taeakia a'i a'i haraina eabaina hanona aona earo'ari, ba emikiri eao Iesu ehina bena etibaha, "Obiapaka e, oi a'i nuraonana hati'u naiana ehabona'u kipo'u aka ikoinai nababai. Mohina bena mebaraina'u." ⁴¹Obiapaka ia ena 'abi ebamuena etibaha, "Mareta e, Mareta e, oi hanona aomu niaro'ari taba bo'okia paukiai nuatetua, ⁴²ia taba hamona mo nahanuataeai hauna Maria aba enuatae aina, ia herenai a'i katea'i pare 'apuana."

Iesu Bahuba'ari Eba'iohinakia.

(Mt 6.9-13; 7.7-11)

11 ¹Rani ha Iesu 'eka ha ai ebahuba'ari, ena bahuba'ari epua murinai i'abana haukia ha ehore ehina bena etibaha, "Obiapaka e, bahuba'ari moba'iohinamai Ioane i'abana haukia eba'iohinakia 'abana." ²Ba Iesu ia ehina benakia etibaha, "Katobahuba'ari raninai na kato'abi aiho.

'Hamamai e.

Oi atamu hanona katabarobena.

Emu obia aiarana kemai.

³Rani ikoinai tanuatae aina anianina kobenamai.

⁴Emai ki'a kohina haonakia,
pokina ai tibaki'anamai haukia
ekia ki'a tahina haonakia.
Abomo baihobo aonai
a'i kobakatotonamai.' "

⁵Ia haemona ehina benakia etibaha, "Wai haumi ha wapuka'a ibuanai peao ena hau ena ituai penoina petibaha, 'E'u hau e, parawa aihau mo pobena'u. ⁶Pokina e'u hau ha ena kaoao aonai emai here'u, karo'ona ia aniani mo here'u aha'i.' ⁷Aonai ua'a ke'abi ketibaha, 'A'i kobarararina'u, pa'abi hanona aba ikaiabu abomo au naha'u kipokia hanona taparua. A'i kamikiri taba ha a'i kabeni'o.' ⁸Au wai nahina benimi, ena hau paunai ia a'i kemikiri taba ha a'i kebena, 'a ia ena noi 'ariai 'ariai paunai kemikiri, ia nenuataeai tabakia ikoikiai kebena. ⁹Haeamona au wai nahina benimi, katonoi hanona katoa'ina, katotabuna hanona katotabu ahina, katohara hara hanona pa'abi ikaikau 'eumi. ¹⁰Weiakia tinoiai haukia hanona tia'i, weiakia tibaitabu haukia hanona titabu ahi, nihara hara hauna 'eunai pa'abi hanona ikaikau.

¹¹Wai hama haumi ha nahumu maia penoi raninai 'erau pobena, u? ¹²'Ao ahoi penoi raninai hara pobena, u? ¹³Wai ki'a haumi re'a, taba namokia nahumi ibenikia to'iohi. Namu babita Hamami kupai nemiaho hauna Auba Robe tinoi noi aina haukia kebenakia."

Baika Te'abi Iesu Belesebulo Hiabunai Niaka.

(Mt 12.22-30; Mk 3.20-27)

¹⁴Iesu ehore 'aiaunu paipaina hau ha aonai eu'u ahina, paipai weiana ekarahi ba e'aiaunu hauna e'abi'abi, teihana haukia teta'u ta'u huri. ¹⁵Ia maearima baika te'abi tetibaha, "Belesebulo paipai ekia obia arana ena hiabuai ia paipai neiakia eu'u ahinakia." ¹⁶Baika Iesu tehobona ekia nuatae kupa ena hoa ha pebabaina pateihana. ¹⁷Ia Iesu hanona ekia raona e'iohina, ba ehina benakia etibaha, "Hanopaka kipona niwatena ba nibai'oata hanona keki'a, abomo itubu kipona niwatena ba nibai'oata hanona ke'eho. ¹⁸Satani kipona kewatena ba kipona ke'oatana raninai, ena hanopaka aea kekori 'ini aiho? Neiana nahinana pokina wai tu'abi 'Belesebulo ena hiabuai paipai au'u ahinakia.' ¹⁹Au Belesebulo ena hiabuai paipai nau'u ahinakia raninai, tai ena hiabuai wai i'abami haukia tihore paipai teu'u ahinakia? Ua buonai ia katehore wai kateba beronimi. ²⁰Ia au Tirama ena hiabuai paipai au'u ahinakia raninai, Tirama ena obia aiarana aba ekara'au heremi.

²¹Tabura hauna mai ena pura'a ena itu ke'imana hanona ena kohu ikoikia katemiaho harai. ²²'A etabura ki'a hauna ha ia pehuari bena ba peahuna raninai, ena pura'a imanai kea'i obonakia ena kohu ikoikia kewate otaraina.

²³Tai'u a'i nitai hauna hanona au ni'oatana'u, au kipokia a'i tabararo bararo hauna hanona nikapo kapo otarainakia.

Auba Ki'a Obona Emue Ena 'Eka 'Ai'aina.

(Mt 12.43-45)

²⁴"Auba ki'a obona ha hau ha aonai nikarahi raninai, 'eka 'ororokia 'ekakiai nikaoao, ena nuatae kearai ia 'eka mo ha aha'i. Kipona ni'abi netibaha, 'Kamue kaeao amiaho 'uai ituna.' ²⁵Ba emue eao itu hanona aba itaro abomo aba e'oru harai etabu ahina. ²⁶Weiana ia eao auba ki'a obokia 'akikia 'abaihou hamomo ebaka'anakia, ba teao tetoto weia temiaho, hau weiana ena mauri 'uainai papana enamo, 'a bariu ena mauri aba eki'a ki'a baha."

²⁷Iesu 'abi neiakia nehinanakia aonai babi'e ha mako baiatakiai Iesu eiona etibaha, "Oi ebaramani'o mai oi eba'aeni'o babi'ena hanona enamo." ²⁸'A Iesu ena 'abi ebamuena etibaha, "Ua a'i kehoma, ia Tirama ena 'abi tiona abomo te'ini bena haukia tenamo ki'a baha."

Parisea Haukia Tenuatae Hoa Ha Kateihana.

(Mt 12.38-42)

²⁹Maearima Iesu teto'u aina aonai, ena 'abi ea'i ramana etibaha, “Uru neiana hanona uru ki'a obona, bata'u ta'u huri hoakia nitabu, ia ha a'i kerama herekia, Iona ikupaiana mo bata'u ta'u huri hoanai keao. ³⁰Iona hanona bata'u ta'u huri hoanai eao Nineba haukia herekia ihobona mo Maearima Nahuna hanona uru neiana herenai. ³¹Bakai ranina aonai obia babi'ena Seba kemikiri uru neiana haukia behoi kehorotinakia, pokina ia hanona hanopaka puanai emai Solomona ena aotipa 'abikia keo'o, ia bariu ha neia hanona Solomona etara haona. ³²Bakai ranina aonai Nineba haukia hanona katemikiri uru neiana haukia behoi katehorotinakia pokina Iona ena iroroai teraona kabe, ia bariu ha neia hanona Iona etara haona.

Ramepa Ihao'auna 'Ekana Tohanai Kohao'auna.

(Mt 5.15; 6.22, 23)

³³“Hau ha ramepa keba'arana raninai itu bunianai 'ao uro aonai a'i kekai tina, ia ramepa ihao 'auna 'ekana tohanai kehao 'auna ba weia titoto haukia hanona ea weiana kateihana. ³⁴Oi mahamu hanona hauanimu ena ramepa, ba oi mahamu enamo raninai hauanimu maikoina abomo ea aonai, ia mahamu keki'a raninai hauanimu maikoina hanona wapura aonai. ³⁵Ua buonai ko'ima 'ima haraini'o ea aomuai hauna a'i mewapura abuna ta'una. ³⁶Oi hauanimu maikoinai niea obo papana ha wapura aonai aha'i raninai, maikoina hanona kea obo harai matoha ramepa eana maikoina nibeni'o nibaeani'o 'abana.”

Iesu Rauhuhu Poki Haukia Erikenakia.

(Mt 23.1-36; Mk 12.38-40)

³⁷Iesu e'abi nonoa raninai, Parisea hauna ha ia enoina terarua kateaniani haeamo buonai ia etoto eao emiati keaniani. ³⁸Parisea hauna Iesu eihana hanona eta'u ta'u huri, pokina aniani raninai imana a'i eutu. ³⁹Weiana Obiapaka ia ehina bena etibaha, “Bariu wai Parisea haumi hanona 'ere mai uro kapekia mo toutu harainakia, 'a ia aomi hanona bainao mai ki'a ebonu 'au. ⁴⁰Po'o po'o haumi, ia kapena eababaina hauna, aona abomo a'i eababaina, u? ⁴¹Ia aonai temiaho tabakia ururu haukia katobenakia. Ba taba ikoikia aba terau'a wai 'eumiai.

⁴²“Parisea haumi e, heremiai hanona keki'a wairai! Pokina emi aniani iba'orimokia mai ibahiabu hiabukia papakia tubahunakia harauhaea aonai hamomona tubaibeni Tirama herenai, 'a Tirama herenai bero mai raona'au pato babaina hauna tohabona. 'A neiana abomo katobabaina, ia weiana abomo a'i katohabona.

⁴³“Parisea haumi e, heremiai hanona keki'a wairai! Pokina emi nuatae hanona marea aonai miati 'ekakia namokiai katomiati, abomo kawakawa 'ekakiai katemariki ainimi katebanamonimi.

⁴⁴“Heremiai keki'a ki'a baha! Pokina wai hanona ihobona 'ariahakia 'ai'aikia 'akikia, maearima a'i te'lobina ahakiai tiaoina timaiaina Tirama wairanai aba te'opu.’”

⁴⁵Rauhuhu poki hauna ha ia ehina bena etibaha, “Ba'ioi haumu e, oi na nu'abi aiho hanona ai abomo nubahaumaenamai.” ⁴⁶'A ia etibaha, “Rauhuhu poki haumi e, heremiai hanona keki'a ki'a baha! Wai maearima iebebe pumakia tubabuanakia, 'a wai kipomi ha iebebe weiana ena puma aea homana imami kiri'u kiri'una hamona a'i ni'ata 'apuana.

⁴⁷“Heremiai keki'a wairai! Wai hamami mahabanai haukia teahu 'arinakia, ba wai tuhore ekia 'ariahakia tubabainakia. ⁴⁸Ua buonai wai hamami ekia babai tubatoha akakia tubaihanakia, pokina ia teahu 'arinakia, wai hanona ekia 'ariahakia tubabainakia.

⁴⁹“Ua paunai Tirama ena 'ioi 'abina etibaha, 'Au mahabanai haukia mai iuhubeau haukia kauhunakia kateao, baika hanona kateahu 'arinakia, baika katebaki'anakia. ⁵⁰Weiana paunai hanopaka erama emai mo bariu mahabanai haukia ikoikiai aruarukia tekiki oioi, pumana hanona uru neiana haukia katehoaina. ⁵¹Abela aruarunai ea'i ramana emai mo Sakaria aruarunai, ia hanona banamo itarana mai marea robena baiatakiai teahu 'arina. 'E, au wai nahina benimi, pumana hanona uru neiana haukia katehoaina.

⁵²“Rauhuhu poki haumi e, heremiai hanona keki'a wairai! Pokina aotipa taearana aba tokaiabuna, wai kipomi a'i katototo, katetoto haukia ekia taeara abomo toehe abuna.”

⁵³Iesu 'eka weiana nihabona raninai, rauhuhu poki haukia mai Parisea haukia te'oatana, ekia bakaibakai haeai haeai tehina herenai. ⁵⁴Ena 'abi te'itimana, ha kehina ki'ana raninai katebato'ona.

Bai'oi Haukia Ekia Hoahoa Taikia A'i Katotai.

(Mt 10.26, 27)

12 ¹Rani weianai maearima bo'ona 'akina tebaehe aina, 'a Iesu i'abana haukia eba'ioi 'uainakia etibaha, “Parisea haukia ekia bai'oi akana herenai Kato'ima 'ima harainimi weiana hanona bakupu muramurana 'abana. ²'A tebahu abunakia tabakia ikoikiai katekarahi abomo tehore buninakia tabakia ikoikiai kate'ioi. ³Wapura aonai taba ohinana hauna beraura eanai kateona abomo ikaihuri aonai haianai obatete aina hauna itu kapenai kateiroro aina.

Tirama Ikupaiana Mo Kahata'u aina.

(Mt 10.28-31)

⁴“E'u hau e, au wai nahina benimi. Hauani iahu'arina mo te'lobina ia murinai taba ha ahanai a'i katebabai muena haukia a'i katota'u ainakia.

⁵Ia katota'u aina hauna au kahore kaba'iobinimi. Ia hanona hauanimiti keahu 'arina murinaiti mai ena hiabu ni'ara banaiti banaiti irubana aonaiti kekapo 'aunimiti hauna Tiramana katota'u aina.

⁶Komure ima pahakawanakia 'arakia toea rua mo. 'A Tirama hanona weiakia ha a'i ereana. ⁷'Abi tohana, bui bita aramiatiti haukia abaiti etuabititi orenakia. A'i katota'u, wai hanona komure bo'okia abaiti totara haonakia.

Iesu Pouna Kahahinana, Ia A'i Kahahaumaea.

(Mt 10.32, 33; 12.32; 10.19, 20)

⁸“Au wai nahina benimiti. Hau ha au pou'u kehinana maearimiti wairakiaiti, Maearimiti Nahuna abomoti Tirama ena aneruti wairakiaiti ia pouna kehinana. ⁹'A maearimiti wairakiaiti au kebuniatina'u hauna abomoti Tirama ena aneruti wairakiaiti au ia kabuniatina.

¹⁰Hau ha Maearimiti Nahuna herenaiti ke'abititi ki'a hanona abaiti kehinana haona ia hau ha Auba Robe herenaiti ke'abititi ki'a hanona a'i kehinana haona.

¹¹“Kateaoainimiti marea obiakititi rauhutu mai hiabu haukia wairakiaiti raninaiti, aomuti a'i kearoti 'araiti ekia 'abititi aea kobamuti aihonaiti 'ao oititi aea ko'abititi aihoti. ¹²Pokina ranititi weianaiti Auba Robe kehore oititi tabaiti ko'uahina hauna abaiti keba'iobinoti'o.”

'Abi Iabataiti Kepu Hauna Ao'abaeana.

¹³To'u aonaiti hau ha Iesu ehinaiti benaiti etibahaiti, “Ba'iobititi haumuti e. A'a'u mohinaiti benaiti emaiti kohuti hamamaiti e'ariti boinakia haukia tararua baitamaiti aititi mewatenakia.” ¹⁴Iesu ia ena 'abititi ebamutenaiti etibahaiti, “Hau e, taiti au eaiti taeanaiti emi bakaiti kababainaiti abomoti emi kohuti kawatenakia?” ¹⁵Ba maearimiti ehinaiti benakititi etibahaiti, “Kato'inibenititi harainimiti kohuti a'iti katouhoreaiti ki'a bahaiti, pokina maearimiti ena maurititi tohana hanonaiti ena kohuti bo'onaiti a'iti nimaiti.”

¹⁶Iesu 'abititi ibabataiti ha ehinaiti benakititi. “Herenaiti keputi ebo'oti hauna ha ena hanonaiti uma anikititi bo'onaiti etabuiti ahinakititi. ¹⁷Ba kiponaiti aonaiti eraonaiti raonaiti etibahaiti, “Tabaiti kababainaiti? 'Eka aha'iti, 'ekaiti tabanaiti e'u ube kahorotinakia.” ¹⁸Haeamonaiti etibahaiti, ‘Na kababaiti aihoti, paraboa 'aiti'ainaiti karubunaiti apa'uana ha mahamahana kababainaiti, ba e'u birauraiti anianititi ubekia mai e'u kohuti ikoikiaiti weia kahorotinakia. ¹⁹Au kipou'iti ka'abititi katibahaiti, “Au hanonaiti tabaiti namokititi here'u abaiti ebo'oti haraiti aro'anakititi ihauti bo'okititi 'eukia. Bariuti karaiti kanianititi kainuinuiti kaonamoti haraiti.” ²⁰'A Tirama ehore ehinaiti benaiti etibahaiti, ‘Po'oti haumuti e! Bariuti raiti neianaiti au oititi emu maurititi ka'iti obonaiti raninaiti naitiakititi oro'anakititi haukia hanonaiti taiti kea'inakititi?’ ²¹Ba Iesu ena 'abititi orenaiti etibahaiti, “Neianaiti hanonaiti maearimiti ha kiponaiti ena tabaiti nibararonakia ia kiponaiti 'eunaiti, ia Tirama wairaiti hanonaiti ena ibararoti a'iti ebo'oti.”

Aomiti A'iti Kearoti'ariti.

(Mt 6.25-34)

²²Ba Iesu i'abana haukia ehinaiti benakititi etibahaiti, “Weianaiti buonaiti au wai nahina benimiti. Emi maurititi paunaiti tabaiti patoana 'ao haumiatiti tabaiti

patobatotona hauna aomi a'i kebaro 'arina. ²³Pokina mauri hanona eapa'ua ba aniani hauani abomo eapa'ua ba habuni. ²⁴'Aokakara katoraonanakia. Aniani a'i tibato 'ao eueu berauranai aniani a'i tibararo abomo ekia reera 'ekana aha'i ia Tirama akia nibenakia. Ia wai hanona roborobo totara haonakia. ²⁵Oi tai ha emu ao aro'ariai haumu papana pebahoma'ana hanona petaina, 'ao? ²⁶Weiana taba papakia neiakia ibabaikia a'i to'ioi raninai aehoma buonai taba haeai haeai aomi tibararo 'arinakia.

²⁷“Bebetu ti'omu hanona katoihanakia. Kipokia habuni akana a'i tibabaina. Ia au wai nahina benimi. Solomona obia arana ena habuni tenuabi ki'a, iamo bebetu neiana hanona enamo ki'a baha ba Solomona ena habuni. ²⁸Tirama kipona hano tubukia nibataitainakia bariu timauri mara kate'ororo irubai kahakapo 'aunakia kate'ara. Tirama ehore ua nibataitai aihonakia, ia wai habuni a'i nibabatotonimi, u? A'ikakauma papana haumi. ²⁹Aomi taba patoana mai patoinu hauna a'i katotabuna, weiakia aomi a'i katebaro 'arina. ³⁰Hanopaka neiana aonai Tirama a'i tia'ikakaumana haukia ikoikiai taba neiakia titabunakia, ia Hamami kupai hauna taba neiakia tonuatae ainakia ikoikiai aba e'ioibinakia. ³¹Tirama ena obia aiarana katotabu 'uaina hanona neiakia ikoikiai wai kebenimi.”

³²“To'u papana haumi e. A'i katota'u, pokina Hamami mai aonamona ena aiara kebenimi. ³³Emi kohu katokawa kawainakia monikia ururu haukia katobenakia, a'i neki'a 'apua maha ihiua ihiuana katoba'oruna 'eumi, kupa kepuna a'i niore 'apua hauna katoa'ina. Bainao ha weia a'i niao abomo muhi taba weia ha a'i tia'i ki'ana. ³⁴Pokina emi kepu nemiaho 'ekana hanona wai aomi abomo weia.”

Ta'ara'i Hauna Namona Nibai'ima.

(Mt 24.45-51)

³⁵“Emi habuni katohai 'ininakia abomo emi ramepa hanona katoba'aranakia katobai'ima. ³⁶Wai hanona ihobona bai'ima haukia 'abakia, ekia poki hauna hawainibe mahamaha 'ekana kemue kemai te'imana. Ba kemai pa'abi kehara harana raninai pa'abi beronai mo katekaikauna. ³⁷Ta'ara a'i haukia tibat'ima oho aonai ekia poki hauna kemai ketabu ahinakia hanona enamo. 'Abi tohana au wai nahina benimi. Poki hauna kipona ena habuni kehai 'inina ekia aniani 'ekana kebamiatinakia, kero'onakia ekia aka kebabaina. ³⁸Rabi wapuka'a 'ao kokoro'u ti'arara aonai ta'ara a'i haukia tibat'ima oho aonai ekia poki hauna ketabu ahinakia hanona tenamo.

³⁹Neiana kato'ioi haraina. Itu poki hauna bainao hauna ena mai ranina ke'ioi 'uaina raninai ena itu ke'imana a'i kepa'a. ⁴⁰Wai abomo katoba'oru, pokina a'i to'ioibina rani tabanai Maearima Nahuna kemai.”

'Abi Ibabataina, Aka Hauna Namona Mai Aka Hauna Ki'a Obona.

⁴¹Petero Iesu ebakaina etibaha, “Obiapaka e, 'abi ibabatatai neiana ai ikupaiamai heremai ai nohinana 'ao maearima ikoikiai abomo?”
⁴²Obiapaka e'abi etibaha, “Tai aia iona mai ao bero hauna, ia ena poki hauna hiabu ebena ena itu kohukia keiha 'ini, weia ta'ara a'i haukia ekia aniani beraurakia tohakiai kebenakia? ⁴³'Ima'ima hauna weiana ena poki hauna ena mueai ua niaka harai aiho ketabu ahina hanona enamo. ⁴⁴'Abi tohana au wai nahina benimi. Poki hauna kehore 'ima hauna kebabokina ena koku ikoikiai ke'imanakia. ⁴⁵Ia 'ima'ima hauna kipona ke'abi ketibaha, “E'u poki hauna a'i kemai baha,” ba ia kehore ta'ara a'i haukia mai babi'ekia ke'atinakia keani ani keinu inu keinu 'ari. ⁴⁶Rani ha 'ima'ima hauna a'i eraonana a'i eba'oru aonai ena poki hauna kekara'au hanona ia kekabe kabe hurina, puma kebena matoha aia a'i tiona haukia 'abana.

⁴⁷“'Ima'ima hauna ena poki hauna ena nuatae akana e'jobina kebabaina ia a'i eba'oru mai a'i ebabainakia, hau weiana hanona i'ati bo'ona katebena. ⁴⁸'A 'iobi aha'i hauna ena aka ki'a 'arana hanona kate'atina ia i'ati 'ama'amana katebena. Taba bo'ona tebena hauna herenai taba bo'ona katenuataeai, taba bo'ona ke'imanakia hauna herenai taba bo'ona katenoiai.”

Iesu Emai Hanona Baiata Kehorena.

(Mt 10.34-36)

⁴⁹“Au hanona iruba amaiaina hanopaka ahanai, e'u nuatae pe'ara biai. ⁵⁰Au hanona 'uererobe ha ka'ina weiana kaopuma aina keaomo kabaore haraina. ⁵¹Wai turaonana Au amai hanona baibua amaiaina hanopaka, 'u? Au wai nahina benimi, aha'i. Baibua aha'i ia hoa hore. ⁵²Bariu wairaka kahaeaoaina, rama ha aonai haukia ima baiatakiai katehoa hore, aihau katehore rua kate'oatanakia abomo rua katehore aihau kate'oatanakia. ⁵³Ia baiatakiai katehoa hore, hama kehore nahu hauna ke'oatana, nahuna kehore hamana ke'oatana, hina kehore nahuna babi'ena ke'oatana, nahu babi'ena kehore hinana ke'oatana, hinana kehore rawana babi'ena ke'oatana, rawa babi'ena kehore hinana ke'oatana.”

Maearima Rani Tabana Obo A'i Teobo.

(Mt 16.2, 3)

⁵⁴Iesu haeamona to'u haukia ehina benakia etibaha, “Tibotaina tainai 'auhao ha kemikiri katoihana raninai beronai kato'abi katotibaha, 'Abara ketibo,' hanona nirama. ⁵⁵Ahitai tibo baurana niabu raninai wai tu'abi totibaha, 'Beraura kehiabu,' hanona nirama. ⁵⁶Bahaorea haumi e. Wai hanopakai mai kupai taba Tirama hanona 'abikia to'iobi, ia aehoma buonai bariu rani neianai nirama hauna 'abina a'i to'jobina?

Bakaiai Ehorotini'o Hauna Ohi Emi Atetua Kobaberona.

(Mt 5.25, 26)

⁵⁷“Aehoma buonai wai kipomi ibaberomi raonana a'i tubabaina? ⁵⁸Oi behoi ehorotini'o hauna keaoaini'o bakai 'ekana, a'i niaoi bahani'o bakai 'ekana raninai taeara namona kotabuna torarua emi atetua kobaberona, keaha'i raninai keaoaini'o kebabakaini'o hauna herenai, ba ia kehore keaoaini'o habuni hauna herena, ba habuni hauna wapura 'ekanai kehorotini'o. ⁵⁹Au wai nahina benimi, weia a'i katokarahi 'apua keaomo 'ara maikoinai katohore orena.”

Iesu Maearima Ehina benakia Kateraona Kabe.

13 ¹Rani weianai baika Iesu haianai Galilea haukia poukia tehinana, ekia ibeni tibabaina Tirama herenai raninai Pilato ena huari haukia euhunakia teahu 'arinakia aruarukia mahi aruarukia kipokia teutena. ²Iesu ekia 'abi ebamuena etibaha, “Pokina Galilea haukia weiakia ua teahu aihonakia, wai turaonana Galilea haukia weiakia te'ari haukia ekia ki'a teapa'ua ki'a baha ba Galilea temiaho haukia ekia ki'a? ³Au wai nahina benimi. Aha'i. Wai a'i katoraona kabe raninai, ikoimiai hanona ua kato'ari aiho. ⁴Wai turaonana weiakia haukia harauhaea 'ababani Siloama ai itu ro'ena epobu aonai te'ari haukia ekia ki'a teapa'ua ki'a baha ba baika Ierusalema ai temiaho haukia ekia ki'a? ⁵Au wai nahina benimi. Aha'i. Wai a'i katoraona kabe raninai ikoimiai hanona ua kato'ari aiho.”

'Abi Ibabataina, Matiu Ki'a Obona Buana Aha'i.

⁶Iesu 'abi ibabatatai ha ehinana etibaha, “Hau ha suke matiuna ha ebatona ena bine haharuana aonai, muriai eao buana erarainakia ia ha a'i etabu ahina. ⁷Weiana ia haharua ne'imana hauna ehina bena etibaha, 'Ihau aihau nakai mue matiu neiana buana ararainakia, ia ha a'i natabu ahina. Mo'ui rabu taina. Taba buonai hano namona kebaore 'abaeana?’ ⁸Haharua ne'imana hauna etibaha, 'E'u poki haumu e. Mohabo 'abaeana ihau neiana hamona memiaho. Au pokina ka'ani kakaiarona kabahuna. ⁹Ihau wairai buana baika katerama hanona enamo, aha'i raninai ia hanona i'ui kea'ina.’”

Beraura Robenai Iesu Kapena Ebarara Babi'ena Ebanamona.

¹⁰Beraura robenai Iesu Iuda haukia ekia marea ha aonai eba'iobi, ¹¹babi'e ha weia auba ki'a obona ha ehore ebainawana ihauna harauhaea 'ababani kapena ebarara, kipona kebaberonan hanona a'i etaina. ¹²Iesu babi'e weiana eihana raninai eaparina etibaha, “Babi'e e! Aba enamo. Emu inawa aba epua.” ¹³Weiana Iesu imana babi'e ahanai ehao 'au

raninai, beronai kapena ebero, ba emikiri Tirama ebanamona. ¹⁴Marea poki hauna eopuere, pokina Iesu beraura robenai ebamauri paunai. Ia maearima ehina benakia etibaha, “Wapu 'abaihau hanona wai emi aka wapukia. Beraura weiakiai katomai kebamaurinimi, ia beraura robenai aha'i.” ¹⁵Obiapaka ia ena 'abi ebamuena etibaha, “Wai bahaorea haumi! Wai ha Beraura robenai emi poromakau 'ao emi toniki 'ekakiai a'i torubunakia bei 'urina a'i tuaoinakia, u? ¹⁶Babi'e neiana hanona Aberahamo ena itubu babi'ena. Satani ia ebainawana ihauna aba harauhaea 'ababani. Ba Beraura robe aonai ia bamauri a'i pea'ina, u?” ¹⁷Iesu ia ena 'abi ua ebamue aihona hanona ti'oatana haukia ikoikiai tehaumaea ki'a, 'a to'u haukia ikoikia teonamo aka nuabikia weiakia ebabainakia paukiai.

'Abi Iabataina Tuaba Uhona.

(Mt 13.31, 32; Mk 4.30-32)

¹⁸Iesu ebakai bakai etibaha, “Tirama ena obia aiarana ibabataina taba? Tabai kababataina? ¹⁹Ia hanona ihobona tuaba uhona papana, weiana hau ha ea'ina ena umai ebatona e'omu matiu rarina eao renai 'ubi roborobokia ekia ni'i terobenakia.”

'Abi Iabataina Bakupu Muramurana.

(Mt 13.33)

²⁰Haeamona e'abi etibaha, “Tirama ena obia aiarana tabai kababataina? ²¹Ia hanona ihobona bakupu muramurana, weiana babi'e ha ea'ina parawa bo'ona uro aonai kipokia euta haeamona, euna eaomo maikoinai ekupu.”

Tirama Ena Obia Aiarana Taearana E'omo'omo.

(Mt 7.13, 14, 21-23)

²²Iesu ena kaoao Ierusalem taearanai eao aonai, aiara apa'uakia mai papakia aokiai maearima eba'io binakia. ²³Hau ha Iesu ebakaina etibaha, “Obiapaka e! Maearima tebabita 'akimo katemaui, 'ao?” Ia ena 'abi ebamuena etibaha, ²⁴“Katotabura katoao pa'abi 'omo'omonai katototo. Pokina au wai nahina benimi, maearima bo'ona katenuatae katetoto ia a'i ketainakia. ²⁵Itu poki hauna kemikiri pa'abi kekaiabuna murinai, wai atapakai katokoroti ba pa'abi katohara harana katotibaha, ‘Obiapaka e, pa'abi mokaikauna tamatoto.’ ‘A ia emi 'abi kebamuena ketibaha, ‘Wai ae'eai tomai, au a'i a'io binimi.’ ²⁶Ba wai kato'abi katotibaha, ‘Ai oi kipokia hanona haniani mai hainuinu haeamo, abomo emai aiarai oba'io bi.’ ²⁷A ia ketibaha, ‘Wai ae'eai tomai, au a'i a'io binimi, ki'a ibabaina haumi ikoimiai tomokatu'a here'uai.’ ²⁸Weia mahami keao Aberahamo, Isako, Iakobo mai mahabanai haukia ikoikiai

Tirama ena obia aiaranai katoihanakia, ia wai aba katetori ahinimi atapakai raninai, wai hanona katohai 'aki 'akimi katoarao'i arao'i. ²⁹Maearima hanona taetanai tibo tainai mai toto tainai ahi tainai katemai tatu 'ekana katemiati Tirama ena obia aiarana aonai. ³⁰Ba baika temurihai haukia hanona kate'uai, ia baika te'uai haukia hanona katemurihai.”

Iesu Ierusalemema Eaoko'o aina.

(Mt 23.37-39)

³¹Rani weianai Parisea haukia baika temai Iesu herena tehina bena tetibaha, “Eka neiana kohabona koao 'eka haeai, pokina Heroda nenuatae keahu 'arini'o.” ³²Iesu ekia 'abi ebamuena etibaha, “Tomoao, waeha 'aki weiana katohina bena. Au bariu mara hanona auba ki'a obokia nau'u ahinakia mai inawa haukia nabanamonakia, ba rani ibaihaunai e'u aka maikoinai kabaorena. ³³A au bariu mara mai erani hanona kaka'a kaeao, pokina mahabanai hauna hanona 'eka haeai a'i ke'ari, ia Ierusalem mai mo.”

³⁴“Ierusalemema e, Ierusalemema e, oi ohore mahabanai haukia oahu 'arinakia, abomo Tirama euhunakia haukia piharai oahu 'arinakia. Rani bita au anuatae nahumu ikoinai ka'umu abunakia matoha kokoro'u hina nahuna ne'umu abunakia 'abana, ia wai hanona a'i tonuatae aina'u. ³⁵Weiana emu itu hanona ke'aburu. Au wai nahina benimi, a'i katoiha muena'u keaomo rani ha kemai ba katotibaha, ‘Obiapaka atanai nimai hauna hamabanamona.’ ”

Iesu Beraura Robeai Hau Ha Ebanamona.

14 ¹Beraura robena ha ai Iesu eao Parisea ekia poki hauna ha ena ituai kateaniani haeamo, ba baika hanona ia teiha 'ini haraina. ²Weia bua haiarana hauna ha Iesu wairanai emiati. ³Iesu emikiri Parisea haukia mai rauhuhu poki haukia ebakainakia etibaha, “Kahabamauri Beraura robenai hanona mai rauhuhuna 'ao aha'i?” ⁴A ia 'abi ha'i tehinana. Ba Iesu emikiri hau weiana ea'ina ebamaurina euhuna eka'a. ⁵Haeamona ehina benakia etibaha, “Wai ha beraura robenai nahumu 'ao emu poromakau 'uriai petoa raninai, a'i ponoanoa ia a'i poberi 'auna, u?” ⁶Ena 'abi katebamuenta taearana aha'i.

Kipomu A'i Kobapa'uani'o.

⁷Iesu baki haukia ekia miati 'ekakia namokia tetina'anakia eihanakia raninai, 'abi ibabatai neiana ehinabenakia. ⁸“Hau ha ena beaubeau kemai heremu ena hawainibe tatuna koao raninai, miati 'ekana namona 'akinai a'i komiati, pokina a'i o'iobina tatu poki hauna oi aramuai hauna ha aba ehina bena. ⁹Tatu poki hauna torarua ebeaunimi hauna kemai heremu kehina beni'o ketibaha, 'Imia'au

naiana mohabona, hau neiana naia kemia'au.' Ba oi hanona mai haumaeamu koao muriai temiati haukia herekiai wa'a katomiati. ¹⁰A beaubeau kemai heremu raninai koao muriai komiati, ba ebeauni'o hauna kemai heremu ketibaha, 'E'u hau e, oi emu imia'au hanona neiana 'ubiai.' Tatu weiana aonai tetoto haukia ikoikiai oi mo katebanamonio. ¹¹Hau ha kipona kebapa'uana hanona katebaririna, 'a kipona kebaririna hauna hanona katebapa'uana."

Emu Tatu Aonai Uraru Haukia Kobeauakia.

¹²Iesu tatu poki hauna ehina bena etibaha, "Atiaha 'ao rabirabi anianina koba'oruna raninai, emu hau, uaho'abamu, hatia'amu 'ao obia haukia a'i kobeauakia, pokina ia abokiamo oi katebeauni'o 'eumu 'arana katehorena. ¹³A oi tatu ha kobabaina raninai, uraru, kaiti, 'ome mai 'iau haukia kobeauakia. ¹⁴Weianai oi banamo koa'ina, pokina 'eumu 'arana a'i katehorena, ia aka bero haukia ibamikiri muekiai 'aramu koa'ina."

Ori Iabataina Tatu Rarina Ha.

(Mt 22.1-10)

¹⁵Weia kipokia tianiani haeamo hauna ha aia neiana eona, ba ia Iesu ehina bena etibaha, "Tirama ena obia aiaranai kateaniani haukia hanona katenamo." ¹⁶Iesu ena 'abi ebamuena etibaha, "Hau ha tatu rarina 'akina ha ebabaina, ba maearima bo'okia ebeauakia. ¹⁷Tatu anianikia teba'orunakia aonai, ena ta'ara a'i hauna euhuna enuatae ainakia haukia kehina benakia etibaha, "Tomai taba ikoikiai aba te'oru." ¹⁸A ia ikoikiai teubo. Ba kori'uaina hauna ta'ara a'i hauna ehina bena etibaha, 'Au hanona hano ha akawana, ua buonai kaeao kaihana. Emu poki hauna kohina bena, a'i kawahi.' ¹⁹Ha etibaha, 'Au hanona bariumo e'u poromakau harau haea akawanakia, ba aba naeao kabahobonakia, emu poki hauna kohina bena, a'i kawahi.' ²⁰Haeamona ha etibaha, 'Au hanona bariu mo ahawainibe, buonai a'i kawahi.'

²¹"Ta'ara a'i hauna emue emai ena poki hauna eba'jobina, ba poki hauna eopuere wairai, ena ta'ara a'i hauna euhuna etibaha, 'Moao biai aiara ibuakiai mai ikariri 'ekakiai, uraru haukia, kaiti haukia, 'iau haukia, 'ome haukia komaiainakia.'

²²"Ba ta'ara a'i hauna eao aka weiana ebabaina emue emai ia ehina bena etibaha, 'Poki haumu e, ohina bena'u akana aba ababaina, ia miati 'ekana mo a'i ebonu.' ²³Ba poki hauna haeamona ena ta'ara a'i hauna ehina bena etibaha, 'Moao aiara aokiai mai ara pokikiai temiati haukia komaiainakia, e'u itu katemia bonuna. ²⁴Au wai nahina benimi. Abeau 'uainakia haukia ha au e'u tatu anianina ha a'i kateani 'apuana.' "

Koraona Harai 'Uaina Ba Iesu Murinai Ko'au.

(Mt 10.37, 38)

²⁵Mako rarina Iesu kipokia teao, ba ekori kabe ehina benakia etibaha, ²⁶"Hau ha here'u kemai raninai ia hamana 'ao hinana, atawana 'ao

nahuna, uaho'abana 'ao haibuna, abomo ia kipona ena mauri keraona apa'uana hauna au i'aba'u ai a'i keao. ²⁷Abomo hau ha kipona ena matiu ibiri ropo a'i kebuana muri'u a'i kemai hauna hanona au i'aba'u haunai a'i keao.

²⁸“Wai ha nonuatae itu ro'ena ha kobakorina raninai, oi komiati 'arana bita hanona kobahu 'uaina, itu weiana kobaorena monina aba ketaina, 'ao? ²⁹Itu weiana ebabai ramana, hoborona ebakoroti ia 'ubina a'i kebaorena raninai kateihana haukia ikoikiai kateiriri aina, ³⁰kate'abi katetibaha, 'Hau neiana ena itu akana ea'i ramana, ia kebaorena hanona a'i etaina.’

³¹“Ihobona obia 'arana ha pemikiri obia 'arana ha pehuari bena raninai, pemiati 'uai peraona raona ia ena huari haukia taha harau haea ai kehore huari haukia weiakia taha harau rua timai haukia kehuari benakia hanona aba ketaina 'ao? ³²A'i ketaina raninai, weia atau'ai temiaho oho aonai, ena iuhubeau hauna ha keuhuna keao, baibua 'abina katerobahu aina. ³³Ihobonaimo wai ha emu taba ikoikiai a'i kohabonakia raninai, oi hanona au i'aba'u haumuai a'i koao.

Kikimaru Ena 'Aku'aku A'i Me'akauma.

(Mt 5.13; Mk 9.50)

³⁴“Kikimaru hanona taba namona, ia kikimaru 'aku'akuna ke'akauma raninai aea kahaba'aku mue aihona? ³⁵Ia hanona hano mai batobato tabakia ibanamokia tabanai aha'i, ia hanona kahane'ena mo. Mai haiana hauna hanona ke'iohina.”

Ori Ibabataina Mamoe Eka'a 'Akaumana.

(Mt 18.12-14)

15 ¹Moni bararo haukia mai aka ki'a haukia ikoikiai temai Iesu herena aiana kateona. ²A Parisea haukia mai Rauhuhu poki haukia hanona teururu tetibaha, “Hau neiana hanona aka ki'a haukia nia'i taeanakia mai kipokia 'eka hamonai tianiani.”

³Weianai Iesu ehore 'abi ibabatai neiana ehinana ia herekiai e'abi etibaha, ⁴“Hau ha wai baiatamiai ena mamoe hinabu hamomona. Ia hamona pe'akauma raninai, imabui baria bui 'ababani hamomo 'eka 'abaeana pehabonakia, ia weiana e'akauma hauna murinai peao petabuna petabu ahina. ⁵Petabu ahina raninai aronai pebuana mai aonamona, ⁶peaoaina ena aiara. Ena hau mai herenai temiaho haukia pebeaunakia, patemai herena pehina benakia petibaha, 'Hamaonamo haeamo, pokina e'u mamoe e'akauma hauna aba atabu ahina.’ ⁷Au wai nahina benimi. Ihobonai mo weia kupai aonamo keapa'ua, pokina neia ki'a hauna hamona eraona kabe paunai, ia bero haukia weiakia imabui bariabui 'ababani hamomo raona kabe a'i tenuatae aina haukia paukiai aha'i.

Ori Ibabataina Koini E'akauma.

⁸“Babi'e ha ena Kina harau haea, ba hamona peba'akaumana raninai, ramepa peba'arana, ena itu aona petarona, 'eka maikoina peiha haraina peaomo petabu ahina. ⁹Petabu ahina raninai, ena hau mai herenai temiaho haukia pebeaunakia, patemai herena, pe'abi petibaha, 'Hamaonamo, pokina e'u koini hamona e'akauma hauna aba atabu ahina.’ ¹⁰Au wai nahina benimi. Ihobonai mo, ki'a hauna hamona keraona kabe raninai, Tirama ena aneru wairakiai aonamo keapa'ua.”

Ori Ibabataina Miori Eka'a 'Akaumana.

¹¹Iesu haeamona etibaha, “Hau ha nahuna rua. ¹²Miori i'irina hamana ehina bena etibaha, 'Hama'u e, emu kohu powatenakia, au 'eu'u hanona kobena'u.’ Weiana hamana ehore ena kohu ewatenakia terarua herekiai. ¹³Wapu baika teao murinai, miori i'irina ena taba ea'i a'i harai, emikiri eao hanopaka haeai ha, weia mauri ki'a obonai ena kohu epapurai 'abaeanakia. ¹⁴Ena kohu ikoikiai ebaorenakia murinai, hano weianai arobo rarina ekara'au, ia hanona aba neuraru. ¹⁵Ba emikiri eao hano weiana hauna ha herenai emiaho, hau weiana ehore euhuna eao aiporo 'ima 'ekana'i aiporo e'imanakia. ¹⁶Mare'a e'ari buonai aiporo ekia aniani harua peani nuana ke'ini hauna eraonana, ia tai ha aniani a'i ebena.

¹⁷“Weiana ia eraona raona harai aonai etibaha, 'Hama'u hanona mai ena aka haukia tebo'o, mai ekia aniani harikia, 'a au neia mare'a keba'arina'u. ¹⁸Au kamikiri kaeao hama'u herena kahina bena katibaha, Hama'u e, Tirama wairanai mai oi wairamuai aba aka ki'a. ¹⁹Nahumuai kaeao hanona a'i ketaina, ia emu aka hauna ha ai kobaona'u.’ ²⁰Weiana emikiri keao hamana herena. Taearai nika'a oho aonai, hamana atau'ai mahana eao nahuna nimai eihana eaoko'o aina ebeau eao nahuna huanai era'una epauna. ²¹'A miori etibaha, 'Hama'u e, Tirama wairanai mai oi wairamuai aba aka ki'a. Nahumuai kobaona'u hanona a'i ketaina.’ ²²'A hamana hanona ena ta'ara a'i haukia ehina benakia etibaha, 'Tomoao, habuni namoabuna ha tomaiai biaina katobabatotona, imana kiri'unai rini ha katohorotina, mai tamaka abomo ha aenai katobaba'auna. ²³Aniani poromakauna nahu namona ha katomaiaina katoahu 'arina, kahatatu kahaonamo. ²⁴Pokina naha'u neiana hanona e'ari ia emauri mue, e'akauma ia atabu ahi muena.’ Ba aonamo tea'i ramana.

²⁵“Beraura weianai hau pakana hanona ua'a umai. Ena mueai, eao itu herenai hanona hui mai ewa 'urukia eo'o. ²⁶Ba emikiri ta'ara a'i hauna ha eaparina ebakaina, 'Weiana taba nirama?’ ²⁷Ta'ara a'i hauna e'abi etibaha, 'Oi hatimu aba emai, hamamu ehore aniani poromakauna nahu namona ha eahu 'arina, pokina ia hanona maurina abomo namona emue etabu ahina.’ ²⁸Hau pakana aona eopuere, ebaki'a a'i ekatoto. Ba hamana ekarahi eao

herena eba'amena. ²⁹A ia hamana ehina bena etibaha, 'Moihana! Ihau neiakia ikoikiai au oi ta'aramu a'i emu 'abi ha a'i abaki'ana. Ia oi nani nahu ha a'i obena'u, e'u hau kipokia a'i taonamo. ³⁰A nahumu naiana hanona rea babi'ekia herekiai emu kohu ebaorenakia hauna, emai aiara raninai omikiri aniani poromakauna nahu namona oahu 'arina ia 'euna.'

³¹“Hamana etibaha, 'Naha'u e, oi hanona rani ikoinai au here'uai omiaho, taba neiakia au 'e'u haukia ikoikiai hanona oi 'eumu. ³²Ia aika hanona kahaonamo, kahaonamo ki'a baha, pokina oi hatimu neiana hanona e'ari haeamona emauri, e'akauma haeamona hatabu ahina.’ ”

Ori Ibabataina Kohu 'Ima Hauna Ki'a Obona Ena Aotipa.

16 ¹Iesu ehore i'abana haukia ehina benakia etibaha, “Obia hauna ha mai ena kohu i'imana hauna ha, ba maearima baika tehore tehinau aina 'ima hauna hanona ena poki hauna ena kohu nipapura ainakia. ²Ba obia hauna emikiri eaparina emai ehina bena etibaha, 'Emu aka aonai hanona taba ha 'uruna aona, emu bai'ima akakia koba'jobina'u pokina oi e'u kohu i'imakiai hanona a'i ketaina.’

³“Kohu 'ima hauna aonai e'abi etibaha, 'Au bariu aea kababai aiho? E'u poki hauna aka neianai aba keba'okona'u, ka'ani ia a'i mo atapura kanoi ia e'u haumaeamo eabu. ⁴Au taeara ha aba naraonana aea kababai aiho. E'u akai kea'i obona'u raninai e'u hau baika katehore katea'i taeanau ekia ituai.’ ⁵Weiana ena poki hauna herenai tea'i 'abaea 'uai haukia ha ha eaparinakia. E'uai hauna ebakaina etibaha, 'Oi e'u poki hauna herenai oa'i 'abaea hanona bita?’ ⁶Ia etibaha, 'Tehoro puoukia hinabu hamomona.’ Ba 'ima hauna ehina bena etibaha, 'Oa'i 'abaea 'uai pepana neiana, momiati, naia pepai imabui korerena.’ ⁷Haeamona hau ibaruana ebakaina etibaha, 'Oi oa'i 'abaea 'uai hanona bita?’ Ia etibaha, 'Witi pute taha hamomona.’ Ia ehina bena etibaha, 'Oa'i 'abaea 'uai, pepana neiana, momiati, pepai hinabu 'ababani korerena.’

⁸“Poki hauna ehore 'ima hauna ena bai'oi akana ea'i taeanau, pokina aka weiana mai aotipana ebabaina. Bariu hanopaka neiana haukia ekia aotipa tehore ea haukia ekia aotipa tetara haonakia.

⁹Au wai nahina benimi, hanopaka ena obia tabakiai maearima kipokia katobaihau, ba wai heremiai kekaobo raninai miaho banai banai itunai katea'i taeanimi.

¹⁰“Aka papana ha ebabai haraina hauna kehore aka apa'uana abomo kebabai haraina, ba aka papana a'i ebabai haraina hauna kehore aka apa'uana abomo a'i kebabai haraina. ¹¹Hanopaka ena kohu ki'a obokia a'i kato'ima harainakia raninai, tai kehore kupa kohu namokia kebenimi kato'imanakia? ¹²Maearima haeai ekia kohu a'i kato'ima harainakia raninai, tai kehore emi kohu tohakia kebenimi?

¹³“Ta'ara'i hauna ha poki rua ta'arakia a'i kea'ina, pokina ha ke'oatana ha keraona'au aina, 'a ha ke'ini bena ha kebaooaina. Tirama mai kepu rani hamonai ta'arakia a'i katoa'ina.”

¹⁴Parisea haukia aia weiana teona raninai Iesu tebatæ aina, pokina ia hanona moni 'arikia ti'ari paunai. ¹⁵Iesu ehina benakia etibaha, "Wai hanona maearima wairakiai kipomi tobero na tuho, 'a Tirama hanona wai aomi e'iobinakia, pokina maearima tiaonamo ai tabakia hanona Tirama nibaoao ainakia.

Rauhuhu Mai Tirama Ena Obia Aiarana.

(Mt 11.12, 13; 5.31, 32; Mk 10.11, 12)

¹⁶"Rauhuhu 'abikia mai mahabanai haukia ekia 'abi hanona teiroro ainakia, emai mo Ioane Ba'uere Robe hauna ena raniai. Weiana murinai hanona Tirama ena obia aiarana pouna namona teiroro aina, maearima ikoikiai taburakiai taera tetabu katetoto.

¹⁷Kupa mai hanopaka kate 'akauma hanona e'ama'ama ia rauhuhu 'abina puana papana ha a'i ke'akauma 'apua.

¹⁸"Hau ha atawana kebakarahina haeamona babi'e mahamahana ha eatawana hanona nabau hoana ebabaina. Mai hau ha babi'e ibakarahi eatawana hauna abomo nabau hoana ebabaina.

Ori Iabataina Obia Hauna Ha Mai Noi Ba'ame Hauna Lasaro.

¹⁹"Kepu hauna ha weia habuni namoabukia ebatotonakia abomo rani ikoikiai aonamo tatukia ebagai. ²⁰Ena pa'abi 'akonai hanona uraru hauna ha enoti atana Lasaro, ia hauna etua tua obo, ²¹ena nuatae hanona kepu hauna ena itara ai aniani puapuakia ti'eho haukia ha peani. Waeha temai hauna tuakia tetemanakia.

²²"Rani emai aonai uraru hauna e'ari hanona aneru teaoaina Aberahamo herenai. Kepu hauna abomo e'ari tehorena. ²³Kepu hauna 'ari 'ekana^e weia haiara rarina 'akina aonai emiaho, ea'a taea atau'a 'akinai Aberahamo eihana, Lasaro hanona ia herenai. ²⁴Ia eapari etibaha, 'Hama'u Aberahamo e, moaoko'o aina'u, Lasaro mouhuna imana kiri'una beiai mekaihuna emai maea'u meba'amarina, pokina au hanona nahaiara ki'a baha iruba neiana aonai.'

²⁵"Ia Aberahamo e'abi etibaha, 'Naha'u e, koraonana emu mauri beraurakiai oi hanona taba namokia oa'i ia Lasaro hanona taba ki'a obokia ea'i. 'A bariu ia hanona niaonamo ia oi hanona nuhaiara.

²⁶Abonamo aika baiatakai hanona 'oura rarina 'akina ha nemiaho, neia haukia na a'i katewahi, naia haukia abomo ha a'i kemai neia.'

²⁷"Kepu hauna e'abi etibaha, 'Hama'u Aberahamo e, enamo, nanoini'o Lasaro mouhuna meao hama'u ena itu. ²⁸Pokina au uaho'aba'u ima weia, keba'iobinakia ia abokiamo haiara 'ekana neiana a'i tememai.'

²⁹Aberahamo e'abi etibaha, 'Mose mai mahabanai haukia hanona weia ia herekiai aiakia temeona.' ³⁰'A ia e'abi etibaha, 'Aha'i, hama'u Aberahamo e, ia hau ha 'ariai pemikiri peao herekia raninai aba kateraona kabe.'

^e 16.23 'ao *Hades*.

³¹“Aberahamo e'abi etibaha, ‘Weia Mose mai mahabanai haukia aiakia a'i tiona raninai, neia 'ari hauna ha keao hanona aiana abomo a'i kateona.’”

Kebabehonakia Hauna Keki'a Wairai.

(Mt 18.6, 7, 21, 22; Mk 9.42)

17 ¹Iesu i'abana haukia ehina benakia etibaha, “Taba maearima kebabehonakia hanona aba timai, 'a hau weiana maearima behoi nihorotinakia hauna ki'ana. ²Penamo 'akonai iata rarina patetoba 'auna 'akuai patekapo uhuna, pokina papakia neiakia ha a'i mea'i ki'ana. ³Kipomi kato'ima 'ima harainimi, uaho'abamu ki'a kebabaina raninai, koao herena korobe haraina. Ia keraona kabe raninai, ena ki'a kohina hao. ⁴Beraura hamonai rani 'abaihau hamomo heremuai ki'a kebabaina, haeamona kemue heremuai rani 'abaihau hamomo ke'abi ‘Au naraona kabe.’ raninai, ena ki'a kohina haonakia.”

Ta'ara'i Hauna Ena Aka.

⁵Iuhubeau haukia Obiapaka tehina bena tetibaha, “Emai a'ikakauma pobapa'uanakia.” ⁶Obiapaka ekia 'abi ebamuena etibaha, “Pe wai emi a'ikakauma matoha sinapi uhona papana 'abana raninai matiu rarina neiana patohina bena, bariu mounu 'auni'o moao 'akuai mo'omu hanona aiami pea'i taeana.

⁷“Turaonana, wai ha emu ta'ara'i hauna 'ani 'ao mamoe 'ima 'ekanai pemei raninai, pohina bena potibaha, ‘Omai biai momiati moaniani?’ ⁸Aha'i, ua a'i po'abi aiho, ia po'abi, ‘E'u aniani kokai'auna koba'oruna, koa'ia'i harai ko'imana'u, au kaniani e'u arera kainu kepua murinai, ba oi koaniani emu arera koinu.’ ⁹Ehina bena akakia ebabainakia paunai ena ta'ara'i hauna banamona kebena? Aha'i. ¹⁰Ihobonai wai abomo ehina benimi akakia ikoikia tobaorenakia raninai kato'abi katotibaha, ‘Ai hanona ta'ara'i 'abaeamai, emai aka ohina benamai hauna mo tababai.’”

Iesu Morumoru Haukia Harau Haea Ebanamonakia.

¹¹Iesu taearai eka'a eao Ierusalem aonai, Samaria mai Galilea baihoakiai ekabanai. ¹²Aiara papana ha ai ekatoto aonai, morumoru haukia harauhaea kipokia te baitabu ahi. Ia atau'a tainai tekoroti, ¹³Iesu teaparina teio aota tetibaha, “Iesu poki haumu e, moaoko'o ainamai.” ¹⁴Iesu eihanakia raninai ehina benakia etibaha, “Tomoao, robe haukia herekia haumi katobaihanakia.” Ba tiao herekia aonai hanona haukia tenamo. ¹⁵Baiatakiai hau hamona hauna eihana aba enamo hanona emue emai Tirama ebanamona aiana 'ubi tohanai. ¹⁶Hau weiana Iesu wairanai ekai pehu ebanamona, ia hanona Samaria hauna. ¹⁷A Iesu ebakaina etibaha, “Haumi harauhaea tonamo, u? Ia 'ababani hamomo hanona

ae'e? ¹⁸Taba buonai rama haeai hauna neiana mo emue emai Tirama ebanamona?" ¹⁹Iesu Samaria hauna ehina bena etibaha, "Momikiri moao, emu a'ikakauma ehore aba ebamaurini'o."

Tirama Ena Obia Aiarana Ena Mai Ranina.

(Mt 24.23-28, 37-41)

²⁰Parisea haukia baika Iesu tebakaina tetibaha, "Tirama ena obia aiarana aita kemai?" Ia ekia 'abi ebamuena etibaha, "Tirama ena obia aiarana hanona matoha taba ha nahaihana hauna 'abanai a'i kemai.

²¹Hau ha a'i ketibaha, 'Moihana taba mo neiana' 'ao 'taba mo weiana,' pokina Tirama ena obia aiarana hanona wai aomia."

²²Iesu i'abana haukia ehina benakia etibaha, "Rani hanona nimai, emi nuatae Maearima Nahuna ena beraura ha hamona patoihana, ia mo a'i katoihana. ²³Maearima baika katehina benimi katetibaha, 'Tomoihana, hauna neiana.' 'ao 'Tomoihana, hauna weiana.' Ia a'i katoao, murikiai a'i katoka'a. ²⁴Maearima Nahuna ena mai ranina hanona matoha kupa ne'imare 'abana, bariu mo kupa abiranai ne'imare abamo niao kupa maikoina nibaeana. ²⁵Ia bariu kori 'uaina hanona katebahaiara ki'a baha, abomo uru neiana haukia katebaki'ana.

²⁶"Ihobona Noa ena raniai erama 'abana Maearima Nahuna ena raniai abomo ua kehoma. ²⁷Maearima hanona teani ani teinu inu hau mai babi'e tehawainibe eao mo Noa aunohi ai etoto, abara etibo tou ekarahi maearima maikoina tetono ore. ²⁸Lota ena raniai abomo uahomana, maearima hanona teani ani teinu inu tekawa kawa tebato bato mai itu terobe. ²⁹Rani weianai Lota Sodoma aiarana ehabona ekarahi murinai iruba mai pihara hiabukia kupa 'ubinai te'eho, maikoikiai teba'ari orenakia. ³⁰Maearima Nahuna kewaira tina ranina abomo ua kehoma.

³¹"Rani weianai, hau ha itu kapenai raninai ia a'i keriri itu aonai ena kohu a'i kea'i parenakia, ihobonai mo hau ha umai raninai ia a'i kemue ena aiara. ³²Lota atawana katoraonana! ³³Hau ha nenuatae ena mauri kea'i 'inina hanona ena mauri keba'akaumana, 'a ena mauri kene'ena raninai ena mauri kea'ina.

³⁴"Au wai nahina benimi, rabi weianai maearima rua 'ire hamonai kateparua, hamona kea'i taeana 'abana kehabona. ³⁵Babi'e rua 'eka hamonai witi iba'iti 'itina piharana katebaherena, ha kea'i taeana 'abana kehabona. ³⁶Hau rua umai kateaka, ha kea'i taeana 'abana kehabona." ³⁷I'abana haukia tehore tebakaina tetibaha "Obiapaka e, ae'eai?" Obiapaka ekia 'abi ebamuena etibaha, "Ari tabakia ae'eai hanona po'i abomo weia tito'u."

'Abi Iabataina Bakai Hauna Mai Wapu.

18 ¹Iesu i'abana haukia 'abi ibabatani ha ehinana kateraonana rani ikoinai kate bahuba'ari ia a'i katehau hororo. ²Etibaha, "Aiara

ha aonai bakai hauna ha emiaho, ia Tirama a'i eta'u aina haeamona maearima a'i eraonanakia. ³Aiara weiana aonai wapu ha abomo emiaho, rani ikoinai eao bakai hauna herena enoina etibaha, 'Mobaraina'u, e'oatana'u hauna herenai kobaberona.' ⁴Rani ehoma'a bakai hauna hanona eubo taba ha a'i ebabaina, muriai hanona kipona e'abi etibaha, 'Au hanona Tirama a'i nata'u aina abomo maearima a'i naraonanakia. ⁵Iamo wapu neiana nibaro 'arina'u paunai ena bakai ibaberona akana mababaina, a'i memue a'i mebaro 'arina'u.' ”

⁶Obiapaka etibaha, “Bakai hauna ki'a obona ena 'abi uruna tomo'ona. ⁷Tirama ea'i taeanakia haukia tiapari rabina tiapari ranina haukia ekia nuatae a'i kebaberonakia, u? Turaonana a'i kebarai noanoanakia, u? ⁸Au wai nahina benimi, Tirama kehore ekia nuatae kebabero noanoanakia. Ia Maearima Nahuna kemai raninai hanopakai a'ikakauma haukia aba ketabu ahinakia? Aha'i.”

Parisea Hauna Mai Takiti A'i Hauna Tebahuba'ari.

⁹Abomo Iesu 'abi ibabatai neiana ehinana maearima weiakia kipokia ekia aka bero Tiapa ainakia haeamona maearima haeai teiha hahanakia haukia herekia. ¹⁰“Hau rua teao Marea Robe aonai katebahuba'ari, ha Parisea hauna ha moni bararo hauna. ¹¹Parisea hauna hanona ekoroti kipona ahanai ebahuba'ari, 'Tirama e, au hanona oi nabanamoni'o, pokina au hanona hau baika 'abakia aha'i, kakikaki haukia, babai ki'a haukia, nabau haukia 'ao moni bararo hauna neiana 'abana aha'i. ¹²Au hui hamona aonai wapu rua nani robe, abomo e'u tabu ahi ikoikiai harauhaea aonai hamomona nabaibeni oi 'eumu.' ¹³A moni bararo hauna hanona atau'ai ekoroti, a'i ea'a taea kupa ia era'u ti'ou ekuti etibaha, 'Tirama e, moaoko'o aina'u, au hanona ki'a hau'u.' ”

¹⁴Iesu e'abi etibaha, “Au wai nahina benimi, moni bararo hauna hanona Tirama wairanai ebero ba ena itu eao, 'a Parisea hauna hanona aha'i. Pokina kipona ebapa'uana hauna Tirama kehore kebaririna, 'a kipona ebaririna hauna Tirama kehore kebapa'uana.”

Iesu Miori Papakia Ebanamonakia.

(Mt 19.13-15; Mk 10.13-16)

¹⁵Maearima baika tehore nahukia papakia teaoainakia Iesu herena ahakiai kehao'au, ia i'abana haukia teihanakia aonai terikenakia. ¹⁶Ia Iesu hanona miori papakia eparinakia temai herena ba e'abi etibaha, “Miori papakia hanona au here'u temai a'i tomo kaiabunakia, pokina Tirama ena obia aiarana hanona nahomakia haukia 'eukia. ¹⁷'Abi tohana au wai nahina benimi, hau ha Tirama ena obia aiarana ia'ina miori papana 'abanai a'i keao raninai, ia hanona a'i kekatoto 'apua.”

Kepe Hauna Iesu Ohi Te'abi'abi.

(Mt 19.16-30; Mk 10.17-31)

¹⁸Iuda haukia ekia poki hauna ha Iesu ebakaina etibaha, “Ba'ioi haumu namomu e, au taba kababaina hanona mauri banai banai ka'ina?” ¹⁹Iesu e'abi etibaha, “Taba buonai au namo'u ohinana, tai ha a'i enamo Tirama mo ikupaiana. ²⁰Rauhuhu aba o'ioibina, ‘a'i konabau, a'i koahu ahu, a'i kobainao, a'i kohinau bai'oi, hamamu hinamu komariki ainakia.’” ²¹Ia e'abi etibaha, “Rauhuhu naiakia hanona miori'u ai raninai a'ima harainakia emai mo bariu.” ²²Iesu aia weiana eona raninai ehina bena etibaha, “Taba hamona okapu aina hanona neiana. Emu taba ikoikiai kokawa kawa ainakia monikia uraru haukia kobenakia. Weianai kupa kohuna koa'ina, ba komai muri'u ai koka'a.” ²³A hau weiana 'abi eona raninai aona earo'ari pokina ia hanona eobia ki'a baha.

²⁴Iesu hau weiana ena ao aro'ari eihana ba e'abi etibaha, “Herekiai kepe tebo'o haukia Tirama ena obia aiaranai katekatoto hanona epahihi ki'a baha. ²⁵Herenai kepe tebo'o hauna Tirama ena obia aiaranai kekatoto hanona epahihi ki'a baha ba kamela kop^f ererenai kekuri banai.” ²⁶Aiana teona haukia tebakaina tetibaha, “Ba tai hanona mauri kea'ina?” ²⁷Iesu ekia 'abi ebamuena etibaha, “Taba katebabaina maearima herekiai a'i ketaina hauna Tirama herenai hanona ketaina.”

²⁸Petero, Iesu ehina bena etibaha, “Ai hanona emai taba ikoikiai tahabonakia, oi murimuai taka'a.” ²⁹Iesu ehina benakia etibaha, “'Abi tohana mo au wai nahina benimi, hau ha ena itu, atawana, uaho'abana, hamana, hinana 'ao nahuna ehaborakia Tirama ena obia aiarana paunai, ³⁰ia hanona bariu rani neianai taba bo'okia kea'i abomo wairanai rani kemai aonai hanona mauri banai banai kea'ina.”

Rani Ibaihauna Iesu Ena 'Ari Pouna Ehinana.

(Mt 20.17-19; Mk 10.32-34)

³¹Iesu i'abana haukia harauhaea rua ebakaparenakia haia hai'ai ehina benakia etibaha, “Aika hanona bariu kahakara'au Ierusalem, mahabanai haukia tererenakia haukia ikoikiai bariu Maearima Nahuna herenai katetoha. ³²Ia hanona rama haeai haukia imakiai kateutana, katebapo'ona, kateba opuerena, kate'atotina, kate'atina, mai kateahu 'arina. ³³A wapu ibaihaunai ia hanona kemikiri mue.” ³⁴Ia i'abana haukia taba neiakia obokia a'i teobo 'apua. 'Abi weiana anina ebuni ia herekiai, haeamona a'i te'ioibina ia hanona 'abi tabana nehinana.

Iesu Maha Ki'a Hauna Mahana Ebano'anakia.

(Mt 20.29-34; Mk 10.46-52)

³⁵Iesu Ieriko aiaranai aba kekara'au aonai 'iau hauna ha taeara haianai emiati ninoi ba'ame, ³⁶maearima bo'ona teka'a urukia eona,

^f 18.25 *nira*

ba ebakai bakai weiana taba nirama. ³⁷Tehina bena tetibaha, “Iesu Nasareta hauna nikabanai.” ³⁸Iau hauna eapari, “Iesu Davida Nahuna e, moaoko'o aina'u!” ³⁹Maearima wairai teka'a haukia terikena tetibaha, “Oi 'urumu.” 'A ia hanona eapari aota, “Davida nahuna e, moaoko'o aina'u!” ⁴⁰Iesu ekoroti ehina benakia hau weiana katemaiana herena. Ia emai herena raninai Iesu ia ebakaina etibaha, ⁴¹“Taba nonuatae oi heremuai kababaina?” Ia e'abi etibaha, “Obiapaka e, au e'u nuatae kaiha iha.” ⁴²Iesu ia ehina bena etibaha, “Mahamu temeno'a, emu a'ikakauma ehore ebanamoni'o.” ⁴³Beronai mo mahana teno'a, Tirama ebanamona, Iesu murinai eka'a, maearima ikoinai teihana haukia abomo Tirama tebanamona.

Iesu Mai Sakaio.

19 ¹Iesu Ieriko ai ekatoto nikabanai aonai, ²hau ha weia atana hanona Sakaio, takiti a'i haukia ekia poki ha, ia hanona kepu hauna. ³Ia ena nuatae hanona Iesu keihana, ia a'i etaina pokina maearima ebo'o ia hanona eko'o ko'o. ⁴Ua buonai ebeau 'uui eao matiui etae Iesu taeara weianai kekabanai hanona keihana. ⁵Iesu emai 'eka weianai ekarahi raninai ea'a taea eihana ehina bena etibaha, “Sakaio e. Moriri biai. Bariu rani neianai au hanona oi emu ituai kamiaho.” ⁶Ia beronai eriri biai mai aonamona Iesu eaoaina ena ituai ea'i taena. ⁷Maearima ikoiki ai teihana hanona teururu tetibaha, “Ia hanona aba ki'a hauna ena bakiai niao.”

⁸'A Sakaio ekoroti Obiapaka ehina bena etibaha, “Obiapaka e. Bariu e'u kepu abirana maikoinai uraru haukia kabenakia, abomo hau ha ena kepu a'i 'abaeana hanona rani bani ena kepu 'arana kabamuena.” ⁹Iesu ia ehina bena etibaha, “Bariu rani neianai bamauri hanona itu neianai aba ekara'au, pokina hau neiana ia abomo Aberahamo nahuna. ¹⁰Maearima Nahuna emai ena poki hanona te'akauma haukia ketabunakia kebamaurinakia.”

'Abi Ibabataina Aka Haukia Gold Monina Tea'ina.

(Mt 25.14-30)

¹¹Maearima aia weiana tiona aonai 'abi ibabatani ha ehina benakia pokina ia aba emai Ierusalem herenai abomo teraonana Tirama ena obia aiarana hanona aba kewaira tina. ¹²Ba Iesu etibaha, “Obia hauna ha eao hanopaka haeai weia ena obia arana hoana katebena ba kemue. ¹³A'i eka'a baha aonai ena ta'ara'i haukia harauhae eaparinakia, gold monikia atakia mina⁸ ha ha ebenakia etibaha, ‘Moni neiakia hanona katoaka ainakia keaomo au kamue.’ Ba eka'a.

⁸ 19.13 Helene monina, mina hamona hanona aka hauna nawa aihau 'arana 'abana.

14'A ena aiara haukia a'i tenuatae aina ekia iuhubeau baika teuhunakia murinai teao katetibaha, 'Ai hau naiana a'i tanuatae aina, emai obia 'aranai a'i keao.' 15Hau weiana obia 'arana hoana aba ea'ina emue emai raninai, ena ta'ara'i haukia moni ebenakia haukia eaparinakia aea teaka aiho hauna ke'iohina.

16Hau kori 'uaina emai e'abi etibaha, 'E'u poki haumu e, emu mina hamonai mina harauhaea atabu ahinakia.' 17Poki hauna ia ena 'abi ebamuena etibaha, 'E'u ta'ara'i haumu namomu e, obabai harai. Taba papana 'akina ia o'ima haraina buonai aiara harauhaea ekia obia haunai koao.'

18Hau ibaruana emai etibaha, 'E'u poki haumu e, emu mina hamona ahanai mina ima atabu ahinakia.' 19Poki hauna ehina bena etibaha, 'Oi hanona aiara ima ekia obia haunai koao.' 20Haeamona ta'ara'i hauna ha emai etibaha, 'E'u poki haumu e, emu mina hamona neiana, habuniai a'apana ahore buni haraina. 21Au oi ata'u aini'o, pokina oi hanona hau pahihimu, a'i ohoroti tabana nua'i parena haeamona a'i obato tabana nukabe hurina.'

22Poki hauna ia ehina bena etibaha, 'Ta'ara'i haumu ki'a obomu, emu 'abiai kababakaini'o, oi o'iohina au hau pahihimu, a'i ahoretina tabana na'i parena haeamona a'i abatona tabana nakabe hurina. 23Ba taba buonai e'u mina moni itunai a'i ohorotina, ba amue hanona ahanai ha patabu ahina.' 24Herenai tekoroiti haukia ehina benakia etibaha, 'Ena mina hamona tomopuhu boina, weiana mina harauhaea ehabaina hauna tomobena.' 25'A ia te'abi tetibaha, 'Poki haumu e, ia mina harauhaea aba imanai.'

26Ekia 'abi ebamuena etibaha, 'Au wai nahina benimi, maearima ha mai ena taba hauna bo'ona katebena, ia taba aha'i hauna hanona herenai papana nemiaho hauna abonamo katea'i obona. 27Abomo au e'u 'ou haukia, a'i tenuatae, au a'i kaobia haukia tomaiainakia neia, au waira'u ai katoahu 'arinakia.' ”

Iesu Ierusalemiai Ekara'au Obia 'Arana 'Abana.

(Mt 21.1-11; Mk 11.1-11; Io 12.12-19)

28Iesu 'abi neiakia ehinanakia murikiai e'uai ainakia Ieruselema teao. 29Eka'a eao Betefage mai Betani aiarakia aba herekiai Olibe oeonai, Iesu i'abana haukia rua euhunakia, 30ehina benakia etibaha, "Katoao aiara wairakai hauna aonai katokatoto, toniki nahuna ha ua'a tetoba 'auna katoihana, ahanai hau ha a'i nemia'au 'apua, katorubuna katomaiaina here'u. 31Hau ha kebakainimi, 'Taba buonai naiana torubuna?' Wai katohina bena, 'Obiapaka nenuatae aina.' ” 32Euhunakia teao haukia ehina benakia ihobonai mo tetabu ahina. 33Toniki nahuna terubuna aonai poki haukia tebakainakia, "Taba buonai doniki nahuna torubuna?" 34Ia ekia 'abi tebamuena tetibaha, "Obiapaka nenuatae aina."

³⁵Teaoaina Iesu herena, ekia habuni toniki nahuna kapenai teabari 'aunakia, ba Iesu emia'au. ³⁶Eao aonai maearima ekia habuni taearai teabarinakia. ³⁷Teao aiara aba herekiai, taeara Olibe oeonai eriri 'ekanei ti'abana haukia ikoikiai mai aonamokia teio Tirama tebanamona hiabu akakia ebabai teiha haukia paukiai. ³⁸Ia tetibaha,

“Aika eka Obia Arana Obiapaka
atanai nimai hauna hamabanamona.
Baibua kupai, nuabina hanona
'ubi 'akinai.”

Sal 118.26

³⁹Parisea haukia baika mako baiatakiai Iesu tehina bena tetibaha, “Ba'iohi haumu e, i'abamu haukia morikenakia temeunu.” ⁴⁰Iesu ekia 'abi ebamuena etibaha, “Au wai nahina benimi, neiakia kateunu raninai pihara kateio.”

Iesu Ierusalemia Ehaiaina.

⁴¹Iesu eka'a eao Ierusalemia herena tainai mahana eao aiara eihana raninai ehai aina. ⁴²Etibaha, “Terusalemia e, bariu rani neianai emu baibua pokina po'iohina hanona penamo, 'a mahamu ebuni. ⁴³Beraura weiana ketaina aonai, oi emu 'ou haukia 'anoai kekepirimu katekai kakaiarona, katekai kaironi'o, haia haia ikoikiai katekaiabunakia. ⁴⁴Katekaponi'o koao 'ano tohanai oi mai nahumu emu pihia aonai temiaho haukia maikoinai kate'ari ore, pihara ha a'i katehabona pihara ha ahanai pokina Tirama kemai heremu baurana a'i o'iohina.”

Iesu Kawakawa Haukia Marea Robe Aona Eu'u Ahinakia.

(Mt 21.12-17; Mk 11.15-19; Io 2.13-22)

⁴⁵Ba Iesu Marea Robe aonai ekatoto, weia tikawakawa haukia eu'u ahi ramanakia, ⁴⁶Ehina benakia etibaha, “Aba Puka Robenai ererena, 'Eu'u itu hanona bahuba'ari itunai keao', ia wai hanona kakikaki haukia ekia paparo'ai tubaona.”

⁴⁷Rani ikoinai Iesu Marea Robe aonai eba'iohi, 'a robe haukia apa'uakia rauhuhu poki haukia mai aiara obia haukia kipokia taearana tetabuna Iesu kateahu 'arina. ⁴⁸Taeara ha a'i tetabu ahina taba katebabaina pokina maearima hanona ia mo ena 'abi ai tearuru reana.

Iesu Tebakaina Hiabu Ae'eai Ea'ina.

(Mt 21.23-27; Mk 11.27-33)

20 ¹Rani ha Iesu hanona Marea Robe aonai maearima eba'iohinakia mai pou namona eiroro aina, robe haukia apa'uakia rauhuhu poki haukia mai aiara haukia apa'uakia kipokia tebahamomo tekara'au teao Iesu herena. ²Tehina bena tetibaha, “Mohina benamai, bero tabanai aka neiakia nubabainakia, tai bero neiana ebeni'o?” ³Iesu ekia

'abi ebamuena etibaha, “Au abomo wai kabakainimi, katohina bena'u. ⁴Ioane ena ba'uere robe hanona kupai emai 'ao maearima herekia emai?” ⁵Kipokia baiatakiai te'abi'abi aina tetibaha, “Kaha'abi 'kupai emai,' raninai ia ke'abi, 'Aehoma buonai a'i toa'ikakaumana?’ ⁶'A khatibaha, 'Maearima herekia emai,' raninai maearima neiakia piharai kateahunaka, pokina ia te'abi, 'Ioane hanona mahabanai hauna.’” ⁷Iesu ena 'abi tebamuena tetibaha, “Ai a'i ta'jobina ae'eai emai.” ⁸Iesu ehina benakia etibaha, “Au abomo wai a'i kahina benimi, taba neiakia tai ena beroai nababainakia.”

'Abi Iabataina Bine Haharua I'imana Haukia Ki'a Obokia.

(Mt 21.33-46; Mk 12.1-12)

⁹Ba Iesu 'abi ibabatai neianai maearima ehina benakia etibaha, “Hau ha bine haharuana ebatona, biraura haukia baika ea'inakia kate'imana, 'a ia hanona ekaobo rani homa'ana hanopaka haeai emiaho. ¹⁰Bine buana ibararona ranina etaina, poki hauna ena ta'ara'i hauna ha euhuna eao haharua i'imana haukia herekia bine buakia baika katebena. 'A bai'ima haukia tehore ta'ara'i hauna teahuna imana 'abaeana teuhuna emue. ¹¹Haeamona ena ta'ara'i hauna haeai ha euhuna, ia bai'ima haukia aka hamomona mo tebabaina, teahuna tebahaumaeana imana 'abaeana teuhuna emue. ¹²Ibaihauna euhuna, 'a bai'ima haukia tehore tebamani'ana teu'u ahina. ¹³Weiana haharua poki hauna etibaha, 'Tabamo kababaina? Au Naha'u tohana, e'u raona'au kauhuna keao hanona pa'e ia aba katemariki aina.’ ¹⁴'A haharua i'imana haukia ia teihana raninai te'abi'abi aina tetibaha, 'Neiana hanona haharua poki hauna nahuna, hamahu 'arina, haharua hanona aika 'eukai keao.’ ¹⁵Temikiri teberi ahina haharua kapenai teahu 'arina.

Ba haharua poki hauna taba kebabaina haharua i'imana haukia herekia? ¹⁶Ia hanona kemai haharua i'imana haukia weiakia keahu 'arinakia haharua hanona maearima haeai kebenakia.” Maearima 'abi weiana teona raninai tetibaha, “Neiana ua a'i pehoma.”

¹⁷Iesu eiha 'ini 'ininakia ba ebakainakia etibaha, “Puka Robenai tererena 'abina anina hanona taba?

‘Itu ibakorina haukia
tebaoao aina piharana hanona
aba itu ibua 'inina piharana^h
eao.’

Sal 118.22

¹⁸Hau ha ke'eho pihara weiana ahanai hanona keahu ahu hurina, 'a pihara weiana ke'eho hau ha ahanai hanona hau weiana ke'iti 'iti obo matoha apuroro 'abana.”

^h 20.17 *Itu puapuana piharana.*

¹⁹Rani weianai rauhuhu poki haukia mai robe haukia apa'uakia taeara tetabu Iesu katebirina, pokina 'abi ibabatai hanona ia mo ahakiaia ehinana, ia maearima teta'u ainakia buonai a'i etainakia.

Takiti Baibeni Bakai bakaina.

(Mt 22.15-22; Mk 12.13-17)

²⁰Iesu teiha 'inina, 'abi bai'oi haukia baika teuhunakia katebakai bai'oina matoha bero haukia 'abakia. Ena 'abiai hanona katea'ina, rauhuhu mai hiabu haukia imakiai kateutana. ²¹Weiana bai'oi haukia tebakaina tetibaha, “Ba'ioibi haumu e, ai ta'ioibina oi emu ba'ioibi mai emu 'abi hanona tebero ki'a baha, maearima ekia hoahoa hanona oi a'i nuraonanakia, 'a Tirama ena 'abi tohana taearanai nuba'ioibi harainamai. ²²Ai takiti monina obia arana katabena hanona ebero 'ao aha'i?” ²³'A Iesu ekia bai'oi weiana hanona aba e'ioibina, ba ehina benakia etibaha, ²⁴“Moni ha tomobaihana'u. Tai aubaubana mai tai atana?” Ia te'abi, “Obia 'arana 'euna.” ²⁵Iesu ehina benakia etibaha, “Obia 'arana 'euna hanona Obia 'arana katobena, 'a Tirama 'euna hanona Tirama katobena.” ²⁶Maearima wairakiai ena 'abiai katebarewana hanona a'i etainakia, ia ena 'abiai mo teta'uta'u huri, 'abi ha a'i tehina 'apuana.

'Ariai Mikiri Mue Bakai bakaina.

(Mt 22.23-33; Mk 12.18-27)

²⁷Sadukea haukia baika weiakia 'ariai mikiri mue a'i tibatohana haukia temai Iesu herena tebakaina tetibaha, ²⁸“Ba'ioibi haumu e, Mose eka rauhuhu na erere aihona, hau ha ke'ari atawana kemiaho nahuna aha'i raninai ia uaho'abana kehore wapu keatawana, miori katebarama e'ari hauna 'euna. ²⁹Weiana uaho'aba 'abaihau hamomo temiaho, pakana babi'e ha eatawana nahuna aha'i aonai e'ari. ³⁰Ibaruana wapu weiana eatawana ba e'ari, ³¹ibaihauna abomo wapu weiana eatawana, ba taeara hamonaimo haukia 'abaihau hamomo teatawana nahukia aha'i te'ari. ³²Muri 'akinai babi'e weiana abomo e'ari. ³³Ba mikiri mue raninai babi'e weiana hanona tai atawanai keao, pokina ia haukia 'abaihau hamomo ikoikiai teatawana.”

³⁴Iesu ia ehina benakia etibaha, “Hanopaka neiana haukia hanona ikoikiai tihawainibe. ³⁵'A hanopaka weiana haukia 'ariai katemikiri mue haukia hanona a'i katehawainibe. ³⁶Ia a'i kate'ari mue, pokina ia hanona aneru ihobokia abomo aba 'ariai temikiri mue Tirama nahunai kateao. ³⁷'Ariai mikiri mue 'abina hanona Mose abomo ebaihana matiu 'ini'inina arabuna e'ara orina aonai. Ia Obiapaka e'uahina Aberahamo ena Tirama, Isako ena Tirama, Iakobo ena Tirama. ³⁸Ia hanona 'ari haukia ekia Tiramana aha'i, 'a mauri haukia ekia Tiramana, pokina Ia aonai maearima ikoikai nahamauri.”

³⁹Iesu ena 'abi teona raninai rauhuhu poki haukia baika te'abi tetibaha, “Ba'iobi haumu e, 'abi tohana mo naiana.” ⁴⁰Weiana murinai ibakaina tebaoao aina.

Keriso Ebakai bakai ainakia.

(Mt 22.41-46; Mk 12.35-37)

⁴¹Iesu ehore maearima ebakainakia etibaha, “Aeahoma buonai maearima ti'abi Keriso hanona Davida nahuna? ⁴²Davida kipona Salamo pukanai e'abi,

‘Obiapaka hanona e'u Obia
ehina bena etibaha,
Itipa'u tainai momiati,

⁴³keaomo oi emu 'ou haukia
ikoikiai oi 'apumu ieha'auna
tabanai kabaonakia.’

Sal 110.1

⁴⁴Neiana Davida ehore ia Obiana ehinana ba aea homanai mo Keriso hanona Davida nahuna?”

Rauhuhu Poki Haukia Kate'ima 'ima Harainakia.

(Mt 23.1-36; Mk 12.38-40)

⁴⁵Maearima ikoinai tibahu aonai, Iesu i'abana haukia ehina benakia etibaha, ⁴⁶“Rauhuhu poki haukia herekiai kato'ima harainimi, ekia nuatae hanona habuni homa'akia katebatoto katekaoao kaoao, mai kawakawa 'ekakiai maearima ia kateba namonakia, haeamona mareai mai tatu 'ekakiai imia'au 'ekakia namokiai mo katemia'au. ⁴⁷Wapu ekia itu tiani 'aunakia, maearima ia kateihanakia paunai ekia bahuba'ari Tibahoma'anakia. Maearima uahomakia haukia puma rarina katea'ina.”

Wapu Ena Baibeni.

(Mk 12.41-44)

21 ¹Iesu mahana eao kepu herekia tebo'o haukia ekia baibeni marea monina iutana mauana aonai teuta eihanakia. ²Abomo wapu uraruna ha ena toea papakia rua eutanakia eihana. ³Iesu e'abi etibaha, “'Abi tohana au wai nahina benimi, wapu uraruna neiana euta tabana eapa'ua ba ikoikiai. ⁴Maearima neiakia ikoikiai ekia obiai baibeni tabakia papakia tehoroti, 'a wapu neiana ena uraruai kemiaho aina tabana maikoina ehorotina.”

Iesu Marea Robe Kerabu Taina Pouna Ehinana.

(Mt 24.1, 2; Mk 13.1, 2)

⁵I'abana haukia baika marea robe terobahu aina ena nuabi piharakia namoabukiai mai baibeni Tirama tebena tabakiai tebabaina. 'A Iesu e'abi

etibaha, ⁶“Bariu toiha tabakia neiakia rani kemai aonai pihara ha pihara ha ahanai a'i kemiaho maikoinai kateruru ore.”

Kato'ima Harainimi, Ia Kate'oatanimi.

(Mt 24.3-14; Mk 13.3-13)

⁷Tebakaina tetibaha, “Ba'iohi haumu e, aita raninai taba neiakia katerama? Abomo katerama ranina mai hoana hanona taba?” ⁸Iesu e'abi etibaha, “Kato'ima harainimi, a'i teme'oinimi, weiana maearima bo'ona au ata'uai katemai kate'abi, ‘Hauna neiana Au,’ haeamona ‘Rani aba herekai,’ hanona murikiai a'i kato'au. ⁹Huari mai 'au urukia kato'o hanona a'i katota'u, taba neiakia hanona katerama 'uai, 'a puana hanona wairai.”

¹⁰Haeamona ia ehina benakia etibaha, “Hanopaka ha kemikiri hanopaka ha kehuarina, itubu ha kemikiri itubu ha kehuarina. ¹¹Eka haeai haeai kanokau apa'uakia, arobo, mai inawa ki'a obokia katerama, abomo ta'u tabakia mai hoa rarikia kupai katerama.

¹²“A taba neiakia ikoikiai a'i katerama baha aonai, au ata'u paunai katea'inimi haeamona katebapo'onimi ba kateaoainimi mareai mai wapura 'ekakiai katehorotini, abomo kateberinimi kateaoainimi obia mai kabamani haukia wairakiai. ¹³Ia rani neiana hanona wai Pou Namona katohinana herekiai ranina. ¹⁴Aea katobakai aiho paunai, aomi a'i katearo 'ari. ¹⁵Pokina Au kahore aobero 'abikia kabenimi, weiana emi 'ou haukia katebamuenakia 'ao katebuniai ainakia hanona a'i ketaina.

¹⁶“Hamami, hinami, uaho'abami, hatia'ami, mai emi hau katehore katehina hinainimi, abomo wai baika kateahu 'arinimi. ¹⁷Maearima ikoikiai kate'oatanimi au pau'uai. ¹⁸A aramiai bui ha hamona a'i keki'a. ¹⁹Emi bapahihiai wai emi mauri katoa'inakia.

Iesu Ieruselema Kateahu 'Iti'itina Pouna Ehinana.

(Mt 24.15-21; Mk 13.14-19)

²⁰“A huari haukia Ieruselema katekora kaiarona katoihanakia raninai, aba kato'iohina ena pua ranina aba herekai. ²¹Ba weiakia Iudea ai temiaho haukia katebeau kobio kateao, weiakia aiara apa'uana aonai haukia katekarahi mahanai, weiakia mahanai haukia aiara apa'uanai a'i katekatoto. ²²Pokina rani neiakia hanona haiara ranikia taba ikoikiai Puka Robenai tererenakia haukia ibatohakia. ²³A rani weiakia aokiai babi'e mai nuakia abomo nahukia 'oru'orukia babi'ekia herekia hanona keki'a ki'a baha, haiara rarina 'akina hano ahanai kerama abomo Tirama ena opuere keriri maearima neiakia ahakiai. ²⁴Ia baika kareba mahanai kate'ari, ba baika kate'i maurinakia kateaoainakia hanopaka haeai haeai aokiai wapura haukia kateao, rama haea haukia hanona Ieruselema katebaripu ripuna keaomo ekia rani Tirama e'uahina hauna ketaina.

Maearima Nahuna Kemai Ranina.

(Mt 24.29-31; Mk 13.24-27)

²⁵“Beraura, nawa, mai bihiu aokiai hoa katerama mai 'aku roio mai harapuni urukiai hanopaka haukia ikoikiai aokia kearo 'ari abomo nuakia ketae. ²⁶Hanopakai taba kerama hauna kate'imana aonai maearima kateta'u aokia katerea, pokina kupai hiabu tabakia kateibiu ibiu. ²⁷Rani weianai maearima hanona Maearima Nahuna kateihana 'auhao ahanai kemai mai hiabuna mai nuabina. ²⁸'A taba neiakia katea'i ramana raninai katokoroti arami katoa'i taeana, pokina ibamaurimi aba niherekai.”

Kuropou Matiunai 'Iobi Kaha'ina.

(Mt 24.32-35; Mk 13.28-31)

²⁹Ba Iesu 'abi ibabatai neiana ehina benakia etibaha, “Kuropou mai matiu ikoikiai katoihanakia. ³⁰Raukia hubu hubukia katekarahi katoihanakia raninai kato'jobina hioro aba herekai. ³¹Ba ihobonaimo wai abomimo taba neiakia katerama katoihanakia raninai, kato'jobina Tirama ena obia aiarana hanona aba herekai.

³²“'Abi tohana au wai nahina benimi, uru neiana maearimakia a'i kate'ari ore baha aonai taba neiakia ikoikiai katerama. ³³Kupa mai hanopaka kate'akauma, 'a e'u 'abi hanona a'i ke'akauma 'apua.

Iesu I'abana Haukia Ehina benakia Kate'ima 'ima Harainakia.

³⁴“Kipomi kato'ima 'ima harainimi. Tatuai inuinuai abomo hanopaka ena aoaniai aomi a'i mebareana marikina, rani kemai hanona aba herekai matoha rio 'abana, a'i mebata'u ta'u hurinimi. ³⁵Rani weiana kemai hanona maearima ikoikiai hanopakai temiaho haukia ahakiai. ³⁶Rani ikoinai katobai'ima abomo katobahuba'ari, weianai katotabura taba neiakia ikoikiai katerama haukia herekiai katokapare Maearima Nahuna wairanai katokoroti.”

³⁷Iesu rani weiakiai mararani hanona marea robe aonai eba'ioi, 'a rabirabi hanona ekarahi eao Olibe oeonai rabi maikoina weia emiaho. ³⁸Raurani amarikiai maearima ikoikiai teao marea robe aonai aiana kateona.

Iesu Ena 'Ari Taearana Tetabuna.

(Mt 26.1-5, 14-16; Mk 14.1-2, 10-11; Io 11.45-53)

22 ¹Parawa ibakupu aha'i tatuna beraurana teaparina Kabanai tatuna hanona aba niherekai. ²Robe haukia apa'uakia mai rauhuhu poki haukia Iesu iahu 'arina taearana tetabu iamo maearima teta'u ainakia.

³Satani ehore Iuda Kariote hauna Iesu i'abana haukia harauhaea rua ha aonai etoto. ⁴Iuda eao robe haukia apa'uakia mai marea robe te'imana

poki haukia kipokia teroba ahu Iesu aea kehinahinai aihona. ⁵Ia aokia enamo, ba te'abi'uai moni katebena. ⁶Iuda ekia 'abi ea'i taeana, taeara etabu rani namona tabanai to'u aha'i aonai imakiai keutana.

I'abana Haukia Rua Kabanai Anianina Teba'oruna.

(Mt 26.17-25; Mk 14.12-21; Io 13.21-30)

⁷Parawa ibakupu aha'i tatuna wapuna etaina hanona Kabanai banamo mamoeikia kateahu 'arinakia ranina. ⁸Iesu Petero mai Ioane euhunakia e'abi etibaha, “Tomoao eka Kabanai anianina aika kahani hauna katoa'ia'i haraina.” ⁹Terarua tehina bena tetibaha, “Nonuatae ae'ei kata'ia'i haraina.” ¹⁰Ia ehina benakia etibaha, “Aira apa'uanai katokatoto aonai hau ha puou mai beina aronai kebuana katoihana, murinai katoao ketoto itunai katokatoto. ¹¹Weiana itu poki hauna katohina bena, ‘Ba'ioji hauna ninoini'o, baki ikaihurina hanona ae'e ai. Weia au mai i'aba'u haukia kipokia emai Kabanai tatuna anianina katana.’ ¹²Ia kehore ikaihuri apa'uana 'ubiai aba iba'oru hauna kebaihanimi, weia aniani katoa'ia'i haraina.” ¹³Terarua tekaobo teao Iesu ehina benakia tabakia ikoinai ihobona tohanai tetabu ahinakia, weia Kabanai tatuna anianina tea'ia'i haraina.

Obiapaka Ena Anito'u Robe Orena.

(Mt 26.26-30; Mk 14.22-26; 1Kr 11.23-25)

¹⁴Beraura hoana etaina Iesu ena iuhubeau haukia kipokia aniani 'ekana'i temiati. ¹⁵Ia ehina benakia, etibaha, “Au e'u nuatae tohana hanona Kabanai tatuna anianina neiana kipokia kahaniani oiioi 'uaina ba kateba haiarana'u. ¹⁶Pokina au wai nahina beninimi, Au hanona neiana a'i kani muena keaomo anina tohana Tirama ena obia aiaranai ketohana.”

¹⁷Ba 'ere ha ea'ina ebanamona e'abi etibaha, “Neiana tomoa'ina ikoimiai tomoinu. ¹⁸Pokina au wai nahina benimi, bine buana beina a'i kainu mue bariu keaomo Tirama ena obia aiarana kemai.” ¹⁹Parawa ha ea'ina ebanamona haeamona ehobina ebenakia e'abi etibaha, “Neiana hanona au hau'u, wai paumiai nabaibeni. Neiana katobabaina au iraona'u.” ²⁰Taeara ihobonaimo teaniani murinai ia 'ere ha ea'ina ehina benakia etibaha, “'Ere neiana hanona baibua mahamahana ibatohana hoana au aruaru'u ai, wai paumiai kekiki oiioi. ²¹Ia au hinahina'u kehinahina hauna imana abomo neia au ima'u kipokia aniani 'ekana'i. ²²'Abi tohana Maearima Nahuna hanona keao Tirama ena raona ihobona, 'a hau weiana kehinahina hauna ki'ana herenai ki'a rarina kerama.” ²³Ia kipokia ha ha tebakai bakai baiatakiai, tai hanona aka weiana kebabaina.

I'abana Haukia Tebaihara tae Tai Keapa'ua.

²⁴I'abana haukia kipokia baiatakiai tebaihara tae tai hanona keapa'ua. ²⁵Iesu ehina benakia etibaha, “Rama haeai obia arana haukia hanona ekia maearima

Tiobia ainakia, ekia nuatae weiakia ekia iha 'ini ba'anai temiaho haukia hanona kateaparinakia ia maearima namokia. ²⁶A wai heremiai hanona ua a'i kehoma, keapa'ua baiatamiai hauna hanona aona mebamiorina, ne'uai ainimi hauna hanona matoha barai barai akana nibabaina hauna 'abana. ²⁷Tai hanona eapa'ua, weiana aniani 'ekana'i nemia'au hauna 'ao barai barai akana nibabaina hauna? Weiana aniani 'ekana'i nemiati hauna hanona eapa'ua. Ia au wai baiatamiai hanona barai barai akana nibabaina haunai naeao.

²⁸“Wai hanona au kipokia hamiaho haeamo baihobo ikoikiai aokiai. ²⁹Hama'u hiabu ebena'u ena 'eka ka'imana, ihobonai mo bariu Au hiabu kabenimi e'u 'eka kato'imana. ³⁰Weiana e'u obia aiaranai wai hanona e'u aniani 'ekana'i katoaniani katoinuinu, haeamona obia imia'aunai katomia'au Isaraela itubuna harauhaea rua i'imana haumiai katoao.

Iesu Petero Ia Kebuniaina 'Abina Ehina 'Uaina.

(Mt 26.31-35; Mk 14.27-31; Io 13.36-38)

³¹“Simona e, Simona e, Satani aba enoinoi ikoimiai kebarobonimi kehobonimi ihobona witi 'abana. ³²Iamo Simona au aba ahamuai abahuba'ari emu a'ikakauma a'i me'eho, ba oi koraona kabe raninai uaho 'abamu abokiamo koba taburanakia.”

³³Petero ehore Iesu ehina bena etibaha, “Obiapaka e, au aba aba'oru oi ka'abani'o kahaeao kahawapura 'ao kaha'ari.” ³⁴Iesu ena 'abi ebamuena etibaha, “Petero e, au oi nahina beni'o, bariu rabi neianai kokoro'u a'i ke'arara baha aonai, oi rani aihau au kobuniaina'u, au a'i o'jobina'u na kohoma.”

Iesu E'abi Imakiai Taba Hauna Katea'ina.

³⁵Iesu ehore i'abana haukia ebakainakia etibaha, “Uainai auhu ahinimi, toao mahoia ihuihuiua, mahoia mai tamaka aha'i toka'a raninai taba ha heremiai tokapu, 'ao?” Ia te'abi tetibaha, “Aha'i.” ³⁶Ia ehina benakia etibaha, “A bariu tai mahoia ihuihuiua herenai hanona kea'ina, mahoia abomo kea'ina, mai tai kareba herena aha'i hauna ena habuni kekawa kawa aina moninai kareba ha kekawana. ³⁷Pokina au wai nahina benimi, tererena 'Kakikaki haunai tebaona,' 'abina neiana hanona au here'uai ketohana, taba tererena au aha'uai hauna ibatohana ranina aba nimai.” ³⁸I'abana haukia te'abi tetibaha, “Obiapaka e, moihana kareba rua neiakia.” Weiana ia ehina benakia, “Abetaina.”

Iesu Getesemane ai Ehabuba'ari.

(Mt 26.36-46; Mk 14.32-42)

³⁹Iesu nibabai babai bena ihobonai ekarahi Olibe oeona eao, i'abana haukia ia murinai teao. ⁴⁰'Eka weianai tekara'au raninai ia ehina benakia etibaha, “Tomobahuba'ari baihobo aonai a'i tomototo.”

⁴¹Herekiai ekaobo baiatakia ena homa'a matoha pihara ha pahakapona peao pe'eho ihobonai weia ekaipehu ebahuba'ari. ⁴²E'abi etibaha, “Hama'u e, konuatae raninai haiara 'erena neiana here'uai koa'i obona, iamo au e'u nuataeai aha'i, 'a oi emu nuatae mobabaina.”

⁴³Ba aneru ha kupai emai ia herenai ewaira tina, ebataburana. ⁴⁴Aona earo'ari, ebahuba'ari haeamona ebahuba'ari tabura tabura, maorona te'eho 'anoai ihobona aruaru kokoma'akia 'abana. ⁴⁵Ena bahuba'ari murinai emikiri eao i'abana haukia herekia, aoko'oai aba temahe harai buonai parua reakia etabu ahinakia. ⁴⁶Ehina benakia etibaha, “Taba buonai tuparua? Tomono'a, tomobahuba'ari baihobo aonai a'i tomototo marikina.”

Iesu Tea'i 'Inina.

(Mt 26.47-56; Mk 14.43-50; Io 18.3-11)

⁴⁷Iesu ni'abi oho mo aonai i'abana harauhaea rua haukia 'abakia ha atana Iuda to'u rarina e'uai ainakia temai, ba ekahaha Iesu herena eao kepauna. ⁴⁸'A Iesu ehore Iuda ehina bena etibaha, “Oi hanona baipauai Maearima Nahuna nohinahinaina, u?”

⁴⁹Weiakia herenai tekoroti haukia taba kerama hauna te'jobina aonai te'abi tetibaha, “Obiapaka e, karebai tamaharanakia, u?” ⁵⁰Ba 'abakia ha robe haukia 'arakiai hauna ena ta'ara a'i hauna haiana itipana ehara obona. ⁵¹'A Iesu e'abi etibaha, “Naiana mepua.” Ba ia ehore hau weiana haiana ea'i 'apuana ebanamona.

⁵²Iesu ehore robe haukia apa'uakia marea robe 'ima haukia mai aiara hau apa'uakia temai ia katea'ina haukia ehina benakia etibaha, “Mai karebami mai pura'ami tomai matoha bainao hauna katoa'ina 'abana, u? ⁵³Rani ikoinai au hanona wai kipokia marea robe aonai, iamo wai a'i toa'i 'inina'u. 'A bariu rani neiana hanona wai emi rani, wapura ena hiabu ranina.”

Petero Iesu Ebuniai aina.

(Mt 26.57, 58, 69-75; Mk 14.53, 54, 66-72; Io 18.12-18, 25-27)

⁵⁴Ia tehore Iesu tea'ina tebaka'ana teaoaina robe haukia 'arakiai hauna ena ituai, 'a Petero hanona murikiai eao ia mo mai baiatakia. ⁵⁵Baika tehore ara aona ibuanai iruba teba'arana ba temia kakaiarona, Petero abomo weia baiatakia emiati. ⁵⁶Ba ta'ara a'i uahona ha iruba eanai Petero emiati eihana, eiha iha haraina e'abi etibaha, “Hau neiana hanona Iesu 'abana ha.” ⁵⁷'A Petero ebuniai etibaha, “Uaho e, au ia a'i a'jobina.” ⁵⁸Rani a'i ehoma'a aonai, hau ha ia eihana e'abi etibaha, “Oi abomo 'abakia ha.” Petero e'abi etibaha, “Hau e, au hanona aha'i.” ⁵⁹Beraura hoana ha eao 'abana hau ha ia eihana ba e'abi tabura etibaha, “'Abi tohana hau neiana abomo ia 'abana ha, pokina ia abomo Galilea hauna.” ⁶⁰Ba Petero e'abi etibaha, “Hau e, au a'i a'jobina oi taba robana nuahuna.”

Ni'abi oho mo aonai kokoro'u e'arara. ⁶¹Weiana Obiapaka eiha kabe Petero eihana. Ba Petero ehore Obiapaka ena 'abi ehinana hauna eraona tinana, “Oi bariu rani neianai kokoro'u a'i ke'arara baha aonai au rani aihau kobuniai aina'u.” ⁶²Weiana Petero ekarahi eao atapakai ehai ki'a.

Iesu Tebapo'ona.

(Mt 26.67, 68; Mk 14.65)

⁶³Hau weiakia Iesu tea'i 'inina haukia tebatæ aina. ⁶⁴Mahana te'apa abunakia te'atina ba tebakaina tetibaha, “Mohina benamai. Tai oi e'atini'o?” ⁶⁵Abomo 'abi ki'a obokia bo'ona herenai tehinakia.

Iesu Bakai Te'imana Haukia Wairakiai Ekoroti.

(Mt 26.59-66; Mk 14.55-64; Io 18.19-24)

⁶⁶Erani aonai aiara hau apa'uakia, robe haukia apa'uakia, mai rauhuhu poki haukia kipokia teto'u ba Iesu temaiaina bakai apa'uana weiana wairakiai. ⁶⁷Bakai apa'uana haukia tebakaina tetibaha, “Mohina benamai. Oi hanona Keriso, 'ao?” 'A Iesu ia ehina benakia etibaha, “Pahina benimi hanona a'i patobatohana'u. ⁶⁸Abomo pabakainimi hanona a'i patobamuena. ⁶⁹Ia bariu rani neiana keaoaina hanona Maearima Nahuna hiabu Tiramana imana itipana tainai kemiati.”

⁷⁰Ia ikoikiai tebakaina tetibaha, “Ba oi hanona Tirama Nahuna, u?” Weiana Iesu ia ehina benakia etibaha, “E, aba tu'abi mo naia.” ⁷¹Ba ia te'abi tetibaha, “Taba buonai hinau 'abikia nahatabunakia? Aika aba ia kipona pinanai Tirama nia'i ki'ana aiana haona.”

Iesu Pilato Wairanai.

(Mt 27.1, 2, 11-14; Mk 15.1-5; Io 18.28-38)

23 ¹Weiana bakai apa'uana haukia maikoina temikiri Iesu teaoaina Pilato herena. ²Weia ena beho 'abikia tea'i ramana tetibaha, “Hau neiana tatabu ahina emai hanopaka maearimakia aokia niana aiara niba'uri 'urina mai obia arana herenai takiti katabaibeni hauna nikaibuna, abomo kipona ni'abi ia hanona Keriso, obia arana.” ³Ba Pilato ehore Iesu ebakaina etibaha, “Oi hanona Iuda haukia ekia obia arana, u?” Ia ena 'abi ebamuena etibaha, “'Abimo naiana aba nohinana.” ⁴Pilato ehore robe haukia apa'uakia mai to'u haukia ehina benakia etibaha, “Au hau neiana herenai beho ha a'i atabu ahina.” ⁵Ia te'abi tabura tetibaha, “Ena ba'iohi 'abikiai Iuda maearimakia aba eba'uri 'urinakia, weia Galilea ai ea'i ramana emai mo aba 'eka neianai ekara'u.”

⁶Pilato 'abi weiana 'uruna eona hanona ebakai bakai hau neiana Galilea hauna 'ao. ⁷Pilato e'iohina Iesu hanona Heroda ena iha'ini ba'anai buonai euhuna teaoaina Heroda herena, rani weianai Heroda abomo weia Ieruselema ai.

Iesu Heroda Wairanai.

⁸Heroda Iesu eihana raninai aona enamo ki'a pokina aba wa'i baha 'akinai Iesu pouna eona, enuatae ia peihana abomo ena nuatae Iesu hoa baika pebabai peihanakia. ⁹Ua buonai 'abi bo'okiai ebakaina, 'a Iesu ia ena 'abi ha a'i ebamuena. ¹⁰Robe haukia apa'uakia mai rauhuhu poki haukia weia tekoroti te'abi pahihi herenai. ¹¹Ba Heroda mai ena huari haukia kipokia Iesu tebapo'ona, 'abi ki'a obokia haeai haeai tehina murinai, obia habunina ha tebabatotona, haeamona temue aina teaoaina Pilato herena. ¹²Rani weianai Heroda mai Pilato hanona tebaihau, ia 'uainai terarua hanona tebai'oata.

Pilato Ehina benakia Iesu Kateahu 'arina.

(Mt 27.15-26; Mk 15.6-15; Io 18.39-19.16)

¹³Pilato ehore robe haukia apa'uakia aiara obiakia mai aiara maearimakia eparinakia ebato'unakia. ¹⁴Ehina benakia etibaha, “Hau neiana tomaiaina here'uai to'abi, maearima aokia niani aiara niba'uri 'urina, ia au wairamiai 'abi weiakia tohina herenai haukia abakaina hanona ena ki'a ha a'i atabu ahina. ¹⁵Heroda abomo ua homana buonai euhuna emue emai hereka, katoihana ia hanona 'ari akana ha a'i ebabaina. ¹⁶Weiana buonai ka'atina ba kahabona keao.” ¹⁷Rani ikoinai Kabanai tatuna aonai Pilato ena hoa hoa tainai wapura hauna ha ebakarahina.

¹⁸'A mako teio haeamo tetibaha, “Hau neiana moahu 'arina! Baraba morubuna mobenamai!” ¹⁹Baraba hanona aba ua'a wapura 'ekanai emiaho pokina aiara apa'uana aonai baripuripu mai ahuahua ebaramanakia paunai. ²⁰Pilato ena nuatae hanona Iesu pebakarahina paunai to'u haukia ehinabe muenakia. ²¹'A to'u haukia teio hao io hao tetibaha, “Matiu ibiri ropo 'ubinai me'ari! Matiu ibiri ropo 'ubinai me'ari!” ²²Pilato rani ibaihauna to'u haukia ehinabe muenakia, “Hau neiana beho tabana ebabaina? Ia ke'ari hauna behona ha a'i atabu ahina. Ua paunai ka'atina ba kahabona keao.” ²³'A to'u haukia teio to'o baihana aiakia 'ubi tohanai Iesu matiu ibiri ropo 'ubinai ke'ari. Ekia ioai Pilato etara haona. ²⁴Ua buonai Pilato ehore ekia nuatae ebabaina Iesu behoai ehorotina. ²⁵Pilato ehore hau weiana baripuripu mai ahuahua ebaramanakia paunai wapura 'ekanai tehorotina hauna ebakarahina ekia noinoi ihobonai, ba Iesu ebenakia ekia nuatae akakia katebabai.

Iesu Matiu Ibiripoai Tekoko 'auna.

(Mt 27.32-44; Mk 15.21-32; Io 19.17-27)

²⁶Huari haukia Iesu tebaka'ana teaoaina aonai Kurene hauna ha atana Simona ia hanona 'uniai emai Ieruselema niao tetabu ahina ba tea'ina matiu ibiri ropo tebabua ahina Iesu murinai eka'a aina.

²⁷Maearima bo'ona 'akina Iesu murina te'au baiatakiai babi'e baika ia teaoko'o aina tehai. ²⁸Iesu ekabe ehina benakia etibaha, "Ierusalem nahuna babi'emi e, au a'i tomohai aina'u, 'a wai mai nahumi kipokia paumiai tomohai. ²⁹Pokina rani kemai aonai maearima kate'abi katetibaha, 'Babi'e te'one 'one miori a'i tebarama, mai a'i teba'ae ba'ae babi'ekia hanona namo tea'ina.' ³⁰Weiana

'kobio katehina benakia,
 "tomo'eho ahamai ai",
 mai oeo katehina benakia,
 "tomobahu abunamai." "

Hos 10.8

³¹Au matiu maurina 'abana here'uai na tibabai aiho raninai, wai matiu 'ororona 'abana heremai aea patebabai aihona?"

³²Beho haukia rua abomo tebaka'anakia teaoainakia Iesu kipokia kateahu 'arinakia. ³³Temai 'eka atana 'Ara huriana' ai tekara'au aonai, Iesu matiu ibiri ropo ahanai tekoko 'auna beho haukia rua kipokia hamona itipanai, ha awarinai. ³⁴Ba Iesu e'abi etibaha, "Hama'u e, mohina haonakia pokina ia a'i te'jobina taba tibabaina." Weiana huari haukia pu'i ai ena habuni tewatena.

³⁵Maearima tekoroti tebaiaruru, aiara obiakia tehore Iesu tebapo'ona te'abi tetibaha, "Ia maearima haeai ebamaurinakia, ba ia Tirama ena Keriso Tirama etina'ana hauna raninai kipona mebamaurina." ³⁶Huari haukia abomo tebapo'ona tekahaha herena bine beina manoina tebena. ³⁷Ba tehina bena tetibaha, "Oi Iuda ekia obia 'arana raninai kipomu mobamaurini'o."

³⁸Iesu 'arana ubinai marere ha abomo weia na terere aihona,

'NEIANA HANONA IUDA EKIA OBIA 'ARANA!'

³⁹Beho haukia weia tekapa'au haukia ha Iesu ebapo'ona e'abi etibaha, "Oi bamauri haumu 'ao aha'i? Kipomu mobamaurini'o ai abomo mobamaurinamai." ⁴⁰A 'abana ehore erikena etibaha, "Oi puma ihobona nua'ina mo Tirama a'i nuta'u aina, u? ⁴¹Aika hararua kaha'ari hanona ebero, pokina puma naha'ina hauna hanona eka babai ihobonai, 'a hau neiana hanona taba ha'i ebabai ki'ana." ⁴²Haeamona ia e'abi etibaha, "Iesu e, emu obia aiarana kokatoto raninai au koraonana'u." ⁴³Iesu ia ehina bena etibaha, "'Abi tohana au oi nahina beni'o, bariu rani neianai oi mai au hararua hanona paradiso aonai kahamiah." "

Iesu E'ari.

(Mt 27.45-56; Mk 15.33-41; Io 19.28-30)

⁴⁴Ihobona matoha atiaha hororo aonai beraura ewapura, abomo wapura hanopaka maikoina ekaiabuna eaomo beraura hoana aihau.

⁴⁵Abomo marea robe aona i'aea hurina habunina etapa boana rua.

⁴⁶Iesu eapari aota, "Hama'u e, auba'u imamuai nautana." Ua e'abi aihu murinai e'ari.

⁴⁷Weiana huari poki hauna taba terama haukia eihanakia aonai Tirama ebanamona etibaha, “‘Abi tohana hau neiana hanona bero hauna.”

⁴⁸Baiaruru haukia weia teto'una taba terama teihanakia raninai, haharakia teahu ahunakia mai aoko'okia temue aiara teao.

⁴⁹'A Iesu te'jobina haukia ikoikiai mai babi'e weiakia murinai te'au Galileai temai haukia atau'ai tekoroti taba terama haukia teihanakia.

Iesu Tehorena.

(Mt 27.57-61; Mk 15.42-47; Io 19.38-42)

⁵⁰Bakai apa'uana hauna ha atana Iosepa ia hau namona abomo aka bero hauna, ⁵¹ena aiara hanona Arimatea Iudea aiarana ha, Tirama ena obia aiarana ne'imana kemai. Ia bakai apa'uana haukia ekia raona mai babai a'i ea'i taeanakia. ⁵²Hau neiana eao Pilato herena Iesu huanina enoi aina. ⁵³Weiana ia Iesu huanina ea'i obona habuni imukinai e'apana 'ariahana pihara tekuina 'urina aonai ehorotina, 'uri weiana hanona tai aha'i tihore bahana. ⁵⁴Rani weiana hanona a'ia'i harai wapuna abomo beraura robena aba kea'i ramana.

⁵⁵Babi'e weiakia Iesu kipokia Galileai temai babi'ekia Iosepa murinai teao, 'ariahana mai Iesu huanina aea tebaenoti aihona teiha haraina. ⁵⁶Weiana ia temue teao aiara muramura timikia namokia mai hauna katetarona tehorokia teba'orunakia. Ba beraura robenai tearai rauhuhu taina.

Iesu 'Ariai Emikiri Mue.

(Mt 28.1-10; Mk 16.1-8; Io 20.1-10)

24 ¹Hui beraurana kori 'uainai raurani 'amari 'amarinai babi'e muramura timikia namokia teba'orunakia haukia tea'inakia 'ariahana teao. ²'Ariahana ikaibuna piharana aba ehene pare atau'ai teihana. ³Ia 'ariahana aonai tetoto raninai Iesu Obiapaka huanina a'i teihana. ⁴Weiana paunai tekoroti aokia earo'ari aonai hau rua ekia habuni 'imare 'imarekia beronai herekia tekoroti. ⁵Babi'e teta'u ki'a tekuti wairakia 'ano eao, hau rua babi'e tebakainakia tetibaha, “‘Taba buonai emauri hauna 'ari haukia baiatakiai tutabuna. ⁶Ia hanona neia aha'i. Ia aba emikiri mue! Galileai emiaho oho aonai wai ehina benimi 'abina tomoraonana. ⁷Etibaha, ‘Maearima Nahuna hanona ki'a haukia imakiai kateutana, matiu ibiri ropo 'ubiai kateahu 'arina haeamona wapu ibaihauna murinai kemikiri mue.’”

⁸Weia ia Iesu ena 'abi teraona tinanakia. ⁹'Ariahanai temue temai raninai taba neiakia ikoikiai i'abana haukia harauhaea hamomo mai harina baika herekiai tehinanakia. ¹⁰Babi'e neiakia Maria Magadala babi'ena, Ioana, Iakobo hinana Maria, mai babi'e baika te'abanakia

haukia kipokia pou neiana iuhubeau haukia herekia tehinana. ¹¹Iamo iuhubeau haukia babi'e ekia 'abi ori 'abaeana tebaona buonai a'i tebatohana. ¹²'A Petero emikiri ebeau eao 'ariahana. Ekuti aona eribana te'apana habunikia mo weia kipokia tenoti 'abaea eihanakia, emue ena itu eao aonai kipona aona earo'ari taba weiana erama hauna paunai.

Iesu Emao Taearanai Ewaira Tina.

(Mk 16.12, 13)

¹³Rani weiana hamona aonai Iesu i'abana haukia rua tiao aiara ha atana Emao, aiara weiana mai Ierusalem baia takia ena homa'a hanona kilometa harauhaea hamomo 'abana. ¹⁴Taearai teka'a aonai taba neiakia ikoikiai terama haukia terarua baia takiai te'abi 'abi ainakia. ¹⁵Ba terarua te'abi 'abi mai terobahu aonai Iesu kipona emai herekia teka'a oiio. ¹⁶'A maearimana teihana ia a'i te'iohina ia hanona Iesu.

¹⁷Iesu ia ebakainakia etibaha, “Wai torarua ka'amiai taba robana tuahuna?” Terarua tekori 'ororo wairakia mai birabirakia. ¹⁸Ha weiana atana Kaleapa ebakai bakai etibaha, “Terusalem aonai oi pa'e ikupaiamu mo taba rani murikai terama haukia a'i o'iohinakia?” ¹⁹Ia ebakainakia etibaha, “Aka tabakia?”

Hau rua tetibaha, “Iesu Nasareta hauna pouna. Ia hanona mahabanai hauna, Tirama mai maearima ikoikiai wairakiai ena 'abi mai aka tehiabu wairai. ²⁰Robe haukia apa'uakia mai aiara haukia apa'uakia ia Roma haukia tebenakia matiu ibiri ropo 'ubinai teahu 'arina. ²¹'A ai taraonana ia hanona aika Isaraela hauka kebamaurinaka hauna.

Haeamona taba neiakia terama wapu aihau teore. ²²Babi'e baika baia tamai ai tebata'u ta'u hurinamai. Ia raurani amarina teo 'ariahana hanona ²³Iesu hauanina a'i tetabu ahina temue temai te'abi aneru teihanakia abomo aneru weiakia ia tehina benakia, 'Iesu hanona aba emauri mue.' ²⁴Ba 'abamai baika teo 'ariahana teihana hanona babi'e te'abi ihobonai mo tetabu ahina, 'a Iesu hauanina a'i teihana.”

²⁵Iesu ehina benakia etibaha, “Hama na topo'o aiho abomo mahabanai haukia taba tehina haukia ibatohakiai aomi temahari. ²⁶Keriso na kehaiara aiho 'uai ba ena nuabi aonai ketoto, weiana a'i to'iohina, u?” ²⁷Iesu hanona Mose mai mahabanai ekia rere rereai ea'i ramana Puka Robena aonai ia kipona 'abina maikoinai hau rua eba'iohinakia.

²⁸Aiara tiao hauna aba herekiai ba Iesu hanona kekabero na ehoma. ²⁹'A terarua tebamuna te'abi tetibaha, “Beraura aba kekaihuna abomo aba kerabi, kipokia pahamiaho.” Ba ia ekatoto kipokia katemiaho. ³⁰Weiana aniani 'ekana kipokia temiati ranina Iesu ehore parawa ea'ina ebanamona ehobina terarua ebenakia. ³¹Ba mahakia teno'a aokia tea weia te'iohina ia hanona Iesu, haeamona wairakiai e'akauma 'abaea. ³²Ia terarua kipokia te'abi tetibaha, “Taearai ehina benaka abomo Puka Robena 'abikia eba'iohinaka ranina matoha iruba aokai eara, uhe?”

³³Terarua beronai temikiri temue Ierusalem teao, i'abana haukia harauhaea hamomo 'abakia kipokia tito'u haukia tetabu ahinakia. ³⁴Ia hau rua tehina benakia tetibaha, “Obiapaka hanona emikiri toha, Simona herenai ewaira tina.” ³⁵Weiakia terarua taearai taba erama pouna abomo parawa ehobina aonai aokia ea Iesu te'jobina pouna tehinanakia.

Iesu I'abana Haukia Iesu Teihana.

(Mt 28.16-20; Mk 16.14-18; Io 20.19-23; Ih 1.6-8)

³⁶'Abi weiakia tehina oho mo aonai Iesu tohana ia baiatakiai ekoroti abomo e'abi etibaha, “Baibua wai heremiai!” ³⁷Ia ikoikiai teta'ukia mai ubo ea'inakia, teraonana biriu teihana. ³⁸'A Iesu ehina benakia etibaha, “Ae homa buonai tuta'u mai aomi tikai'au kai'au. ³⁹Ima'u mai ae'u tomoihanakia tomoa'i hobona'u tomo'jobina'u, Nahuna au toha'u pokina auba hanona bitiona mai huriana aha'i ia au hanona mai eu'u.” ⁴⁰'Abi weiana ehinana murinai imana mai aena ebaihanakia. ⁴¹Ia teaonamo ki'a baha paunai Iesu a'i tebatoha bahana aokia raona raona ebonu buonai ia ebakainakia etibaha, “Wai taba katoani hauna ha na'a?” ⁴²Ia maia ha aba eawati hauna hana papana tebena. ⁴³Weiana ia ea'ina wairakiai eana.

⁴⁴Ba Iesu ia ehina benakia etibaha, “Au wai heremiai amiaho oho aonai taba robakia ahu haukia neiakia, Au pou'u tererenakia Mose ena rauhubuui mahabanai haukia ekia rere rereai mai Salamo aonai haukia ikoikiai katetoha.” ⁴⁵Weiana aokia ebaeanakia Puka Robena obona kateobo. ⁴⁶Haeamona Iesu ia ehina benakia etibaha, “Puka Robenai na terere aihona. Bamauri hauna hanona kehau haiara abomo 'ariai kemikiri mue wapu ibaihaunai. ⁴⁷Ia atanai raona kabe mai ki'a ihina haokia poukia kateiroro ainakia Ierusalem ai katea'i ramana keaomo hanopaka ikoikiai aokiai. ⁴⁸Wai hanona taba neiakia poukia ibatohakia haumi. ⁴⁹Aia'u tomona. Hama'u Auba Robe e'uahi 'uaina hauna au kipou'kauhuna kemai ahamiai, 'a wai hanona Ierusalem aonai katobai'ima keao mo hiabu 'ubiai kemai hauna katoa'ina.”

Iesu Ea'itaeana Kupa Eao.

(Mk 16.19, 20; Ih 1.9-11)

⁵⁰Iesu ia aiara apa'uanai ebakarahunakia teao Betani herena tainai, ba imana ea'i taea banamo ebenakia. ⁵¹Nibanamonakia aonai Tirama ehore herekiai ea'i taeana eaoaina kupa. ⁵²Ia tekuti aina ba mai aonamokia temue teao Ierusalem. ⁵³Rani ikoinai teao Marea Robe aonai temiaho Tirama tebanamona.